



Teol. 3849.

f qto 2

X. g. 49.

O. XIII
19

Dubn^d. ⁺
The first house first class agents from it.

1755. 10. 1. 11.

ORATIONVM
ECCLESIASTICA-
RVM

Dominicalium
TOMIPRIMI
Pars Altera.

*Authore R. P. STANISLAO ZAKRZEWSKI, Canon. Reg.
Monas. Czeruen. B. V. M. Professo. Sacrae Theolo. Lectore.
Ordinario Prædicatore, ad edes S. Georg. Warsavia.*



CALISSII

In Officina Alberti Gedelii Illust. Archiepiscopi Typogra-
phi. Anno Dni. 1620.

Cum licentia Superiorum.

CHINESE

Illustrissimo & Reuerendo Domino,

D. GEORGIO ZAMOYSKI

EPISCOPO CHELMNENSI ABBATIAE CERVENENSIS

ADMINISTRATORI PERPETVO &c.
Domino ac Patri suo benignissimo.

Author in Gratia Dei Nestoreos dies.


Prima parte Orationum Ecclesiasticarum Serenissimo Regi, & Illmo Dño Archiepiscopo Gnesnensi, magna cum animi submissione oblata, hanc alteram meditati, venit in mentem quærere, sub cuius auspiciis ederetur. Verum non difficile fuit inuenire, statim I. C. V. venit imago, eius videlicet qui clarissimo Zamosciadum Familiae splendore, summum decus & ornamentum labori meo præstare valeat. Lumen quoque sapientiae, & radii prudentiae, cum in Te lucidissime præfulgeant, non altero, quam I. C. V. nomine condecorandum hoc opus meum duxi. Iam vero singularis I. C. V. amor in ordinem nostrum Canoniorum, multis indiciis exhibitus non alio diuertendum suadebat. Beneficia quoque pleno modio, & pingui mensura Monasterio no-

PRÆFATIO.

stro Ceruenensi ab I. C. V. exhibitio (templum scilicet
vetustate corruptum per I. C. V. mirum in modum ma-
gno cum sumptu renouatum, apparamentis Ecclesiasti-
co ritui seruientibus exornatum. Monasterium vero
ipsum paterno affectu rebus ad victum & amictum ne-
cessarius dotatum, urgere & exigere videbatur, ut
viciſſim gratitudinis & obseruantie erga I. C. V. testi-
monium nomine omniū Canonic. Reg. exhibere non dis-
ferem. Quod quidem libenter facio, pro hisque insigni-
bus in nos collatis beneficiis iterum atque iterum gratias
ago, feliciterque viuere, in annos ad ornamentum &
subsidium nostrum quam plurimos desidero. Hocque
meum opus, & omnia mea humilis in Christo filius, &
seruus omnium nouissimus prouolutus ad pedes pa-
ternos, do, dedico, consecro. Ex Conuentu

Wars. Can. Reg. 20. Feb.

Anno Dni. 1620.



ORATIO ECCLESIASTICA

In Dominica Septuagesimæ.

*Quoniam mille anni ante oculos tuos, tanquam dies hesternæ
quæ præterit. Psal. 89.*

Vitæ humanæ breuitas per hoc pulcherrimè demonstratur, cum vnius diei spatio comparetur.

Summa Conclusionis.

Refert Plutarchus Ægyptios olim in domorum constructione fuisse negligentes, cum sepulchra interim magnificentia, & sumptu multò ædificarent, & Pyramides ad hoc erigerent magnitudinis miræ: rogati cur id facerent: quia, scilicet respondebant, virorum domicilia, vitæ in momento transeuntis diuersoria sunt, sepulchra verò sunt defunctorum domus æternæ. En quomodo homines tenebris errorum inuoluti, vitam humanam esse breuissimæ durationis agnoscebant, & idcirco eâ quæ mundi sunt contemnentes, futurorum memores existebant. At Christiani, fidei lumine illustrati pollicentur sibi longos viuendi dies, & mortis aduentum longè à seipsis abesse opinantes, magna sollicitudine bona temporalia quærunt, viuuntque, ac si nunquam morituri. Sed profectò breues dies hominis sunt, & mensura dierum eius apud Dominum. Quamobrem quærite potius, ô mortales,

In suis moralibus.

Obliuio futurorum inducit homines ad colligenda bona temporalia.

Hh

cœle-

cœlestia bona, quia hæc æterna sunt, temporalia verò breui relinquenda, ibique domos sumptuose construere, vbi anima est sine fine victura, non verò hic, vnde statim est recessura. Quod vt maiori cum diligentia faciatis, vitam nostram, vnius diei spatio, non amplius permanere conuenientibus rationum argumentis ostendam.

AVE MARIA.

*Psal: 89.
Flori homo
rectè compa-
ratur.*

*Nullus ho-
mo unum
diem vixis-
se dicitur.*

In primis igitur testimoniis sacræ scripturæ, vitam humanam vnius esse diei comprobatur. Mane inquit Psalmista, floreat & transeat, vespere decidat, induret & areseat. Flos mane floret, sed vnius diei spatio propter ingentem æstum siccatur, indurescit, & arefit: sic homo in tenera iuuentutis ætate, forma & viribus pollet, adueniente tenebrosa mortis nocte, propter vehemētes febris ardores extinguitur. Iob. 14. *De mane usque ad vespem finies me,* & Sap. 5. *Spes impii tanquam spuma gracilis, quæ à procella dispergitur, & tanquam fumus, qui à vento diffusus est, & tanquam memoria hospitis vnius diei prætereuntis.* Ex quibus verbis nonne rectè colligitur vitam humanam, vnius tantummodo diei spatio permanere. Sed parum dixi, dicam plura. Nullum unquam hominem, vitam vnius diei duxisse, neque ducturum affirmo. Quid ita? Quis enim aliquando ex hominum genere vitæ huius beneficio mille annis vsus fuisse perhibetur? Obserua & videbis nullam vitam adeo fuisse longam, vt ad millesimum annum perueniret. Adam vixit annis 930. Seth filius eius 912. Enos autem 905. &c. At mille anni, vnus dies ante Dominum est, optimè igitur dictum, etiam vnius diei

us diei horas non posse complecti vitam humanam. Refert Isidorus nasci iuxta fluvium Hipanē, in Græcia animal quoddam paruulum, quod Ephemerum nuncupatur, quatuor habens pedes, & quatuor alas, cuius tantum est vnus diei vita super terram, in qua ambulat, volat, quærit vitæ necessaria, crescit, & denique eadem qua nascitur die, pariter obit. Quis non miretur animalculi huius diligentiam, inquirendo pedibus, & alis alimenta pro vita vnus diei? Si intellectum haberet & nosset, eadem die se vitam cum morte commutaturum, mirum si non diceret, vt quid sollicitudine cibi vexor, qui hodie moriturus sum. Vos quibus est intellectus, filii hominum, vt quid diligitis vanitatem, & quæritis mendacium. Dies vt omnibus notum est, in tres partes diuiditur, videlicet in mane, meridiem, & vespærum. Hoc modo, & vita humana tribus temporum spatiis distinguitur, nempe iuuentute, virili ætate, & senectute. Mane igitur orto sole, auium concentu syluæ resonant, flores, & herbæ cœlesti rore conspersæ, iucundum emittunt odorem, arbores viridantibus indutæ foliis, flore, & fructu augmentantur, deambulationibus per prata & hortos amænos homines occupantur, rem paucis complectar, omnia læta, iucunda, & grata adesse animaduertuntur. Non dispari ratione, dum iuuentutis tenera ætas fauet, homines pulchritudine formæ, & quadam vultus iucunditate florent, choreis, conuiujs, voluptatibus, Iuuenes potissimum deliciarum oblectamentis libentissimè indulgent. proni ad omnem hilaritatem & lætitiā. solutur in o Eccl: 11. *Lætare ergo iuuenis in adolescentia tua, & in bono sit mñe voluntor tuum in diebus iuuentutis tuæ, & ambula in vijs cordis tui, & præcè etsi nō*

*Animal vni
us die spatio
vitam du-
cens, & ea-
dem die mo-
riens.*

*Comparatur
iuuenis cū
mane quod
est principijs
diei.*

*Iuuenes po-
tissimū dis-
solutur in o
volu-
in intuitu sine pœna.*

in intuitu oculorum tuorum, & scito quod pro omnibus his adducet te Deus in iudicium. Ac si diceret. ô peruersi iuuenes, qui florem vitæ vestræ arefcere in æstu libidinum, & feruore voluptatum carnalium finitis, noueritis vos caliginosa mortis nocte appropinquante condignas subituros pcenas. Non abs re Horatius inquit.

*Imberbis iuuenis tandem custode remoto,
Gaudet equis canibusque & aprici gramine campi,
Cereus in vitium flecti, monitoribus asper,
Vtilium tardus prouisor, prodigus æris,
Sublimis, cupidusque & amata relinquere pernix.*

Iob. I.

Et ibant filii eius, & faciebant conuiuium per domos, unusquisque in domo sua. Et mittentes vocabant tres sorores suas, ut comederent, & biberent cum eis. Ecce quomodo & sanctorum filii in iuuentute lætitiæ incumbunt. Lotos herba in Ephrate fluuiio ad ortum solis emergit extra aquam, ac florem patefacit, atque etiam tunc exurgit, ut plane ab aqua absit altè, vespere autem cum flore mergitur, vique in medias noctes totaque abit in altum, ut ne demissa manu possit inueniri. Similiter homo in iuuentute floridus apparet, & aliquando sicut Cedrus Libani multiplicatur, postea ad vitæ vespere deficit. nec amplius inuenitur locus eius. Adhæc Ortus est Sol. Exibit homo ad ortus suum, & ad operationem suam usque ad vespere. Homo enim nascitur ad laborandum sicut avis ad volandum, & ab ipsa infantia sacramento militiæ Christianæ, ad fortiter cum antiquo serpente pugnandum obligatur. Vix Moyses in lucem editus fuerat, & ecce mater eius, sumpsit fiscellam scirpeam, & liniuit eam bitumine, ac pice, posuitq; in cunis infantulum, & exposuit eum in carecto ripæ fluminis stante procul sorore eius, & considerante euentum rei. Sic vbi primum homo

Herba mirabilis in flumine.

Psal. 103.

Exod. 2.

homo natus fuerit in ipso iuuentutis flore, exponitur variis turbationum procellis, hic inde iactandus, quippe homo natus de muliere breui viuens tempore, repletur multis miseriis, & nunquam in vno eodemque statu permanet. Et sicut in meridie æstus vehementissimus, & ardor solis fortissimus viget, sic in virili ætate labores maximi, cum ingenti hominis fatigatione, & sudore vultus eius circa domesticam supellestem. aliasque occupationes difficillimas hominem exagitant. Iacob Patriarcha dum in domo matris suæ iuuenis viueret, summo ab illa amore præuentus lætam agitabat vitam, virili ætate adueniente, quod tempus contrahendo matrimonio deputatum esse nouimus, laboribus sese fatigandum exponit inquires. *Seruiam tibi pro Rachel filia tua minore septem annis. & 31. Die noctuque æstu urgebar & gelu, fugiebatque somnus ab oculis meis, sicque per viginti annos seruiui tibi, quatuordecem pro filialis, & sex pro gregibus tuis.* Homo quoque à Parentibus suis in iuuentute diligenter fouetur, caute portatur, delicate educatur, crescente verò ætate laboribus fatigatur. Accipitres teste B. Ambrosio libro Exameron diligunt pullos suos, quamdiu plumis veltitos non animaduertunt, sed ubi vident eos alarum adiumento volare posse, absque mora de nido eos exturbant, & ad victum sibi propria industria quærendum expellunt. Sic & gallina pullos suos amat, sub regimento alarum suarum fouet, à miluo defendit, & cibum pedibus quæsitum cursitantibus porrigit, postquam verò aliquantisper creuerint, nullam de illis curam habet, sed eos vagari, & victum sibi quærere sinit. Non diuersa hominum conditio, amantur illi in iuuentute sua à Parentibus,

Hb 3

omni-

*Homo natus
statim subiicitur
variis molestiis.*

*In sudore
vultus tui
vesceris pane tuo.*

Gen. 29.

Vesperus
mortem hu-
manā pul-
ebre denotat

Dan. 2.

Simile.

omnique custodia & diligentia educantur, sed dum virilis ætas adest, eos militiæ, laboribus, causis dicendis, aliisque negotiorum occupationibus implicant, monentes eos, ut suis sibi curis provideant. Vesperus quoque mortem humanam per quam optimè denotat. Dum enim vesperus aduenit, claritudo solis desinit suis radiis orbem terrarum illustrare, sed horribili tenebrarum caligine omnia continguntur: sic morte appropinquante, omnis claritudo nominis, splendor familiæ, lumen sapientiæ, unā cum homine extinguitur. Tunc contrita spectantur pariter, ferrum, testa, æs, argentum, & aurum, & redacta quasi in fauilla æstius areæ, quæ rapta sunt vento, nullusque locus inuentus est eis: & sicut lucerna super candelabrum posita, omnia quæ in domo sunt apparent, quæ extincta, præter densissimas tenebras, nihil aliud conspicitur. Sic dum homo huius lucis vsura fruitur, ab omnibus perbelle cernitur, eius opera, eius prudentia, eius fortitudo ob oculos omnium versatur: cum verò mortis falce resectus, è medio sublatus fuerit, nihil aliud nisi cadaver foetidum, liuore & putredine corruptum ostenditur. Ad hæc notum est, dum vesperus tenebras inducens appropinquat, animum dulcis cantus fileat. Deambulationes per prata viridantia, dum noctis caligo adest, homines negligunt, quidamque horror terribilis omnia loca implet: oculi suis deliciis ex aspectu rerum variarum promanantibus priuantur, odoratus sua voluptate, quam in hortis deambulando hauserat spoliatur, alique sensus à sua iucunda delectatione alienantur. Sic veniente morte omnis voluptatum dulcedo tollitur, aures suauissimos

simos musicorum cantus respuunt, gustus cibos etiam exquisitissimos reiicit, oculi visione rerum variarum non amplius delectantur, manus & pedes, cæteraque alia membra, dolore & languore oppressa languent, omnisque lætitia in summam vertitur tristitiam. Reuertebatur olim Iephte in domum suam, ex hostibus ad internecionem deletis, victoriam cum gaudio reportans, occurrit ei filia, futura Deo per manus Patris victima. *Qua visa scidit vestimenta sua & ait. Heu me filia mi decepisti me, & ipsa decepta es, aperui enim os meum ad Dominum, & aliud facere non potero. Cui illa respondit. &c. Dimitte me Pater mi, ut duobus mensibus circumeam montes, & plangam virginitatem meam cum sodalibus meis.* Egressa filia ad salutandum Patrem cum lætitia, & audita mortis memoria, ô qualis subito oritur fletus & tristitia: O quam amarus aduentus lethi. Reuersus Alexander in Babyloniam, multis diebus otio deditus, intermissum olim conuiuium solenniter instituit, totusque in lætitiam fusus cum diei noctem coniunxisset, peruigilem à conuiuiio Medius Tethalus instaurata comessatione, & ipsum & sodales inuitat. Accepto poculo media potione, repente velutitelo Alexander confixus ingemuit, elatus è conuiuiio semianimis, tanto dolore cruciatus est, ut ferum in remedia posceret, tactumque hominum velut vulnera indolesceret. Venit ad conuiuium Alexander lætitia diffluens, omnibusque voluptatibus se suaque membra consecrans, & ecce subitaneus mortis pavor omnia vertit in amaritudinē, & extemplo omnia chara, morte adueniente vertuntur in amara. Præterea nocte adueniente, colorem rerum variarum dignoscere, res est plena difficultatis. Omnia enim

O mors quā
amara est me-
moriam tua.

Justinus lib.

12.

nim quæ oculis obiciuntur, nigredinem quandam induisse animaduertuntur: quippe in die arborum viridantia folia, flores in hortis quidam rubei, quidam vero flauī & violacei visi, in nocte nigrum induunt colorem. Sic morte in hominum corpora suam crudelitatem manifestante, difficile est Dominum a seruo, diuitem a paupere, doctum ab insipiente, conuenienti differentia seiunctum, animaduertere. Pallida mors æquo pede pulsat Regum turres, pauperumque tabernas. Ita Dominus moritur cum dolore sicut & pauper, ita pallore, timore, & terrore afficitur diues in hora mortis, sicut & egenus. Moritur doctus, similiter vt indoctus. Eccl. 2. *Vnus ergo introitus est omnibus ad vitam, et similis exitus.* & S. Amb.

Mors omnia æquat.

Eccl. 2.

Nudi omnes nascimur, nudi morimur, nulla distinctio inter cadavera mortuorum, nisi forte quia grauius facient diuitum corpora, luxuria dislenta. Hinc quidam Philosophus quærenti Alexandro, quid viuus inter sepulchra mortuorum ageret, respondit, ossa se Philippi Regis Macedonum Patris eius diligenter quærere, nec ab aliis ea dignoscere posse; sapientissime admonens, in morte omnes æqualem subire conditionis sortem.

Darii mors Regia dignitate indigna

Refert Iustinus lib. 12. de morte Darii potentissimi Regis Persarum, rem scitu dignissimam in hæc verba: *Vnus ex militibus dum ad fontem proximum pergit, in vehiculo Darium, multis vulneribus confossum, sed spirantem adhuc inuenit &c. quæ ubi Alexandro nunciata sunt, viso corpore defuncti, tam indignam illo fastigio mortem lacrymis prosecutus est. Sed quid mirum? mors enim omnes æquat. In campis sunt varii flores vnus altero pulchrior, iucundior, & odore gratior, sed falce resecti omnes vno modo*

modo arescunt, sic homines alii sunt doctiores, fortiores, ditiores cæteris, sed sicut flores egrediuntur, & conteruntur, & fugiunt velut vmbra, & nunquā in eodem statu permanent, eandem cum reliquis mortis Tyrannidem experientes. In Ægypto consuetudo hæc certè humano generi salutaris seruata fuisse perhibetur, vt cum in conuiujs læti adessent, ne facili negotio in omnem voluptatis luxuriam dissoluerentur, inter cætera fercula, cum maxime genio indulgerent, Caluaria apponeretur, quam manu tenens Paterfamilias viciniore porrigebat, ille verò alteri, & sic vsque ad eum qui vltimum capiebat locum perferretur; his semper verbis additis. Huic similes erimus, memores viuere lethi, ac si dicerent. Nos omnes qui sumus fastigio dignitatum, cæteris præstantiores, doctrinarum variarum cognitione excellentiores, gloria diuitiarum clariore, non alium vitæ statum, quam reliqui homines habebimus morte de medio hominum sublatis. Ingredere si placet hortum, pulcherrimis arboribus confitum, omnes in eo arbores viridantibus folijs indutas spectabis: aderit autumnus, & ecce folia Cypressina, & Amygdalina, sicut & quercina, hic inde per terram æqualiter à vento dissecta aspicias. De homine vtique dicitur. *Contra folium quod vento rapitur ostendis potentiam tuam, & stipulam siccam persequeris, hinc etiam homines sicut folia, in terra positi pedibus uiuentium æqualiter calcantur.* Notandum dum vesperus appropinquat, bestię, & ferę syluestres, lupi, ursi, leones, ex cauernis egrediuntur. Psal. 103. *Posuisti tenebras & facta est nox, in ipsa pertransibunt omnes bestię terrę, sic morte hominis adueniente aduolant teteri*

Salubris Ægyptiorum consuetudo.

Simile.

*Homines re-
cte folijs cõ-
parantur.*

*Senectute
adueniente o
mnia in ho-
mine tepe-
scunt.*

Matt. 20.

Ioan. 9.

rimi dæmones, bestię infernales, quærentes hominem morti proximum deuorare, quæ duro sermone (vt olim S. Martinus fecisse memoratur.) repellendæ sunt. &c. Quid hic statis cruentæ bestię. Addo. Dum vespertus ingruit, calor solaris paulatim tollitur, frigidoque aëre omnia complentur, homines quoque laboribus fatigati, sese cubitum conferunt, vestibis de corpore depositis, omnibusque negotiis in diem crastinum reiectis. Sic veniente suprema senectute, valetudo corrumpitur; quippe senectus ipsa est morbus, calor naturalis extinguatur, & paulo post homines dormiunt somnum suum. & nihil diuitiarum inueniunt in manibus suis. Psal: 29. *Anni nostri sicut aranea meditantur, dies annorum nostrorum in ipsis septuaginta anni, si autem in potentatibus octoginta anni, amplius labor, & dolor.* 3. Reg: ca. 1. *Et Rex David senuerat habebatque ætatis plurimos dies, cumque operiretur vestibis non calefiebat.* &c. Ad extremum cum venit vespertus mercenariis pro labore redditur præmium. sic & hominibus in hora mortis soluuntur actus eorum, siue boni fuerint, siue mali. Matt. 20. *Cum sero factum esset, dixit Dominus vineæ procuratori suo, voca operarios & redde illis mercedem. Dixit Paterfamilias, hoc est Deus Pater, procuratori suo Christo Domino, finito laboris die, vt innueret nobis vitæ nostræ tempus, (hoc enim per diem significatur) laborandi & merendi tempus esse. Venit autem nox, ait Christus. Ioan. 9. quando nemo poterit operari, hoc est tempus mortis, tunc enim tempus est iudicii, vbi mercenariis mercedem laboris reddet, otiosis, & qui non laborauerunt, pœna & cruciatus reddetur: inutilem seruum proiicite in tenebras exteriores.*

quod

quod à vobis auertere dignetur, qui sine fine regnat
cum Patre, & Sancto Spiritu. Christus IESVS
futurus Iudex omnium, cui laus & glo-
ria, sine fine.

AMEN.

SECUNDA ORATIO ECCLESIASTICA

In eadem Dominica.

Pvlcherrimæ causæ redduntur, quare postremi *Summa Con-*
cum primis æquale sumpserunt præmium. *cionis.*

SEptem rationibus viri doctissimi probant, ani-
mas Sanctorum post obitum frui Dei visione;
quarum prima hæc est. Deus non est pronior ad
punendum, quam ad remunerandum. Quare cum
impii iam nunc in tormentis sint, Luc: 16. *Dives autem*
cum in tormentis esset. &c. æquum certè videtur, vt eti-
am iusti præmia sua percipiant. Secunda ratio. To-
ta Ecclesia inuocat Sanctos post Christi aduentum:
cum tamen ante Christi aduentum non legatur id
fieri solitum esse. At si Sancti essent etiam nunc sub
terra in sinu Abraham, non differentem statum à statu
Sanctorum Testamenti veteris haberent. Tertia ra- *Belarm: de*
tio. Ante Christi aduentum Sanctorum mors desle- *Sancti bea-*
batur, at post Christi aduentum summa cum lætitia *tinuameli.*

celebramus dies mortis Sanctorum. Quare hoc? nisi quia tunc mori miseria erat, nunc est felicitatis initium. Quarta ratio ex visionibus eorum, qui viderunt animas alias in inferno, alias in purgatorio, alias in paradiso. Vide Speculum Exemplorum, de cœlesti gloria. Quinta ratio. Si meritum vitæ æternæ sancti non habent, nunquā habebunt, quia post finem vitæ non est locus novis meritis, & nullum est impedimentum, quo minus vitam æternam nunc habere possint, cum cœlum antea clausum nunc pateat. Sexta. Prou. 3. *Spes quæ differtur affligit animam*, at non conuenit, vt ii affligantur, qui nullum habent peccatum. Septima ratio. Deus Leuit: 19. scribi iussit. *Non morabitur apud te opus mercenarii tui, vsque ad mane*, ergo ne Deus contrarius sibi ipsi videatur, non retinebit mercedem Sanctorum, vsque ad mundi consumationem. Quod idem in hodierna sacri Euangelii lectione insinuasse colligitur, qui finito die, mercedem operariis reddi imperat. Sed hoc satis mirari nequeo, cur postremis, æquale cum primis præmium tribuitur? Causas quarum ergo id factum est referam, beneuolas præbete aures.

Leu. 9.

Quam quisque legem tulit, eam et ipse ferat necesse est.

AUE MARIA

1.

Primam causam, cur postremi cum primis æquale sumperunt præmium, eam esse inuenio Auditores, quia illi primi non confestim ad imperium Patris familias, sese ad vineæ labores subeundos contulerunt, sed multa colloquia de pretio laboris cum illo communicauerunt, dicente Euang: *Conuentione autem facta*. At hi postremi nullam mentionem præmii facientes, ad nutum Patris familias ad vineam iuerunt,

Prima causa cur postremi æqualem sumperunt mercedem.

runt, & celeri motu manus labori admouerunt, solis verbis imperantis contenti, & gratiæ eius confisi. Attendite. Sunt perquam multi, qui adseruendum Deo, & renunciandum diabolo, sese vix multis illisque vehementibus concionibus, exhortationibus, variisque admonitionum stimulis induci & attrahipatiuntur, qui rectè assimiliantur Crocodilo, *Crocodilus non curat in eius lapidum* cui tanta durtia est, vt quamuis fortium lapidum ictus in tergo recipiat, nihil curet, sic plurimi corda sua non emolliunt ad duras increpationes diuinas. Talis olim fuit Pharaos Ægyptiorum Rex, qui verbo & signis per Moysen editis moueri non potuit, vt populum dimitteret, atque verum Deum, ex eius mirabilibus operibus agnosceret: atque ideo pertinaciter, ipsum iam abeuntem insequens, in mari rubro cum suis periit. Ezechiel quoque ad populum Israeliticum missus, vt verbum Domini ei annuntiaret, verum illud audire domus Israel renuit, quippe quæ attrita fuerit fronte & duro corde. Multi igitur sunt qui callos obducunt diuinis vocibus, nec minus commouentur, sed semper in aliud tempus pœnitentiam differunt dicentes: Dominus benignus & misericors est, & præstabilis super malitia. *Viri Ninivæ* (ait Christus Dominus) *surgent in iudicio*, & damnabunt hos peccatores, quia mox vt audierunt prædicationem Ionæ, sine vlla mora, sine vlla cunctatione, se pœnitentiæ dederunt, possent enim dicere: Adhuc quadraginta nobis dies sunt, in quibus non subuertetur Ninive, possumus triginta nouem diebus luxui indulgere, & voluptatibus vacare, & vltimo die pœnitentiæ operam dabimus, Deus enim patiens & longanimis est, & multæ misericordiæ, &

li. 3. quacumq;

Exo. 15.

Ezech. 3.

Matt. 12.

Salubre fuit
consilium
Nimirum.

quacunque die peccator ingemuerit peccata, ignoscet illi, & ad suam amicitiam restituet, illi autem vt viri sapientes noluerunt in re tanti ponderis & momenti, moram interponere, sed mox vt audierunt prædicationem Ionæ pœnitentiam egerunt. Audietis iniqui peccatores verba illa Prouerbiorum i. per Spiritum Sanctum prolata, tempore suo contra vos prolata. *Vocati & renuistis, extendi manum meam, & non fuit qui aspiceret. Despexistis omne consilium meum, & increpationes meas neglexistis. Ego quoque in interitu vestro videbo. Tunc innocabunt me, & non exaudiam.* Qui verò nulla interposita mora, semel à Christo vocati, sese eius voluntati explendæ subiiciunt, maximis cumulantur meritorum gratiis; quippe qui cito dat bis dat, & qui hodie audit vocem Domini, & non obdurat cor suum, sed sicut Dauid voce Nathan Prophetæ excitatus, à peccatis resurgit, merebitur illam desiderabilem vocem audire, *transiit Dominus peccatum tuum.* Hinc tales homines, assimilantur crucibus. Debent enim diuinæ voci obedire velociter. & hoc significat crura, quæ à currendo sunt dicta: quia per ea currimus & egressum facimus, vt significetur obediendi velocitas, iuxta illud. *Velociter currit sermo eius,* tunc enim sermo Dei currit velociter, quando ab homine obediente impletur celeriter. S. Ber. in lib. de Præcep: & dispen: Verus obediens non procrastinat, sed statim parat aures auditui: linguam voci: pedes itineri: manus operi: & se totum intus colligit, vt mandatum expleat imperantis. Adhæc tenetur homo Christianus voci diuinæ obedire fortiter, ne videlicet facili negotio retrahatur ex operis difficultate, & hanc fortitudinem significant crura: quæ habent ossa fortia, & etiam sunt nervosa, vt
ad mo-

Obedientiæ,
vera signū
celeriter ex-
plere māda-
tum imperan-
tis.

ad motum sint habiliora. Sic Christiani ad obediendum voci diuinæ debent esse fortes, ad exequendum & tolerandum grauiā, nullaue illis obstacula admittenda, quominus diuinis præceptis satisfaciant, si quidem Deus adiutor est, ad omnia impedimenta tollenda. Olim populus Israeliticus mandato Dei in terram promissionis proficiscens, multis impedimentis præpediebatur, sed cuncta illa impedimenta facile Deus expediuit. nam Deus mare diuisit, & iter illis aptissimum fecit, & super inimicos eorum reduxit aquas maris, & cum illis post transitum maris panis deficeret, pluit illis manna de cælo, panem Angelorum manducauerunt, eduxit etiam aquam de petra, & de petra melle saturauit eos. Iordanis quoque conuersus est retrorsum. Nonne vides quot quantaue impedimenta contra pergentes in terram promissionis militabant? sed tamen Dominus adiuuit eos, & abstulit potentia sua obstacula cuncta. Tandem debent obedire voci diuinæ homines Christiani dulciter, quod significant crura: quorum ossa medulla sunt plena: vt medullæ humectatione ossium siccitas irrigetur. Hæc ergo medulla est interior deuotio, qua irrigati interius veri obedientes, omnia dulciter & sine murmure exequuntur: quia non obediunt timore sed amore, vt inquit S. Gre: 12. Moral: *Obedientia non seruili metu, sed charitatis affectu seruanda est: non timore pænæ, sed amore iustitiæ.* Beatus Antonius Abbas, parentibus è præsentī vita sublatis, annorum circiter decem & octo seu viginti, cum sorore admodum paruula derelictus, & domus & sororis honestam curam gerebat. In hac itaque pia sollicitudine & cura, sexto iam mense constitutus, cœpit ardentiori

*Obediendum
est Deo cum
quadam in-
terna dulce-
dine deuotio-
nis.*

*In vita eius
per Athanas.
Episc. Alex.
conscripta.*

*Sacri Euan-
gelii in bono
rum animis
efficacia.*

*Altera cau-
sa congruē-
tissima.*

tiori mentis studio recolere Apostolicæ vitæ puritatem, quomodo spretis mundi opibus, & honoribus, in extrema rerum omnium inopia, se totos ad Christi disciplinam adiunxissent, atque spem omnem excelso animo in cœlis reposuissent. Hæc aliaque assidua mente pertractans, cum Ecclesiam ingressus, locum illum Euangelii quo Dominus diuitem compellauerat, si perfectæ vitæ rationem assequi vellet, omnia diuenderet, & pauperibus distribueret, atque pro iis sempiternum in cœlis thesaurum reconditum inueniret, legi audisset: protinus bonam facultatum suarum, quas habebat amplissimas, partem distraxit, paucis admodum in usus sororis, quæ & sexu, & ætate videbatur infirmior, reseruatis. Alio dein tempore, religiosa animi pietate Ecclesiam frequētans, cum alium Euangelii locum, quo Dominus nihil nos de crastino sollicitos esse iubet audisset, reliqua bonorum portione pauperibus distributa, omnibus se terrenarum cupiditatum vinculis soluit, & sororem sacris Christo virginibus commendauit, ipse verò arduum asperumque vitæ institutum arripuit. O admirabilem obedientiam ad explendum mandatum Dei: o stupendam promptitudinem ad sonitum vocis diuinæ, o verè imitandam celeritatem in exequenda diuina voluntate. Quoniam igitur hi nouissimi operarii, nullo præmisso contractu de pretio sibi tribuendo, libenter audita voce Patrisfamilias ad vineam eius venire non distulerunt, æquum & dignum erat, ut æquale cum primis præmium assequerentur. *Altera ratio est.* Primi illi ea intentione, in vinea Patrisfamilias, laboribus suos humeros supponere voluerunt, ut sole ad occasum sese

se se inclinante, grossum, mercedem debitam acciperent, at nouissimi postposito omni pretio, nec propter mercedis beneficium, sed propter Patrisfamilias voluntatem & imperium, vineam ad laborandum in ea ingressi sunt. Sunt per quam multi, qui à peccatis se abstinere, diuinas leges & præcepta custodiunt, in operibus bonis se exercent, sed nullam aliam ob causam, quam quod Deus pro his pretium eis annumeret, vel terrenarum vel cœlestium opum iuxta illam Davidis sententiam. *Inclinaui cor meum ad* Psal: 118. *faciendas iustificaciones, propter retributionem.* Alios autem videre licet, qui Deo adhærent eumque amant propter seipsum, qui amor à Theologis amor amicitiae *Amor amicitiae quomodo intelligatur.* nuncupatur, hoc est sicut verus amicus amat amicum suum, propter ipsummet amicum, amans v. g. diuitias eius, non sibi, sed ipsi amico, & sanitatem, & prosperitatem, & sapientiam & virtutes, non quatenus inde sibi aliquod bonum prouenire possit, sed quatenus sunt bona amici, vt sibi velimus hæc eum habere, non vt sibi his prodesse possit amicus, sed vt ipse amicus his bonis abundet. Sic & nos amare debemus Deum, vt scilicet absolutè, velimus eum esse omnipotentem, omniscientem, æternum, infinitum, summè bonum, summè gloriosum. Vnde ratione affectiua & vnitiua dicere debemus Deo. Gaudes Domine mi, te Omnipotentem esse, infinitamque habere sapientiam, bonitatem, & cætera attributa, *Deus propter se amans.* habeto illa Deus meus in æternum. &c. Ludouicus Vndecimus Galliarum Rex, Delphinus adhuc existens, cum non infrequenter venationi operam daret, ruri (vt solent syluas, & nemora peragrarare venatores) plerumque diuersabatur in humili casa rustici *Historia sci- tu dignissima.* cuius-

cuiusdam, cui nomen *Canon*, quo cum rapas non semel Ludouicus in cœna sibi ab eo datas comedisset: factus postea Rex, rusticus ab vxore monetur, vt Regem adeat cum bona spe, quid muneris ab eo accipiendi. Acquiescit vxoris consilio, & vna confert repas sui agelli præstantiores, Regi dono daturus, quas tamen nec omnes detulit, pressus in itinere fame, qua factum vt omnes absumeret, vna eaq; grandiuscula excepta. Simul atq; ergo ad curiã venit, agnitus à Rege, iussusq; propius accedere, e vestigio rapã suã hilari vultu, Regi porrigit, quã ambabus Rex manibus, lætaq; frõte accipit, recõditq; quo pretiosissimas quasq; res. Interea prandio bene exceptum, missum illum facit, 1000 aureis remuneratum, quod cum ab aulico quodam notatum esset, credēs bonus vir Regis liberalitatem vniusmodi esse, atq; tantumdem se acceptum, si quid ei donaret, equum offert miræ alioquin elegantia: quo accepto secum cogitauit Rex, quid pro illo munere redderet; tandem producit rapam probe inuolutam & aulico donat, quo abire iussu, domum petit, qui non prius aduenit, quam rem datam (thesaurum esse credens) explicat vbi nihil aliud quam rapam, contra quam existimabat inuenit. Queritur ergo apud Regem quasi per errorem is lapsus esset, rem vnã pro alia sumendo; cui Rex: profecto bene tuus equus à me emprus est, præmio & munere tibi dato, quod mille aureis mihi constitit atque ita elusum dimisit: sapientissimè insinuans, donum eius quia propter retributionem sibi oblatum fuerat, digniori remuneratione non fuisse compensandum. Non enim ille aulicus Regem honorabat, sed aurum exquirebat, nec Regem,

gem, sed thesaurum Regis desiderabat: Simili ratione Deus Omnipotens intuetur cor, & non sacrificium, sed causam & intentionem sacrificii oblatis considerat. Si igitur oculus tuus simplex fuerit, totum corpus tuum lucidum erit, si propter solum Deum eiusque gloriam omnia aggredi tentaueris, absque dubio æternum in cœlis præmium consequeris.

Tertiaratio. Voluit Christus Dominus hominum mentibus inculcare, sibi id vel maximè cordi esse: Non quam diu sed quam benè. Maiori enim laude miles dignus esse censetur, qui semel in aciem progressus hostem fortiter vicit, & terga vertere compulit, prædam diripuit, castraque igne solo æquavit, quam ille qui toto decennio in castris otiosus delituit. Hoc modo melior est apud Deum ille Christianus, qui peccatis omnibus de corde suo in æternum exilium expulsi, & cœlestibus armis fulgens, in arenam descendit, mundo, carni, diabolo, resistit, orationibus, ieiuniis, vigiliis, ciliciis, aliisque spiritualibus exercitiis inhærendo, quam ille qui in via quidem iustitiæ stat, sed contentus eo, quod mortali careat vitio, de virtute in virtutem procedere negligit. Quod Deus omnipotens manifestum facere desiderans, multis exemplis, post vana crimina perpetrata susceptam feruenti animo pœnitentiam sibi vehementer placuisse demonstravit. Vnum atque alterum in medium afferre placet. S. Bonaventura in vita B. Francisci refert, militem quendam supplicium deuotione, ad S. Franciscum accessisse, & eum cum instantia magna inuitasse ad prandium. Venit itaq; Sanctus vir ad militis domum. Ante verò quàm cibum sumerent, iuxta solitum morem, vir mente

*Non virtus
sed causa
virtutis a-
pud Deū est
meritoria
gratia eius.*

Kk 2.

deuotus.

*Hospes Sancti
Francisci
admonitione
eius ad pœni-
tentiam &
cōfessionem
inductus, in
mensa sub-
ito spiritū ex-
halauit,*

*Merces ho-
spitalitatis.*

deuotus, offerens Deo preces & laudes, oculis sta-
bat eleuatis in cœlum. Oratione completa, beni-
gnum hospitem familiariter aduocatum, sic allocu-
tus est. Ecce frater hospes tuis viſtus precibus, vt
manducarem domum tuam intraui, meis nunc cito
monitis acquiesce, quoniam non hic, sed alibi man-
ducabis: confitere nunc peccata tua, veræ pœni-
tentia dolore contritus, nec in te remaneat quid-
quam, quod veridica confessione non pandas. Red-
det tibi Dominus hodie vicem, quoniam tanta de-
uotione suos pauperes suscepisti. Acquieuit conti-
nuo vir ille sermonibus Sancti, socioque ipsius vni-
uersa peccata, in confessione detegens disposuit do-
mum suam, & ad mortem suscipiendam se, quantum
voluit præparauit. Intrauerunt tandem ad mensam,
& incipientibus aliis manducare, hospes subito spi-
ritum exhalauit, iuxta verbum hominis Dei repen-
tina morte sublatus, sicque factum est hospitalitatis
gratia promerente, vt iuxta verbum veritatis. Pro-
phetam recipiens, mercedem Prophetæ acciperet,
dum per sancti viri prænunciationem prouidit, qua-
tenus armis pœnitentiæ præmunitus perpetuam da-
mnationem euaderet, & in æterna tabernacula in-
traret. Hic miles breui tempore in vinea Domini
laborauit, sed Deus Omnipotens non aduertit quā
diu, sed quā bene, nouissimus fuit, & sine dubio
præmium cum primis accepit, quod nobis lar-
gire dignetur, qui sine fine viuunt &
regnat. A M E N.

ORATIO

ORATIO ECCLESIASTICA

In Dominica Sexagesimæ.

Quod autem in spinas cecidit, hi sunt, qui audierunt, & à sollicitudinibus, & diuinis, & voluptatibus viâ suffocantur. Luc: 8.

Diuicias, voluptates, aliaque mundi bona, esse *Summa Con-*
spinas pulcherimo discursu ostenditur. *cisionis.*

Verbi Diuini præcones, hominum animos, à vanis voluptatum illecebris auocare desiderantes, variis rationum argumentis, ad id feliciter præstandum, vti consueuerunt, Auditores in Christo dilecti. Quidam testimoniis Sacræ scripturæ hic inde collectis, vehementem terrorem hominibus voluptuosis incutiunt: minacem illam Christi sententiam auribus eorum inculcantes: Væ vobis qui consolationes vestras habetis. Alii vero exemplis eorum, quibus malo voluptates, cæteraque bona mundi steterunt, homines abstrahere, ab earum pellita iucunditate nituntur. Salomonem virum tantum & tantum, ab indomita & prohibita libidine in idolatriam prolapsum fuisse, Dauidemque commisso adulterio in eadem Vriæ cecidisse clamitantes. Plerique ob oculos ponunt præclaræ indolis iuuenes, qui semper summo odio persecuti sunt vanas voluptatum dulcedines. Qualis fuisse Spurina Romanus

3. Reg. 11.
1. Reg. 12.

Kk 3 narratur,

*Sunt verba
Valerii.*

narratur, miræ adolescens pulchritudinis, qui cum eximia specie, complurium faminarum illustrium sollicitaret oculos, ideoque viris ac parentibus earum se suspectum sentiret, oris decorem vulneribus confudit, deformitatemque, sanctitatis suæ fidem, quam formam irritamentum alienæ libidinis esse maluit. Mirum profectò castæ mentis argumentum. Ego quoque ad eundem, sagittam dirigo scopum, corda vestra ab omni foedissima voluptatum libidine procul abesse desiderans, relictis supra enumeratis ad id efficiendum mediis nouum quoddam remedium subiiciam, nempe voluptates, diuitias aliaque mundi bona, spinas esse declarabo.

AVE MARIA

Gen: 3.

*Terra quid-
quid ex se
generat, il-
lud totum
spinæ sunt.*

GEN: 3. Dixit Deus ad Adam: *Quia audisti vocem uxoris tuæ, & comediſti de ligno, ex quo præceperam tibi ne comederes, maledicta terra in opere tuo, in laboribus comedes ex ea cunctis diebus vita tuæ, spinas & tribulos germinabit tibi.* Quo in loco manifestè Dominus loquitur, terram nihil aliud omni ætate, ex visceribus suis edituram, nisi spinas, & tribulos, &c. attamen habet argentum venarum suarum principium, & aurum locum in quo conflatur in visceribus terræ, arbores quoque dulcissimos fructus proferentes è terra prodire spectamus, &c. vno verbo, quidquid in terra est, omne illud ex terra originem trahit, quomodo igitur terra spinas germinare dicitur, cum sit fertilis mater, & procreatrix auri & argenti, gemmarum, pretiosorumque lapidum? An fortassis aurum & argentum, lapidesque pretiosos, nomine spinarum appellandos dixerimus

dixerimus? ita oportere fieri absque dubio respon-
 deo, nam si omnia bona terræ spinæ non essent ver-
 ba Dei (quæ cœlis & terra transeuntibus illa non
 transibunt) falsitatis notæ obnoxia dicerentur, quæ
 manifestè sonant, humano generi, in pœnam nihil
 aliud de terra, nisi spinas & tribulos producendos.
 Ergo omnes diuitiæ aurum & argentum, lapides
 pretiosi, voluptatum illecebræ, libidinum deliciæ,
 aliaque mundanæ consolationes. spinas esse sit ne-
 cesse. Et hoc ipsum ex proprietatibus spinarum
 perbelle intelligere poteritis. Prima proprietas spi-
 narum est, quia spinæ sunt plantæ, seu virgulta in-
 fructuosa, fructus earum videntur esse vix pulcher-
 rimæ, eos si comederis subito tibi obstupescant den-
 tes. Voluptatum & diuitiarum fructus esse vilissi-
 mos & nullius utilitatis patet. Nam hæ suffocant se-
 men verbi Dei, & hoc propter tria. 1. Quia humo-
 rem terræ exhauriunt, vt nihil suppetat semini, sic
 diuitiæ & voluptates, benedictionis diuinæ imbrem
 tollunt. Dicitur enim Matt. 5. *Beati pauperes spiritu quoni-
 am illorum est regnum cœlorum.* Ergo contrarium verum
 est. Maledicti diuites, quoniam ipsi regno cœlo-
 rum priuabuntur. Luc. 6. *Væ vobis diuitibus qui habetis
 consolationes vestras, facilius est camelum per foramen acus transire
 quam diuitem intrare in regnum cœlorum.* 2. Solem & imbrē
 excludunt. Similiter voluptates & diuitiæ, Chri-
 stum Dominum qui est verus sol iustitiæ, ne gratiæ
 diuinæ fulgentibus radiis corda illustret humana,
 impediunt. Hic enim Dominus ab omni diuitiarum,
 & voluptatum consolationibus, sicut nos a serpenti-
 no morfu, abhorret, & vt hominibus sibi earum v-
 sum displicere manifestaret, cum in forma Dei esset, sei-
 psam

*Verba Dei
 semper ma-
 nent nec mu-
 tari possunt.*

*Fructus vo-
 luptatum
 inutiles.*

*Christus Do-
 minus o for
 voluptatum
 & diuitiarū*

- psum exinanivit formam serui accipiens in similitudinem hominum.
2. Cor: 8. factus, & habitu in uentus ut homo. Solem inquam diuitiæ
 & voluptates excludunt, nam gratiam diuinam lu-
 cere in mentibus humanis non permittunt diuites.
Ad Tim: 6 enim plenumque superbos assument spiritus dicen-
 te Sancto Paulo. ad Tim. 6. Diuitibus huius sæculi præ-
 cipe, non sublime sapere, neque sperare in incerto diuitiarum.
 Superbi vero gratia diuina semper indigni esse sa-
 cræ scripturæ testimonio conuincuntur. Deus su-
 perbi resistit, humilibus autem dat gratiam suam. 3. Crescen-
 tes à terra aristas impediunt, sic diuitiæ & volu-
 ptates, bona proposita extinguunt, ne homo ea
 perficiat, & exhibent se fortissima virtutum im-
 pedimenta. S. Hieronimus: ad Paul. Epistola 13. Crates ille
 Tebanus quondam ditissimus, cum ad philosophandum Athenas per-
 simul cum uir geret, magnum auri pondus abiecit, nec putauit se simul diuitias &
 virtutibus esse virtutes posse possidere. Elias S. Propheta Domini demisit
 non possunt. pallium: Et Ioseph relicto in manu dominæ pallio
 fugit, & egressus est foras, qui igitur vult cælum as-
 sequi, deponat sarcinas diuitiarum, & qui vincendi
 tentationes, & obtinendi virtutes desiderio æstuat,
 voluptates huius mundi & diuitias, in manibus lu-
 ius sæculi relinquendas esse, omnino sibi persuadeat.
 Ratio autem est quare diuitiæ & voluptates tollunt
 virtutes, quia captiuant cor hominis ad amorem su-
 um. Carnalis enim homo & libidini deditus, non ha-
 bet cor quod suum sit: quia est concubinæ ac mere-
 tricis: ideoque dicere solet, illa mihi cor meum ab-
 stulit. Vnde Dauid Rex cum in illicitum alienæ vx-
 oris amorem exarsisset, atque adulterio perpetrato
 errorem suum agnouisset, dolens de lapsu suo dice-
 bat: **Psalm: 38.** Et cor meum dereliquit me. Gulosus non habet cor
 quod

quod suum sit, quia crapulis, & ebrietatibus immer-
sum est. Vnde Oseas: *Fornicatio, vinum & ebrietas auferunt*
cor. Auarus non habet cor quod suum sit, quia mer-
cibus & scrinio, in quo thesauros auri & argenti cō-
feruat inclusum est, nam verissime à Christo Domino
dictum est. *Vbi est thesaurus tuus, ibi & cor tuum.* Vnde S.
Antonius de Padua, vir Prophetico spiritu ple-
nus, in concione funebri, pro vsurario habita, ait:
Mortuus est diues, & sepultus in inferno. Itē ad the-
saurum eius, & in illius medio inuenietis cor
eius. Corpore iam humato, abierunt parentes, & a-
mici, & cor adhuc calidum inter nummos inuene-
runt. Simile huic exemplum refert, Prosp. in libro
de dono timoris. Auarus quispiam pecuniæ amantif-
simus, postquam plurimas diuitias congregasset, &
de iis nihil pauperibus vnquam dispersisset, aut aliis
pietatis officiis impendisset, subita morte raptus est,
Cadauere autem eius, à parentibus & amicis præsen-
tibus aperto, vt ab iis dispiceretur, quænam tam re-
pentinæ mortis causa fuisset, cor in eo non fuit in-
uentum. Vnde admiratione rapti singuli, adierunt
ad mortui cubiculum vbi thesaurus eius erat, atque
cista aperta cor hominis inueniunt, inter manus dæ-
monis, qui instar draconis super hoc sedebat, atque
in varias partes discerpebat: dixitque astantibus.
Hoc aurum & argentum pretium est cordis, quod
mihi vendidit amicus vester, ideoque iure meum est
eoque pro arbitrio vti possum. Est genus quoddam
spinosa plantæ quod ferunt in Cæo, teste Aristotele,
cuius spinis si quis percutitur, moritur: eodem mo-
do, qui diuitiarum & voluptatum delectatione in
corde vulneratur, Deo moritur, & ad virtutes am-
plecten-

Osc. 4.

Matt. 6.

*Cor auaritiæ
dicatum fit
præda diabo-
li.*

*Arist: lib: de
Admir: ca-*

139.

plectendas omnino inhabilis redditur. Testatur Strabo lib: 15. vidisse se plantam lauro persimilem, quam gustantes belluæ abalienatæ, quasi Herculeo morbo concidunt ore spumantes: sic homines propter diuitiarum & voluptatum gustum, fiunt sicut equus & mulus, quibus non est intellectus, nihil de anima rationali solliciti, sed sicut bruta animalia de his tantum quæ corpori nutriendo conducunt curam adhibentes. In Hispaniola insula arbor est, cuius fructus pyris muscatis persimilis est, iucundo odore vsui quoque gratissimus, verum pestiferi succi. Nam Indi illo sagittas obliniunt, veluti veneno. Mirum aliud si quis sub ea obdormierit, breui temporis momento, grassante vi capitis dolorem persentit, intumescantibus oculis, superciliis, atque ipsis etiam maxillis, quin si ros, ipsa ab arbore in faciem hominis illabatur, aut obcæcat, aut multo dolore torquet, vredineque ipsam etiam cutim vlcerat: si huiusmodi lignum comburatur, nemini tutum est illo igne calefieri, illico enim capitis dolorem gignit, ab illo etiam igne omnia animantia abstinent. Non diuersi fructus de palmitibus voluptatum, & diuitiarum prodire animaduertimus. Sunt enim veneno perniciosissimo infectæ, quo sagittas suas terribili dæmones inficientes, animas humanas lethali plaga vulnerant, videlicet ardore habendi, libidine dominandi, arrogantia sese cæteris præferendi, gignunt etiam capitis dolorem, cum vehementi metu eas amittendi, hominem exagitant. Insuper cæcitate animas hominum percutiunt, quippe carnalis homo, non videt nec cognoscit, in voluptatibus & diuitiis pœnam æternam, & malum sine fine.

*Ouetus hi-
sto. lib. 9. c.
12.*

*Perniciosi
fructus vo-
luptatum.*

fine pallio iucunditatis coopertum. Ignis quoque
 huius spinosæ plantæ (intellige summum desiderii-
 um augmentandi bona temporalia) vehementer ca-
 piti, & sanitati corporeæ, multo magis spiritali of-
 ficat, multaque nocumenta affert. Adhæc spina do-
 lorem creat dum infigitur, & cum infixæ manet, &
 cum extrahitur, sic diuitiæ & voluptates magno la-
 bore & sollicitudine acquiruntur, in timore possi-
 dentur, cum dolore amittuntur. 1. Acquiruntur
 cum labore, quia nulli de cœlo assa columba venit,
 diique laboribus omnia vendunt. Pro. 6. *Anima la-* Prou. 6.
borantis laborat sibi compulit enim eum os suum, & Eccl: 5. *Cum-* Eccl: 5.
etis diebus vitæ suæ comedit in tenebris, & in curis multis, & in æ-
rumna, & in tristitia. Quære ex Mercatore, quare par-
 ce somno indulgeat? æstus solis, & molestiam frigo-
 ris sustineat? cur tam longa itinera peragrarè au-
 deat? tempestates ingruentes, aliasque itineris diffi-
 cultates libenter subire præsumat? sine mora respon-
 debit, vt acquisitis diuitiis, tandem cum voluptate
 illis perfruatur. Quære ex agricola cur summo ma-
 ne in agrum exeat? quare solis ardoribus sese expo-
 nat? respondebit vt latus segetes possideat, & ex
 illis possessis voluptatem aliquam percipiat. O quã-
 to cum labore veniunt bona mundi. 2. In possiden-
 do timore. Timet enim diues ne thesaurum suum fur
 auferat, ignis consumat, aut casus aliquis perdat.
 Sigismundo Cæsari allata erant ex Hungaria aureo-
 rum quadraginta millia, cum autem aduersperasset,
 eaque in thalamo Regio recondita fuissent, in cubi-
 culum veniens Cæsar, dum cogitat in quemnâ vsum
 eam pecuniam conuertat, somnus eum destituit.
 Tum ille excitatis cubiculariis: Ite, inquit, ocyus
 L1 2 Consi-

Aeneas Syl-
uius lib: 5.
Com: in res.
gest. Alphon.

Consiliarios, Ducesque omnes militum huc accersite, vocati Proceres media nocte trepidi (timebant enim ne quid aduersi accidisset) Imperatorem celeriter adeunt, & quæ causæ sint tam repentinae vocationis inquirunt, Imperator confestim aperta arca, inter eos qui aduenerant pecunia distributa, Ite, inquit, vt securè tranquilleque nobis dormire liceat; nam quod mihi somnum ademerat, iam procul aberit à cubiculo. De voluptatibus idè esto iudicium. Quidam conspecto alueo, intra quem apes acquiescerent, accessit & aperuit illum auidus mellis, tum in ipsum apes facto impetu inuolant, & quæcunque partes in corpore patebant, eas configunt aculeis suis: hic verò pessimè acceptus vix fuga se eripuit, & periculum euasit. Quem conspicatus alius quod esset ore tumido, & vlcerato, causam mali sciscitatur, hic verò quæ sibi accidissent narrat, tum ille: semper, inquit, in alueo cum melle apes manere noueris, docens voluptates cuiuscunque generis sint, cum dolore esse permixtas. Eccles: 2. Et dixi in corde meo. Vadam & affluam deliciis, & fruam bonis, & vidi quod hoc quoque esset vanitas & afflictio spiritus. de diuitiis vero dicitur Eccl. 5. Dulcis est somnus operanti siue parum siue multum comedat, saturitas autem diuitis non sinit eum dormire. Eccl: 5. 3. Dolor in amittendo, Eccl. 5. Auarus non implebitur pecuniis, & qui amat diuitias fructum non capiet ex eis; &c. pereunt enim in afflictione pessima. Videre enim licet, cum diuitias fur aufert, vel ignis comburit, vel tinea demolitur, diuites lamentationibus & clamorosis vocibus omnia loca implere, amare flere, crines capitis euellere, pugnis faciem suam cedere, alios vero seipso suspendio necare, violentas manus sibi inferre, aquis suffo-

suffocare, de montibus præcipites cadere. Verè diuitiæ pereunt in afflictione pessima. Ingens enim dolor corda diuitum excruciat, cum ea quæ cum maximo labore congregauit relinquenda esse animaduertet. Psal: 43. *Ne timueris, cum diues factus fuerit homo, & cum multiplicata fuerit gloria domus eius, quoniam cum interierit, non sumet secum omnia, neque descendet cum eo gloria eius.* Magna inquam tristitia orietur diuitibus ex hoc mundo discessuris, cum viderint suas facultates in alienas manus venturas. quippe: *Relinquet alienis diuitias suas.* Iob 21. *Diues cum dormierit nihil secum auferet, aperiet oculos suos & nihil inueniet.* Verè ergo diuitiæ pereunt in amaritudine pessima. Omors quam amara est memoria tua homini bene habenti in substantia sua. Præterea spinæ sunt vestium laceratiæ, sic diuitiæ lacerant interiores vestes virtutum. Vnde Greg: in hom: 20. super illud Exiit. *Diuitiæ spinæ sunt, quæ cogitationum suarum punctiõibus, mentem humanam lacerant, & cum usque ad peccatum pertrahunt, quasi inflicto vulnere cruentant.* Insuper spinæ sunt latibula venenatorum animalium, sic vbi magnæ opes, ibi fastus, ambitio, luxus, gula, commellationes, ebrietates, fornicationes, &c. I. Tim: 6. *Qui volunt diuites fieri, incidunt in tentationem & in laqueum diaboli, & desideria multa inutilia, quæ mergunt homines in interitum & perditionem.* Addo. Spinæ sunt ignis incensiuæ, sic & diuitiæ sunt nutrimentum cupiditatis, in præsentibus, & incendium inextinguibile in futuro. Baruch 3. *Vbi sunt qui argentum thesaurizant, & aurum in quo confidunt homines, exterminati sunt, & ad inferos descenderunt.* Voluptates quoque non diuersam sumpturæ sunt mercedem, s. Iob attestante: *Tenent tympanum & cytharam, gaudent ad sonitum organi, ducunt in bonis dies suos, & in puncto ad infernum descendunt.*

Psal: 43.

Iob 27.

Greg: hom: 20. super illud. Exiit.

Exarserunt sicut ignis in spinis.

Iob 2.

Conclusio.

descendunt. Apoc: 13. *Quantum glorificavit se, & in deliciis fuit, tantum date illi tormentum & luctum.* Vidistis itaque auditores, diuitias & voluptates nihil aliud nisi spinas esse. Nō igitur amplius illarum illecebris capi vos & decipi patiamini, sed thesaurizate vobis thesauros in cœlis, vbi non ærugo corrumpit, non fur aufert, non tinea demolitur, sed omnia in æternum durant, & in æuum. Quæ enim utilitas in spinis? qui fructus ex tam abiectis plantis expectandi? nisi tribulationes, dolores, animi afflictiones? Cœlestia ergo potius, & non terrena bona quærite, vbi vobis in æternum manendum est, hic autem estis hospites vnius diei. Quibus bonis vt aliquando gaudeamus præstet hoc nobis adoranda Trinitas, cui
 laus & glōria sine fine.

A M E N.

SECUNDA ORATIO ECCLESIASTICA

*In eadem Dominica.**Aliud cecidit in petram.**Summa Con-
cionis.*

Verbum Dei nihil prodesse obstinatis in peccato, quia petra sunt.

Inter

Inter omnes creaturas nulla est, quæ minus Diuinis verbis obsequatur, quæque minus recognoscat maiestatem domini Diuini, quam homo. Ad nudum enim eius mandatum *cæli firmati sunt*, & iugi regularique motu perpetuo procedunt. *Silet ventus ad illius vocem, & mare à feruore quiescit*, & terminos suos nullatenus excedit, quia audit vocem Dei dicentis: *Huc usque venies, & non procedes amplius*: terra perpetuo generat, quæ sibi generanda Deus præcepit. Quod egregie Dauid expressit. *In æternum Domine verbum tuum permanet in cælo, &c. fundasti terram & permanet*. Omnes res creatas, inquit D. Augustinus, voluit Dauid complecti, eas exhibens obedientissimas præcepto Diuino, dum cælum & terram percurrit. In cælo permanet verbum Dei. In terra perpetuo id fit quod Deus fieri statuit dicens: *Germinet terra herbam virentem, &c. & lignum promiferum*. Solus homuncio, Diuinis verbis se exhibet rebellem, & est is, de quo Deus conqueritur dicens: *Rupisti iugum, soluisti vincula, & dixisti non seruium*. Cum autem diligenti consideratione inspicio, quam ob causam homo iniquus Diuina verba surda aure percipiat, & forti eorum sonitu non moueatur ad explenda Diuina madata, eam esse aduerto, quod videlicet homines huiusmodi corda habeant petrosa & lapidea, verbum autem Diuinum, in petra duros effectus nequit producere, sed hac de re fusius in ipsa concione.

Psal: 32.

Eccl: 43.

Iob: 38.

Psal. 118.

In Psal: 118.

Gen: 1.

Ier. 2.

AUE MARIA.

Vidistis aliquando grandem pluuiam de densissimis nebulis in terram cadere, quæ penetrans terræ viscera, pulchros & odoriferos producit flores, &c.

res & aristas crescentibus, vt quam citissime ad maturitatem festinent, adiuumentum præbet, arborum folia purgat, & fructus earum augmentat, hortos irrigat, & Patrem familias lætificat. Vidistis inquam hos pluuiæ effectus, & vt existimo aduertistis aliquando, eandem pluuiam suis vberissimis guttis saxosas petras percutere, sed omnes quali repulsam passas à nimia earum duritie retro cedere, reddit quidem pluuiæ petram de super madidam, sed interiora eius non penetrat. Prædicationem verbi diuini esse pluuiam superioribus concionibus declarauimus, hæc igitur pluuiæ hominum humi serpentium, & se terræ filios agnoscentium præcordia penetrabili effectu ingreditur, variosque virtutum flores, & suauissimum bonæ famæ odorem spirantes producit, altissimas arbores (intellige viros probos in virtutum Palæstra Proceres & Magnates) à minimis araneorum telis expurgat, homines vero corde duro & saxoso, ad meliorem vitæ statum reducere non valet. Referam vobis, iucunda quæque auribus vestris, de variis pluuiarum speciebus. Liu: decad. 1. lib: 1. In Albano monte ait impetu pluuisse lapides biduum continenter. Quod etiam è sacris literis apertissimum est. Iosu: 10. his verbis. Quinque Regibus Amorrhæorum congregatis aduersus Iosue, Dominus misit super eos lapides magnos de cælo, & mortui sunt multò plures lapidibus grandinis, quam quos gladio percusserant filii Israel. Platina quoque in Ioanne XIII. scribit, sæuiente ventorum & imbrium procella, lapidem miræ magnitudinis è cælo cecidisse in Italia. Sed & Modonetius in vita M. Aurelii Imperatoris. lib: 1. ca. 25. testatur, Constantinopoli,

*Verbum Dei
esse pluuiam*

*Platina in
vita Ioan-
nis XIII.*

tinopoli sub Valentiniano Imperatore, adeo lapidibus pluuisse, ut iumenta campestria fere omnia fuerint extincta, atque ciuium non pauci interierint. Sed & nouissime Surius in Commentario Anni Dni. 1519. Fuit hoc anno (inquit) fœuissima procella: Ferunt ea tempestate cecidisse ex æere, lapides oui gallinacei magnitudine. Sed & Anno Dni. 1510. tradit, Insubribus pluuisse saxa grandia, è quibus vnum, pondus habuit librarum 120. fuisseque silicibus duriora, odore sulphureo. Orosius lib. 5. cap. 18. testatur in pago Beluacensi lapides ouorum gallinaceorum magnitudine pluuisse quadrangulati forma, arbores villasque obruisse, ac absumpsisse constat. Sed & hoc nostro sæculo in nouo orbe, in Gagona valle tantum procella inualuit, ut eradicatis in sublimeque elatis arboribus lapidibus pluuiæ ingruerent. Sed & in Meaco (vrbs insignis est Iaponica) Anno Dni. 1577. Regulus quidam ethnico ritu suo dæmonicam celebrabat festiuitatem, in qua plurimum publiceque Christianæ fidei sathanico ore detrahebat: Mirum, è sereno cœlo saxorum crepitantium pluuiæ decidere visa & audita est, quo omnis illa Idolatrarum multitudo, quæ ad viginti millia numerabatur, dilapsa est, neque equidem vnus permansit eo loci, adeo illa vis Angelica, Christiani nominis tuendi causa, insanientium cordibus metum incusserat: recolit qui spectator fuit Organinus Iesuita. Atque hæc lapideæ pluuiæ, sine dubio arbores altissimas confregerunt, segetes eradicauerunt, homines & iumenta, & tecta concusserunt, petram verò aliquam potuisse, siue emollire, siue è loco mouere, nunquam literis mandatum posterita-

*Mirabiles
pluuiæ.*

*Ethnici ter-
riti pluuiæ la-
pideæ.*

ti legimus. Accidit aliquando Prædicatorem in concione fulminare, tonare, & quodammodo pluuiam lapideam, arguendo vitia hominum in corda auditorum demittere. Mouentur multi ad bene agendum, concutiuntur timore, & horrore extremi iudicii, & futurorum in inferno tormentorum, sed illi tantum qui nondum in profundum peccatorum venere, & qui non lapideum cor, sed carneum habent: secus quorum cor obduratum, & ipsa saxosa petra durius est, etiam fulmina nihil proficiunt, nec de loco impietatis homines illos mouere possunt. O duram petram cor peccatoris. Lacte quoque pluuisse meminit Liuius decade 3. lib. 7. ac Orosius lib. 4. ca. 5. In Asbanio in Gallia, pluuisse annonam, frumentumque ac pisciculos Anno Dni, 989. memorat Vicentius histo. lib. 24. cap. 97. Sed omnium pluuiarum illa mirabilissima fuit, quam Manna in deserto, ad Israelitici populi escam quotidie pluerat. Nam tametsi in crastinum seruatum marcesceret; Sabbatho tamen die incorruptum seruabatur. Sed maxime admirandum fuit, quod qui vera fide in Deum id colligentes in escam sumebant, quocunque oblectarentur escarum sapore, siue carnis cuiuscunque speciei, siue piscium, siue fructuum, sapor in illo Manna sentiebatur. At qui non recta fide, neque pietate sumerent, nullus in eo sapor inesse videbatur. Lactis, frumenti & Manna pluuiam Prædicatores in corda Auditorum spargunt, dum eorum vitia in Spiritu lenitatis arguunt, & etiâ iuxta D. Pauli præceptum obsecrant, ne iniquè viuentes sicut præuaricatores diuinorum mandatorum durum iudicium subeant, quantaque sit cœlestium bonorum dulcedo,

Pluvia lactis

Liui. dec. 3.

cap. 7.

Frumentum

pluit Vincet.

lib. 24.

Exo: c. 16

dulcedo, & quam perdulcis sapor, illis ob oculos ponunt, & ne illis temporalia bona præferre audeant, obnixè per misericordiæ Dei viscera rogant. ad Heb. 5. *Facti estis quibus lacte opus sit non solido cibo. Omnis enim qui lactis particeps est, expers est sermonis iustitiæ, paruulus enim est.* Verum etiam esse nō dubitamus, sanguine pluuisse. biduo in area concordiæ Romæ, vt habet Liui. dec. 4. lib. 9. Patina in Hadriano 11. Pontifice tradit apud Brixiam, ante eius Pontificis mortem tribus diebus sanguine pluuisse. Sed & hoc nostro sæculo testatur Surius in suo Commentario. Anno Dni. 1543. circa finem in Diocesi Monasterien: ad castrum Sassemburg. haud procul à Barendorp: sanguine pluuisse. sed & apud Britones in Gallia in oppido Rocello pluuisse sanguinem, Anno Dni. 1163. memorat Rob. de Monte eius temporis auctor. Sanguinis imbrem tum Prædicatores in corda auditorum effundunt, dum peccatores à suis vitiis Christum illis in cruce sanguine aspersum, & vulneribus cōfectum ostēdendo, auocare desiderant. Compertum omnibus est, accipitrem esse animal natura ferum, inquietum, & adeò viuax, vt ad minimum etiam strepitum, quamuis pedes eius vinculis impediti sunt, commoueatur, & alis complosis auolare conetur. Verum enim uero quod est remedium, quo quietari & stabiliri potest? Carnis sanguinolentæ exhibitio. Hæc enim facit illum ad quosuis strepitus & rumores firmum atque immobilem consistere. Ita quoque cor nostrum adeò viuax est, vt nunquam stabile sit, sed ad omnem, minimum etiam tentationis, sensuum, carnis, ac dæmonis, motum, quanquam plurimis sanctorum Dei mandatorum vinculis constrictum, in varias

Ad Heb: 5

Sanguinis
pluuia.Quando Cō-
cionatores
sanguinis im-
brē spargūt.Gabr. Inchi-
no Can. Re-
gul.

Simile.

partes commouetur, desiderando sæculi vanitates. Caterum ad illud stabiliendum & efficiendum maxime prodest carnem illi demonstrare. Sed quam carnem? Christum in cruce pendentem, & sanguine perfusum. Hunc deuota meditatione cogitando, cor à mundi vanitatibus abstrahitur, & mundum seruatur. Hoc S. Paulus in semetipso expertus fuit, ideòq; dicebat. *Mihi autē absit gloriari nisi in cruce Domini nostri Iesu Christi. Stigmata Domini nostri Iesu Christi in corpore meo porto.* Enumeratis tam variis pluuiarum speciebus Authores, earum etiā varios effectus comemorant, nullus tamen illorum hoc asserere legitur, alicuius pluuiæ de cælo cadētis violētia petrā cōcussā fuisse, hoc modo imber diuini eloqui multorum effectuum in cordibus hominum origo & fons vberimus frequēter existit, in corde nihilominus petroso & pertinaci manet sine virtute & effectū. Gladius ferreus petræ allisus, non eam vulnerat, nec penetrat, sed scintillas igniferas excutit, & quendam durum sonitum excitat, arbores vero, & variigeneris plantas transfodit, vulnerat, & relicto vulneris vestigio, ex arbore extrahitur. Verbum Dei in sacra scriptura gladius nuncupatur. ad Heb: 4. *Vivus est enim sermo Dei & efficax, & penetrabilior omni gladio ancipiti, & perstringens usque ad diuisionem animæ,* & ad Eph: 6. *Assumite & gladium spiritus, quod est verbum Dei.* Hic igitur spiritualis gladius vulnerat frequēter, & penetrat corda multorum Christianorum, sed à petra resilit, & nullo vulnere inflicto, ignem elicit. Dum enim prædicator ad hominem nequam, vitiiisque ex toto pectore incumbentem, à via hac peruersa deterrendum, euaginat. Diuini verbi gladium, & contra illum ictum dirigit, nihil

Galat. 6.

*Nulla pluuiæ
petram concussisse legitur.*

Gladio verbum Dei assilatur.

Hebr. 4.

Eph. 6.

nihil prorsus efficit. Veritas odium parit, ignem iracundia, & desiderium vindictæ sumendæ accendit. Vultis rem per exempla cognoscere? Habete. Regnabat in nostra Polonia Boleslaus, à virtutibus bellicis appellatus Audax, Rex à principio pius, & Patriæ amans, sed ingêtes viri virtutes, ingentia æquabant vitia. Erat animus ad aggredienda pericula magnus, erat constantia in bellis persequendis, laboribusque tolerandis incredibilis: sed ex altera parte fuit crudelitas summa, avaritia non ferenda, animus impotens, ac rebus secundis insolens: ante autem omnia in quamque fœdissimam libidinem plane effusus. Fungebatur tunc officio Episcopali, in Ecclesia Cracouien: Beatus Stanislaus, vir & doctrina, & opere potens, cuius sanctitatis odor iam tum per omnes Christianitatis partes diffundebatur, qui tantas virtutes, tot tantisque vitiis contaminari dolebat. Regem igitur aggreditur, illumque officii admonet, non decere splendorem regium turpitudine vitiorum maculari docet, à crudelitate & libidine fœda cum dehortatur: & nisi faciat se cum excommunicaturum minatur. O vere animum Apostolicum, qui inuicta animi fortitudine, Regem aggredi ausus est, & cōtra illum ancipitem verbi diuini gladium vibrare non erubuit? Sed quo suo commodo? Dura petra Rex erat, gladius igitur ille ignem excussit, si quidem percussit ea res animum Regis, & exacerbauit, ita vt nihil amplius nisi de vita & sanguine Sancti Stanislai cogitare videretur. Rem igitur tentauit, maiestate Regia indignissimam. Cum enim perageret rem sacram S. Stanislaus, vulnere lethali, caput Martyris proscindit, cerebroque eius interfecit.

*Rex Poloniae
Boleslaus,
audax à bellicis
artibus dilectus.*

Beatus Stanislaus Regem cum gladio salutis aggreditur.

Boleslaus S. Stanislaum interfecit.

parietem respergit. Male inchoatum opus Regis, improbi ministri deterius perficiunt: corpus Sancti de templo extrahunt, & in partes septuaginta duas discindunt, atque canibus auibusque deuorandum proiciunt, nefando demum opere perfecto abeunt.

*S. Ioannes
Baptista Re-
gem cū gla-
dio aggredi-
tur.*

O ignem verē infernalem. Sanctus quoque Ioannes Baptista, quo maior non surrexit inter natos mulierum, accinctus huic gladio salutis, in vitia peccatorum irruit, vocē terribili intonans. Pœnitentiam agite appropinquauit enim regnum cœlorum. Igitur multi compuncti veniebant ad eum dicentes. Quid ergo faciemus? Aggreditur & Regem Herodem, & stricto diuini verbi gladio cor eius petit. Non licere Regē cum vxore fratris sui habitare vociferans, sed quid proficit tam S. Vir, ignem ē petra excutit, iratus Rex S. Prophetam carceri includit; & paulo post capite plecti iubet. O duram petram,

*Vento com-
paratur ver-
bum Dei.*

cor peccatoris. Ventus quoque habet magnam similitudinem cum verbo Dei. Quia sicut nauis in mari, quantumuis omnibus sit requisitis ornata, sine vento per maris aquas incedere nequit, sic nec anima, quantumuis donis naturalibus ornata sit, in cœlum tendere valet, sine diuini eloquii gratia. Nemo enim saluabitur, nisi ille qui crediderit, quomodo autem credere poterit, sine prædicante, cum fides ex auditu sit? Sed & hoc verum est, vento flante, arbores, herbas, virgulta, imo & aquarum flumina, cōmouentur, in hanc, & in illam partem flectuntur, petra autem fortiter in loco manet. Fertur Tiphonē ventum à Sinarum regione in Iaponiam nauigantibus, tantæ semper incensorem tempestatis esse, vt illo flante non nisi miraculo naufragium euitari possit, si

*Organtinus
Brixianus
Iesuita.*

fit, si vel vnam perduret noctem. Vela enim quantumvis egregie firma discindit, malos abrumpit, quamuis integros & solidos, partes quoque eas nauigiorum, quæ ab aquis eminent dissoluit, ac demum (vt fertur) si nauigia onerata non sint, etiam iam ab vndis in æra eleuans, effert vltra littus, vnde facile collisione rumpantur. In australi quoque cœlo orbis noui, in ea regione, quæ sancti Vincentii nuncupatur, tanta ventorum vis est, vt infra dimidiæ horæ interuallum procella adeo magna emergat, vt syluæ ipse eradicentur: domus quoque concutiantur: sed & in Hispaniola Insula, adeo inualent ventorum vis, vt elatos in sublime homines, ad stadii interuallum transferant ad casum, quo etiam miserè quatuntur, transferunt & arbores ingentes radicibus euulsas, etiam syluis valde procul sitis. Hæc & alia de ventis miracula in diuersis authoribus legi, nusquā tamen legisse me fateor, petram saxosam, vento flante, de terræ visceribus eradicatam & euulsam fuisse. Similiter ad verba Prædicatorum, quæ vento s. Spiritus flante proferunt, commouentur e loco impietatis permulti, exceptis obstinatis & corde obduratis, hi enim sicut petra duri existentes, nullo vento spirante Diuini verbi moueri possunt. Insuper lucerna ardens domos etiam amplissimas, arboresque altissimas, si illis admota fuerit, accendit, & magnum incendium excitat, at petra duræ etiam mille lucernas si admoueris, flammam ex eius visceribus nequaquam erumpentem conspicerè poteris, dicitur de verbo Dei. *Lucerna pedibus meis verbum tuum.* quæ vt dixi nullum ignem in corde petroso excitare, valet. Igitur o Christiani, qui experimentis quotidianis

*Ventorum vis
mirabilis.*

*Ignis nō accendit
petrā.*

tidianis cognoscitis corda vestra ardentissimis con-
 cionibus non moueri, petram vos durissimam esse
 noueritis. Idcirco serio vobis ad Dominum Deum
 clamandum est, vt ipse, gratia diuina hanc scindat,
 & rumpat duritiam, & auferat à vobis cor lapide-
 um, donet verò cor carneum. Vtinam hæc vo-
 bis præstare dignetur Deus Omnipotens,
 Cui laus & gloria, sine fine, in sæcu-
 la sæculorum. AMEN.

ORATIO ECCLESIASTICA

In Dominica Quinquagesima.

*Tradetur filius hominis gentibus, & illudetur, & flagellabitur, &
 conspuetur, & postquam flagellauerint occident eum. Luc. 18,*

*Summa Cõ-
 cionis.*

CAusæ quare Christi mors tempore Bachanalio-
 rum commemoratur, redduntur.

IN conuiujs, ac comestationibus mille pericu-
 la dominari saluti hominum, in aperto esse, ipsa
 experientia magistra cognoscimus. Quippe in cõ-
 uiuijs sanguinem proximorum effundi, corpora
 vulneribus, & sæpenumero sæda cæde affici, omnia
 tumultu, & clamorosis vocibus impleri, quotidie fe-
 re spectamus. Thracum conuiuia huiusmodi fuisse,
 rerum gestarum memoria testatur. Funis quidam
 ex alto laquei in nodum conuolutus dependebat,
 huic

huic ad perpendiculum lapidis rotundus vndiq; erat
suppositus, super quem is, cui eius fors obtigerat lu-
dicri, gladium manu tenens ascendebat, collumque
laqueo illi insertabat. Subditum sub hac lapidem
conuiuiarum quispiam facile loco mouebat, quo di-
moto, laqueo pendens ille, aut celeri funem ictu
abscindebat, aut morte sua ebriis conuiuiis turpes
de se cachinnos commouebat. Odetestandum con-
uiuium. Sic communi vsu euenire solet, vt dum o-
mnes vino se ingurgitant, & lætitiæ vanæ habenas
laxant, & ecce subito mors irruit, vnum atque alte-
rum per scelus ab aliis necatum rapit, & subito ho-
minis interitu extremum gaudii occupat. Quoniam
verò his diebus, omnis status hominum conuiuiis a-
dest, & variis voluptatum illecebris inhærere con-
sueverunt, ne igitur homines Christiani, in aliqua
pericula deueniat, reuocat eos mater Ecclesia, ab
his pessimis occupationibus, mortem Christi illorum
oculis representans. Sed de hoc fusius in ipsa con-
cione quærendum relinquimus, quare hac Domini-
ca mortis Christi fiat in Ecclesia solennis mentio.

*Thracum cō
uiuia.*

*Tempore bac-
chanaliorum
omnes homi-
nes volupta-
tem quarunt*

AUE MARIA.

PRIMA causa, cuius beneficio hodierna die mor-
tis Christi memoria auribus vestris inculcatur,
est, vt hominibus superfluos & delicatos cibos effi-
ciat, quodammodo abominabiles. His enim diebus
edent, & bibent, ambulabuntque in comessationi-
bus & ebrietatibus, & in cubilibus, & impudiciis,
in contentionibus & æmulatione: multi inquam in-
uenientur Esau imitantes, qui accepto pane, & len-
tis edu-

Na

tis edu-

Gen. 23.

tis edulio, comedit, & bibit, & abiit parui pendens, quod primogenita vendidisset. A quo pernicioso vitio desiderans mater Ecclesia, hominum abstrahere animos, per ora Prædicatorum utitur verbis Christi, & ait. Luc. 21. *Attendite vobis ne forte grauentur*

Luc. 21.
& 17.

*corda vestra, crapula & ebrietate, & curis huius vitæ, & 17. In diebus Noe edebant & bibebant, uxores ducebant, & dabantur ad nuptias usque ad diem qua intrauit Noe in Arcam, & venit diluvium, & perdidit omnes: sed animaduertens se, cum verba Christi referat in aqua scribere, & surdis fabulam canere, addit minas & inquit. Luc 6. *Va vobis qui saturati estis, quia esurietis, & Num. 21. Adhuc carnes erant in dentibus eorum, & ecce furor Domini concitatus in populum, percussit eum plaga magna nimis.**

Luc. 6.
Num. 21.

Verumenimvero & harum vi parum comouentur homines, tempori & consuetudini obediendum esse clamitantes. Quid igitur pia mater facit? Vtraque manu accipit Christi sanguinem, sputa, & flagella, & quodammodo aspergit eorum fercula illo feruenti cruore, vt sic saltem retrahat eos ab auaritia ciborum. Natura enim duce hominibus inditum est, vt resanguine recenti conspersam quodammodo abhorreant, nec eam in cibum sumere audeant: & efficit id his modis. 1. Commemorando mortem Patris nostri. 2. Ponendo eum ob oculos flagellis vehementer cæsum. 3. Sanguine aspersum, sputis deturpatum, & funibus ligatum. Cum enim in conuiuio filiis in lætitia vinum bibentibus nuntiatur, Patrem eorum ab hostibus captum, vulneribus confectum, & vehementer afflictum animam agere, nonne dolore vehemente transuulnerantur? nonne omnibus poculis & ferculis delictis celericursu, e domo conuiuii euolant, vlturique patri

Simile.

patri suo illatas iniurias? Hoc modo & vobis faciendum esse insinuat, ut videlicet audita crudeli Patris vestri morte, subito remotis epulis surgatis, & ad persequendas iniquitates vestras, quæ cum vulnerauerunt vos conferatis. Venit olim Abner Dux artibus militiæ præclare instructus, ad Regem Dauidem, Israeliticum illi regnum deferens, à Rege conuiuium exceptus, & muneribus locupletatus, dum in propriam domum reuertitur, per fraudem à Ioab interficitur, statimque maledixit Ioab Dauid, & ait. Scindite vestimenta vestra, & plangite ante exequias Abner. Cumque sepelissent Abner, leuauit Rex Dauid vocem suam, & fleuit super tumulum Abner, fleuit autem & omnis populus, & subiicitur. Cumque venisset vniuersa multitudo cibum capere cum Dauid, clara adhuc die iurauit Dauid dicens. Hæc faciat mihi Dominus, & hæc addat, si ante occasum solis gustauero panem, vel aliud quidquam &c. Eandem & non aliā cantilenam Ecclesia mater nostra canit. Plangite. Christus quippe Rex vester interfectus est, sanguis eius effusus est, à plâta pedis usque ad verticem capitis, non est in eo sanitas. Interfectus est bonus & fidelis amicus vester, qui venit offerre vobis regnum cœlorum. Fleuit inquam Dauid, omnisque multitudo vehementer vim lacrymarum cum illo profudit, nec quidquam gustare præ nimio dolore voluerunt. Nos verò Christum Dominum, Patrem, redemptorē, & benefactorem nostrum aspicientes sanguine perfusum, flagris laceratum, clauis confossum illusum, & insuper crudeli morte mulctatum, genio indulgebimus, & non potius vberimis lacrymarum fontibus vultus nostros aspergemus? Fecerat con-

2. Reg.
ca. 3.

Plorat Dauid mortem Abner.

Ecclesia nos ad fleum inuitat Christi mortem representans.

2: Reg. c.

13.

*Præclarus
mos Aegy-
ptiorum.*

uiuium Absolon quasi conuiuium Regis, sed cum temulenti fuissent vino, adsunt cum euaginatiis gladiis pueri Absolon, qui Ammon Fratrem eius aggressi inter pocula obtruncant, *surgentesque omnes filii Regis ascenderunt singuli mulas suas, & fugerunt.* Vidistis Auditores filios Regis, cum omni lætitia & iucunditate, vinum bibisse in domo fratris sui, sed vbi primum sanguinem fratris, effusum viderunt, sine mora fugam arripuerunt ad illud conuiuium amplius haud reuersuri. Offert vobis Ecclesia sanguinem Christi fratris vestri dilectissimi pro salute vestra, & in remissionem peccatorum vestrorum crudeliter effusum, ergone viso Christi sanguine poculis inhærebitis? nonne dolore nimio transfixi, ab omni mundana voluptate è cœno conuiuii fugietis? Mors vnus adolescentis Regem Dauidem, & omnes qui lateri eius adhærebant summo dolore affecit? Mors Christi non poterit hoc efficere in cordibus vestris? Quæ præclare ac sapienter Aegyptii, qui (vti refert Herodotus) vt in epulis conseruarent honestatem, modestiam, temperantiam, & ne essent inter delicias dissoluti, & in omnem vitiorum licentiam effusi, statuerunt, vt in principio conuiuii statua quædam lignea, coloris ollei, mortis speciem accuratissime exprimens circumgestaretur: hæc autem quamdiu durarent epulæ, omnium oculis ibidem manebat exposita, illius vero lator clara voce conuiuas hisce verbis alloquebatur. O vos quotquot ad epulas hæc conuenistis, vt cibis lautioribus & exquisitioribus vos expleatis, imaginem hanc attente aspiciate, ac è memoria nunquam deponentes, quod huic aliquando similes futuri sitis, bibite. &c. Simili modo,

modo matrem Ecclesiam Sanctā cum suis filiis procedere his diebus liquido patet, qui ne dissoluantur in omnem viuendi perniciosam licentiam, repræsentat illis imaginem Christi Domini crucifixi, vulnerati, sanguine conspersi in hæc prorumpens verba. En amore vestri Christus in omnibus membris vehementissimos dolores patitur, vos amore eius non abstinebitis a superfluis cibis & potibus? Illi in escam datur fel, & potatur aceto, vos in abundantia vinum habetis, & exquisitissimis vesci ferculis curabitis? Decet ne sub spinoso capite molliter viuere membra? Conueniensne est, & æquitati consentaneum, Domino siti, fame, & tribulationum angustiis oppresso, seruos exhauriendis poculis, & fruendis voluptatibus inherere? Imperatore & Duce afflicto, quis miles in lætitiā soluitur? Patre morborum vi debilitato, quis filius in petulantias carnis sponte dilabitur? Quæro a vobis, si quispiam veniens ad mensam vestram cui accumbentes, varia ferculorum genera hianti ore consumitis, sanguine recenti omnes cibos conspergeret, sumeretis ne cum tali condimento etiam quæque delicatissima? Nequaquam, vt ego existimo. Horrendum enim est, & a natura humana alienum, potum vel cibum cum recenti sanguine, & maximè humano sumere. En Christi sanguine cibi vestri asperguntur, quomodo nihilominus auide vos ad manducandas animalium carnes cōfertis? *Elevans virgā Moyses percussit aquā fluminis corā Pharaone, & servis eius, & versa est in sanguinē, & non poterāt Agyptii bibere aquā fluminis. &c.* Orosii testimonio cōstat, Benedicto VII. Pontifice in Lotharingia, saluberrimum scatentem fontē in sanguinē versum fuisse, Ioā-

Nō decet sub spinoso capite molliter viuere membrum.

ne quoque XII. Pontifice, Genus sanguinis fons largissime effluxit. Et in Britannia sanguinis fontem manasse Fulg. lib: 1. testatur, & ex talibus fontibus, nemo vnquam hausisse aquam ad bibendum legitur, sed potius omnes stupefacti mirabantur Dei potentiam, metuentes ne hoc esset à Deo in manifestum signum furoris eius, vt & fuisse manifestum est, nam ille primus fons sub Benedicto totius orbis famem, & pestem in Italia, qua plurimi perempti sunt, & sub Ioanne portendebat futuram maximam calamitatem, quæ postea à Saracenis illata est. Nō dispari ratione fōtes sanguinis ex corpore Christi promanētes vobis repræsentat Ecclesia, vt illis visis deterreamini à gula & ebrietate, & recordemini sanguinē hunc Diuini furoris indicium esse, si ventri & non Deo obedire volueritis. *Altera causa est.* vt homines à vana lætitia auocare & abstrahere valeat. Modo enim homines peruersi dissoluuntur in vanum gaudium, & inanem lætitiā, quippe cum malè fecerint lætantur. Sap: 2. *Dixerunt impii cogitantes apud se non rectè. Exiguū ē cum tadio est, tempus vitæ nostræ, &c.* Venite ergo & fruamur bonis quæ sunt, & utamur creatura, tanquam in inuenture celeriter, ubique relinquamus signa lætitiæ nostræ, quoniam hæc est pars nostræ, hæc est sors nostræ. Omnibus his offertur mors Christi crudelissima, vt conspecto domino suo crudelem in modum afflictō, flere potius & non gaudere velint, siquidem Bachi lætitiā sortitur exitum tristem, extremaque gaudii occupat luctus, at tristitia Christi vertitur in gaudium, & breui post nebulā oritur phæbus. Refert Iustinus lib: 12. Alexandrum magnum quodam die vocasse in solennē conuiuium amicos, vbi orta inter ebrios rerum à Philippo gestarum

Iustinus lib:

12.

starum mentione , præferre se patri ipse cepit , contradicentemq; Clytū occidit . Postea ad se reuersus videns occisum militem , eodem furore in pœnitentiam versus est , quo mori voluit . Primum in fletu progressus amplecti mortuum , vulnera tractare , & quasi audienti confiteri dementiam , arreptum telum in se vertit , peregissetque facinus , ni amici interuenissent , ob hæc illi quatrīduo perseverata inedia est . Lætus ut intellexistis conuiuium celebrauit Alexander , & sine dubio celebrasset longiori tempore , nisi Clyti per se interfecti sanguine reuocaretur , quem cum aspexisset mortuum , confestim vehementi mœrore arreptus , & similis insanienti factus , sibi ipsi manus inferre voluit . Similiter & vos ne ad vanam lætitiā lapsi facile ruatis , aut si iam gaudere cepistis , quāprimum de domo conuiuii in domum doloris & luctus venire properetis , ponitur in conspectu vestro Christus , quem vestra peccata vulnerauerunt , insuper & occiderunt , ut sicut Alexander viso corpore defuncti militis , se totum tristitiæ dedit , ita & vos considerantes Regem vestrum interfectum , vehementi compuncti dolore lugeatis , quod si caro consurrexerit aduersus spiritum , vobis ipsis vim inferatis , quippe violenti rapiunt regnum cœlorum . *Tertia causa est .* Multi his diebus voluptatibus incumbere toto pectore nituntur , tenent tympanum & cytharam , gaudent ad sonitum organi , ducuntque in bonis dies suos . Sed vœ vobis qui ridetis nunc , quia lugebitis & flebitis . Ut igitur Ecclesia homines ab omni luxuria voluptatum , facili negotio amouere valeat , Christum illis omni tormentorum genere excruciatum , fame & siti exagitatum

Caro concupiscit aduersus spiritum, & spiritus aduersus carnem.

agitatum, cruore & liuore deturpatum, sputis maculatum, frigore & nuditate afflictum, & ab omnibus derelictum inducit, vt illi Dominum & Regem suum in tam abiecto statu animaduertentes, eisicut fideles serui, postpositis omnibus illecebris adhære-

Non est seruus supra dominum. ant, non enim decet seruum mollius quam Dominum eius viuere, nec est discipulus supra magistrum. Suadebat Dauid Vriæ, vt in domum suam iret, & à bellorum labore requiesceret, cui Vrias.

2. Reg: II. *Arca Dei & Israel, & Iuda habitant in papilionibus, & dominus meus Ioab, & serui Domini mei super faciem terra manent, & ego ingrediar domum meam, vt comedam, & bibam, & dormiam cum uxore mea? per salutem tuam, & per salutem animæ tuæ, non faciam hanc rem.* O fidelis seruus & prudens? Dux inquit meus laborat, & ego deliciis vacabo, absit. Si ergo Vrias confundebatur deliciis vacare, ducem suum in laboribus constitutum considerans, quid nos facere oportet, Christum in tot tantisque laboribus vitam transigere considerantes? Dominus meus felle & aceto potatus est, & ego ciborum delicias quæram? Dominus meus nudatus est, & ego bysso & serico vtar vestimento? Dominus meus in cruce pendet, & ego lectuli molliem quæram? Absit, Christianus sum, Christum sequar quocunque ierit ipse. *Dixit Rex Dauid ad Ethai Gethuim. Cur venis nobiscum, &c. heri uenisti, & hodie compelleris nobiscum egredi, quid ad hæc fidelis seruus responderit, audite: Venit Dominus, & uenit dominus iustus Rex, quoniam ubicumq; fueris domine mi Rex, siue in morte, siue in vita, ibi erit seruus tuus, &c.* Sic & vobis dicendum est, non discedemus à te Domine I E S U, si fueris in carcere, tecum ibimus; si apud prælidem, aderimus; si in dolore, condolebimus. *Quarta causa est.*

Vt accen-

Vt accendat animos hominum ad pugnam contra hostes, qui modo ex inferno egressi in nostram conspirarunt salutem fortiter ineundam. *Et Elephantis ostēderunt sanguinem tuum, et mori ad acuendos eos in prælum.* Sic ad acuenda Christianorum corda ad iuuanda hostium castra multum conducit sanguinis Christi præsentatio. Ecclesia enim sanguinem Christi vobis ob oculos ponens. Eia inquit Christiani, Christus Dominus amore vestri, carnem suam flagellis cædendam, funibus ligandam, clavis transfodiendam exposuit, vos ad exemplum eius carni vestræ. forti & inuicto animo bellum indicite, eius desideria sequi, & explere recusate, concupiscentiis resistite, & si vobis instare fortiter videbitur, flagellis, ciliciis, inedia, & vigiliis hostem crudelem exagitate, & castigantes illum in duram seruitutem redigite. Christus Dominus amore vestri adeo pauper factus est, vt & vestes, quibus eius sanctissima caro tegebatur deponeret, & nudus vt ipsi cernitis in crucem actus mortem oppeteret. Vos exemplo eius huius mundi gloriam negligite, eius fucatum splendorem abiicite, & si vos in suam partem trahere voluerit, fortes resistite in Domino, & potius nudi nudum sequimini Christum. Conuertite oculos in eum siti laborantē, & sitio clara voce clamantem: & confestim, vos quoque deliciis, voluptatibus, conuiujs, comestationibus postpositis, continentia & temperantia frænum carni vestræ impenatis, quod si compatiemini, & glorificabimini in regno cœlorum.

Vbi Deus Pater, Deus filius, Deus spiritus

S. regnat sine fine.

AMEN.

Oo

ORA-

SECVNDA ORATIO ECCLESIASTICA

In eadem Dominica.

Cæcus quidam sedebat secus viam mendicans. Luc. 18.

*Summa Con-
cionis.*

HOMINES peccatores esse cæcos pulchrè docetur in hac Concione.

Ester. 5.

OMNES qui spreto Christi conuiuium veniunt ad epulas Bacchi, extremæ dementiæ participes sunt iudicandi. Quid enim nobilius, quam Regio conuiuium adesse, & cum Rege manducare? & quid vilius quàm cum abiectissimo carnifice mensæ accumbere? Christus Dominus supremus Rex est, Bacchus verò carnifex, qui igitur Christo contempto, Baccho adhæret, carnificem sequitur: quo quid ignominiosius? Quantum ad id regio excipi conuiuium esse rem gloria plenam, Aman supremus in aula Regis Asueri Princeps, suo exemplo confirmat: dicit enim. Est. 5. *Regina quoque Ester, nullum alium vocauit ad conuiuium præter me, apud quam etiam cras pransurus sum.* Bacchi verò conuiuium esse quandam carnificinam illud exemplum de Adonibezec. Iud. 1. perbelle demonstrat. Vbi septuaginta Reges, amputatis manuum ac pedum summitatibus colligebat sub mensa ciborum

rum reliquias. Sic Bacchi epulas sectantes sicut canes colligunt sub mēsa voluptatum reliquias, frequēt erq; ex aliqua in occasione ira accēsi, seipsos inuicem gladiis manus & pedes amputant, faciesque suas vulneribus deturpant. O verē carnificinam Bacchi conuiuium. Inter alia autem tormenta, quibus crudelis iste carnifex Bacchus homines afficit, illud non potestremum cæcitas. Omnes enim Bacchi & voluptatum eius sectatores esse cæcos, hæc nostra docebit concio.

AVE MARIA.

Sacrarum literarum monumenta homines peccatores esse cæcos manifestè testantur. Soph: *Ambulabunt ut cæci quia Domino peccauerunt.* at Baccho obediētes & ventri obsequētes peccant, ergo sunt cæci. Gen: 19. Volebant Sodomitæ irruere in domum Loth. & effringere fores domus eius, ut adolescentē ab illo hospitio exceptos ad explendam cum illis carnis turpitudinem educerent, sed percusserunt eos Angeli cæcitate, ita ut ostium inuenire non possent. Sic quicumque hos pessimos homines in sectanda carnis voluptate imitatur, esse cæcitate percussos hoc exemplum perbellè demonstrat. Deut: 28. *Quod si audire nolueris vocem Domini Dei tui, ut custodias & facias omnia mandata eius, &c. Percutiat te Dominus amentia & cæcitate, ac furore mentis, & palpes in meridie, sicut palpare solet cæcus in tenebris, & non dirigas vias tuas, vbi manifestè sacra scriptura cæcos nuncupat. Adhæc, cæcus nescit quo vadat, rectamne an peruersam viam teneat, sed sequitur ductorem suum, & illuc gressum dirigit, quo ductori eius placet, obediens in omnibus ei, qui eius ductor*

Peccatores omnes esse cæcos.

Deut: 28.

Cæcus ductorem sequitur suum.

Qo 2 in via,

in via, existit, iubet eum ductor loco stare, stat; iubet sedere, sedet; iubet a prætereuntibus eleemosynam petere, petit. Sic homo peccator, quocunque eum peruersus affectus traxerit, sequitur eum sicut bos, aut agnus lasciuiens. Nam si quis est, qui secundum carnis desideria viuit, illum in omnibus carni propriæ obsequi est necesse, iubet eum caro ad loca minus honesta viam arripere, sine mora itineri se accingit, iubet eum cantilenas lasciuias, & verba obscæna promere, promit; iubet choreas ducere, luxuriose in conuiujs insanire, tactu & osculis intactas virgines vexare, omnia hæc prompto & libenti animo exequitur, quia cæcus est, & suum ductorem, peruersum scilicet appetitum sequi cogitur. Clamat Ecclesia, & sicut parturiens mater vociferatur.

Rom: 13. *Carnis curam ne feceritis in desideriis.* & Eph: 5. *Fornicatio, & omnis immunditia; aut auaritia, nec nomine in vobis sicut decet sanctos, aut turpitudine,* & Eccl: 13. *Post concupiscentias tuas non eas, & à voluntate tua auertere.* Ille verò qui carnem diligit, surda aure piæ matris hæc verba excipit, concupiscentia semel illectus eius peruersas semitas tenet. Prou: 7. *Occurrit illi mulier ornatu meretricio, præparata ad decipiendas animas, garrula & vaga quietis impatiens, nec valens in domo consistere pedibus suis.* & statim subiicitur. *Statim eam sequitur quasi bos ductus ad victimam, & quasi agnus lasciuiens.* Romæ canes esse cæcorum multi referunt, qui per urbem ad omnes Ecclesias, ad omnes Principum, Ciuumque domos, loro ligati, perducunt dominos eleemosynæ petendæ gratia. Norunt etenim hi catelli locum quo veniendum est, ibiq; subsistunt, atque ita cæcus Dominus & ipse subsistit: auget miraculum, quod hi cæci die Lunæ pro defunctis orantur.

Rom. 13.

Eph. 5.

Eccl. 13.

Prou. 7.

Romæ canes
cæcorum au-
ces.

turi, quasdam habent domos ciuium, vnde cleemo-
fyna petenda sit, alias die Martis Angelorum ob me-
moriā, alias die Sabbati, ob B. M. V. commemora-
tionem, & ad has diuersas, diuersorum quoque die-
rum domos, catelli cæcos dominos suos, absque vl-
lo errore perducunt. Et cum quadragesimali tem-
pore, quotidie adeo diuersis locis indulgentiæ ac
stationes indictæ sunt, ad omnestamen, qualibet sint
Vrbis parte, aut etiam extra urbem, absque vllo vn-
quam errore dominos suos prorsus orbatos perdu-
cunt. Canes hi affectus humanos toties peccatum
abominantes, & iterum ad illud reuertētes sicut ca-
nes ad vomitum intelligo, qui hominem carnalibus
deditum voluptatibus trahunt, pascendi oculos
gratia luxurioso aspectu mulierum, ad domos nobi-
lium, ad Ecclesias, & ad palatia Principum. Notum
etiam est cæcum lumen solis non videre, sed semper
in tenebris ambulare. Tob. 5. *Quale gaudium mihi qui in*
tenebris sedeo, & lumen cæli non video. Non diuersa con-
ditio impiorum. Prou. 4. *Via impiorum tenebrosa.* non
enim illorum mentem irradiat lumen Christianæ
sanctitatis, non illis lucet lumen gratiæ diuinæ, sed
& lumen rationis longè ab illis abesse concluditur,
siquidem ad voluptates sectandas currunt, sicut
mulus & equus, quibus non est intellectus. Præterea
hominem cæcum quis ignorat, ad omnia manuum
opera inhabilem? omnis enim tali plaga affectus,
non potest scribere, legere, pingere, arare, ædifica-
re, & in bello pugnare, manus cæcorum nihil vn-
quam laude dignum possunt efficere. Vnum tatum-
modo cæcum egregium & heroicum quoddam vir-
tutis specimen exhibuisse legi. Hic autem fuit Io-

*Mirabilis do-
cilitas canū.*

Tob. 5.

Prou. 4.

Rex Bohemorum cæcus.

Ioannes Bohemorum Rex cæcus pro Gallis adversus Anglos pugnas fortiter occubuit.

Nullum bonum opus peccator facere potest.

Psal. II. 9.

In circuitu impii ambulant, id est quamvis multum laborando ambulent, in fine denique nullum perfecisse, iter

annes Rex Bohemorum, duorum sine medio Romanorum Principum, alterius filius, alterius Pater, oculis semper infirmus, multos ad extremum annos cæcus, bello hoc quod inter Gallum ac Britannum Regem fuit, dum pugna illa asperrima, cui ambo Reges intererant, inclinare fortunam suæ partis intelligeret, Duces suos clara voce compellans: Dirigite me inquit opus in eam partem, ubi Rex hostium est, atque omne robur exercitus sui; quod cum mæsti ac trepidi fecissent, ille equo stimulis adactō, eō se præcipitem dedit, quō spectare alii, cæcumque oculis prosequi vix audebant, ubi confertissima hostium in acie, non fortiter modo, sed honorifice pugnans ruit, ipsis mirantibus & laudentibus qui vincebant. sed rarissima in cæco huiusmodi virtus, non multos sine dubio omnis ætas, omnisque hominum memoria, cæcos strenue pugnantes vidit. Cum apprehendissent Philystiim Samsonem, statim eruerunt oculos eius, & duxerunt victum catenis, & clausum in carcere, molere fecerunt: quando Samson visu pollebat, manum suam mittebat ad fortia, & digiticius apprehendentes gladium multos hostes trucidabant, priuatus vero oculis operi abiectissimo admouetur, non dissimili ratione homines impii, a meretrice calicem voluptatis illis porrigente, fraudulenta delectatione in errorem inducti oculis priuantur, & ad omnia bona opera inhabiles & minus idonei efficiuntur. Non enim feruenter orare, non cum ædificatione prædicare, non egenis cum charitate adiumentum præstare possunt, sed

iter reperiuntur. Exiit per huius ciuitatis portam quis, & ciuitatem circumiens ad eandem reuertitur per aliam portam, quamuis totum diem in huiusmodi consumperit itinere, tandem in eodem se reperiret loco, vnde iter fuit aggressus, sic peccator quantumcunque viuat, tandem in morte, nullos ex vitæ curriculo profectus fecisse reperiet: sicut enim nudus egressus est, ita nudus recedet, nulla autem bona opera sequentur eum. Adhæc qui in circuitu ambulat. facile capite turbato in terram cadit, sic peccator ac si in circuitu diu ambulasset, capite turbato, insensatus remanet, & facile in peccata ruit. Nonne insensatum hominem diceres, qui facultates suas magnas vitro & vili capillulo commutaret? Quid igitur de peccatore dicis? qui gloriam illam sempiternam, pro vili rerum temporalium lucro, pro mundi honore, pro voluptatibusque carnis commutat? Nonne stultum hunc melius nuncupabis: Ceci vt plurimum mendicare coguntur. Belizarius Dux Romanorum fœlicissimus multisque victoriis clarissimus Romanorum quoque decus & ornamentum nuncupatus, cum sibi eruti essent oculi, eo deuenit paupertatis, vt in templo D. Sophiae Constantinopoli eleemosynam mendicaret, sic peccator etiam maximis diuitiarum facultatibus polens quoniam cæcus est, pauperem eum esse, miserum, nudum, & egenum est necesse. Neque hoc sine ratione dictum existimate. Pauper enim agnoscitur, qui fame oppressus vilia quæque in cibum sumit, ad repellendam fastis molestiam, vt olim filium prodigum cum porcis manducasse constat. At peccatores famem patiuntur vt canes, cibisque co-

*Quo modo intelligatur
peccatores in
circuitu ambulare.*

*Belizarius
excacatus
mendicat.*

rum

Peccator ostenditur esse mendicus & pauper certissimis rationibus.

rum ille est qui & bestiarum lumine rationis carentium, delectationem carnis intelligo, ergo sunt pauperes. Adhuc pauper ille nuncupatur omnium consensu, qui discurrendo per plateas à prætereuntibus auxilium exposcit: tali sorte gaudent peccatores; ergo. Mendicant enim à mundo fallaci diuitias, à meretrice carnalem voluptatem, à creaturis variis suas delicias, hinc illos noctu diuque per vicos & plateas vagari videbis, ut oculos visu meretricum pascant, & si fieri commodè poterit, ad explendam suam cum illis libidinem pertrahant. Sed & ille qui in sterquilinio sedet vlcere pessimo percussus omnium voce pauper appellatur, talis quoque conditio peccatorum. ergo. &c. Dum enim in peccato mortali spontaneè permanent, sicut sus in luto, sic illi in sordibus peccatorum volutantur, hinc dicitur, qui sordet fordescat adhuc, locus eorum sordes & sterquilinum, & quoniam in anima mortui sunt, de cadaveribus eorum ascendit foetor, vermes quoque viscera eorum corrodunt. Illud etiam paupertatis non postremum indicium est, vestem convenientem non habere, peccatores veste nuptiali carent, sed vili quadam & pellicea tunica induti iumentis insipientibus facti sunt, similes. Insuper ille quoque pauper esse nuncupatur, qui è patriæ finibus eiectus in exilium proficiscitur, sed homines voluptatibus dediti à regno cœlorum excluduntur, ergo. Galat. 5.

Exul pauper est.

Gal. 5.

Manifesta sunt opera carnis, quæ sunt fornicatio, immunditia, impudicitia, luxuria, quæ prædico vobis sicut prædixi, quoniam qui talia agunt regnum Dei non consequentur. Notandum homines voluptuosos mortuos esse, ergo & cecos, nam qui

Rom. 8.

moritur perdit videndi usum. Rom: 8. *Si secundum carnem*

carne vixeritis, moriemini. At dicet aliquis, multos reperiri peccatores, qui pollent ingenio, & aspectu oculorum, nec eos cæcos esse videmus. Cui ego respondeo. Oculos habent & non vident: cæci quidem sunt, sed non circa terrena & mundana, sed circa cœlestia & Diuina. quod adumbratum fuit, vbi Naas Ammonites pugnare cepit aduersus ciuitatem Iabes cui habitatores ciuitatis: *Habeo nos* (inquiunt) *fœderatos & seruiemus tibi.* In hoc (inquit Naas) *feriam vobiscum fœdus, vt etiam omnium vestrum oculos dextros, hos autem oculos postulabat, quia sinistri operiendi clypeis erant, dum bella gererent, atque adeo inhabiles prorsus ad prælia remanerent.* Hoc idem Tartareus hostis in hominibus efficit, vt scilicet oculos tantum sinistros habeant, ad temporalia nempe, & non dextros ad Diuina, sicuti plures sunt, qui ad bona ista acquirenda, lynceos oculos habent, talpeos verò ad suprema, & speciatim ad præliandum aduersus animæ hostes. Multi igitur in rebus temporalibus perspicacem visum interiorem habent, in spiritualibus verò cæci sunt, & hi similes dicuntur, primò noctuis & vespertilionibus, qui in tenebris nocturnis rectè vident, & volant, & in luce diei cæcutiunt, sic multi in tenebris peccatores, minutissima quædam perspiciunt puncta, scilicet honoris, quæ vix cerni posse videntur, & vsuras palliatas, quæ vix vsuræ, sed iusti contractus apparent, &c. Item similes dicuntur talpis, quæ per meatus terræ occultos discurrentes, inter obscura terræ, videre ipsas ferunt, ad lumen verò deductæ, cæcæ omnino sunt, sic mundani peccatores in rebus terrenis, intelligunt, discurrunt, percipiunt cuncta, quantumvis intelle-

I, Reg: II.

*Labata in
suis commu-
nibus locis.*

Simile.

Pp

etū dif-

At difficultia sint, in his verò quæ luce clariora videntur, quæque animæ salutem conducunt, ita cæcutiunt, ut vix rudimenta Christianæ religionis attingant, quo quid infelicius? Præterea similes sunt miluis. Miluus enim velocissimè volat, & acutè ac perspicaciter videt, sed tamen volatus eius, & visus acies, ad quid quæso illi deseruiunt, nisi ad capiendos pullos paruos, & lacertas viles, seu mures, ardeas verò vel perdices, & alias similes aues nequaquam: sic etiam mundani peccatores, ad honores, diuitias, & delicias, & bona mundi, quæ comparatione bonorum spiritualium minima & vilissima bona sunt, perspicaces & acutissimi sunt, ad spiritualia verò vespertiliones sunt. Præterea similes sunt piscibus, qui per semitas maris natant velociter, imò volare videntur, ad hoc enim illis natura tribuit alas, sed tamen ad ripam educti, palpitare eos videbis, & è loco se mouere non valent: sic sapientes sæculi huius, in his quæ mundi sunt volare mente & ingenio videntur, at in rebus spiritualibus omnino cæcutiunt, sciunt peccare, & dum ad confessionem accedunt, sua scelera confiteri ignorant. Cæci igitur sunt omnes peccatores iniquitatem operantes. Quid igitur illis faciendum est. Egreantur de Iericho (quod lunam significat) id est de mundanis & terrenis voluptatibus, quæ citissimè lunari mutatione conuertuntur in fellis amaritudinem, & sedeant secus viam, qua graditur Christus, voce magna clamantes Iesus Christe fili David miserere nobis, & cum interrogati fueritis quid petatis? Domine ut videamus, respondeatis. Ovtinam aliquando oculos vestros aperiatis peccatores, & videatis quæ & quanta

*Miluus acutū
habet visum, sed ad
capiendos
paruos pullos*

Conclusio.

quanta, vos in inferno expectant tormenta, sed heu hæc modo sunt abscondita ab oculis vestris. Vtinam videatis vos periculis maximis obnoxios, a Domino Deo abiectos, a dæmonibus circumdatos. Vtinam videatis virtutum pulchritudinem, & vitiorum turpitudinem, vtinam videatis bona cœlestia, quæ propter modicam carnis delectationem amisistis. Vtinam videatis quam multorum malorum fons & origo existat peccatum, & quam fertilis mater virtus donorum cœlestium. Vtinam videatis & intelligatis rerum terrenarum vanitatem, & spiritus afflictionem ex illis promanantem. Sed ad te meum conuerto sermonem bone IESU; aperi oculos, vt videant tua erga semetipsos, exhibita beneficia, & sua contra præcepta tua perpetrata vitia. Vt videant quia homines sunt breui morituri, & in æternum ni resipiscant perituri, vt videant terrena bona quæ magno cum animi affectu congregant se derelicturos, & nudos sicut nudi nati sunt in terram reuersuros. Vt videant dum animam suam peccatorum sordibus maculant, se efficere pulchra plena vermicibus & spurcitiis, mancipia diaboli, & vasa iræ & furoris tui. Præstabit hoc Omnipotens & misericors

Dominus, si vos ad eum contuleritis, ex toto corde, & voce dolorosa Christum interpellare vo-

lueritis dicentes: IESU Christe fili David mi-

serere nobis. Cui laus & gloria cum Deo

Patre, & Sancto Spiritu sine fine.

AMEN.

ORATIO ECCLESIASTICA

In Dominica I. Quadragesima

Tunc reliquit eum diabolus, & ecce Angeli accesserunt & ministrabant ei. Matth. 4.

Summa Con-
cionis.

Diabolum non esse causam peccati pulchre docetur.

Antiquis dia-
bolus sum no-
terrori fuit.

Summum timorem imò & terrorem antiquitus hominibus Elephantes incutiebant, adeò vt supremi Duces eos vehementer formidarent, victosque se exhiberent ad illorum præsentiam. Nam fortissimum quemque militem, tuba (quam quidam proboscidem, alii promuscidem vocant) capientes ita ad parietem, vel ad terram allidebant: ac si levis mollisque cucurbita fuisset. Omnis tamen timor depulsus est, quando inquit Plinius lib: 8. cap: 7. in bello, quod Pyrrhus agebat, miles quidam valido gladio, aut ense vsus proboscidem, aut tubam illam fortem vnico ictu abscidit, quo facinore iam omnibus fuit manifestum, facile esse Elephantum superare, si quis valide pugnare, & gladio vti voluerit. Ita sane diabolus ingentem terrorem ingerebat, antiquis hominibus, quoniam videbant illum potentiz suæ vi. egregios deiecisse viros, & exturbasse veluti: Adamum, Samsonem, Dauidem, Salomonem, &c. cuius

eius propterea congressum reformidabant omnes. Nunc autem Christus Dominus cœlestis militiæ Dux, in arenam cum hac sæuissima bellua descendit, & vsus gladio verbi Dei, eius tubam aut proboscidem abscidit, dum omnes eius machinas enervauit, cumque ab omnibus facile superari posse docuit. Hinc colligere licet nullum locum eorum excusationem in extremo Dei iudicio habituram, qui dum de peccatis commissis arguuntur, dæmonē impellente ea se perpetrasse, & non sponte sua mentiuntur, quod pulcherimis rationibus fufius illustrare placet. Faucte mente & auribus.

AVE MARIA.

TErrimum dæmonem non posse suis fraudulentis persuasionibus, pro sua voluntate hominem in peccatum inducere, Christus Dominus suo exemplo (vt dixi) manifeste declarauit, qui vt homo a diabolo tentatus, & ad pugnam prouocatus fortiter manus cum eo conseruit, & tribus vicibus eius in se proiecta tela in eum ipsum retorsit, omnibus manifestum faciens, diabolum ab homine Christiano facili negotio vinci & prosterni posse. Adeo enim malum dæmonem Christus profligauit, vt eum eiiceret foras, omnique eum potestate & omnibus viribus spoliaret, & hoc tripliciter, vt quidam Theologorum dicunt. 1. Quoad potestatem trahentem, quia iam amplius non potest sanctos trahere ad lymbum postquam tractos amisit. Zach. 9. Tu autem in sanguine testamenti, eduxisti viuitos de lacu. 2. Quoad potestatem impellentem. Ezech. 30. Confregisti brachium Pharaonis. Ezech. 30.

Christus Dominus suo exemplo docet diabolum esse superabilem.

Triplici potestate spoliatus. Christus.

Zach. 9. Ezech. 30.

raonis. 3. Quoad potestatem possidentem expulsus est enim a cordibus humanis possidendis. Luc. 11.

LUC. 11.

Cum fortis armatus custodit atrium suum, in pace sunt ea quæ possidet: si autem fortior eo superveniens vicerit eum, universa arma eius auferet, & spolia eius distribuet. Vincitur igitur diabolus facile tanquam inermis, cuius omnes vires debilitavit Christus Dominus, nam quomodo victoriam assequi poterit ille, cui potestas vincendi ablata est? Canem forti ferrea catena statux alligatum,

Simile.

quis affirmabit posse per viam transeuntes morsu lacerare? diabolus hoc modo alligatus esse legitur, quomodo ergo poterit in Christianos ad cælum vi-

Apo. 20.

am arripientes irruere? Apoc. 20. Et vidi Angelum descendentem de cælo, habentem clavem Abyssi, & catenam magnam in manu sua. Et apprehendit draconem serpentem antiquum, qui est diabolus, & Sathanas & ligavit eum, &c. Igitur sicut canis alligatus homines latratu terret, sed non mordet, sic diabolus à longè homini hoc vel illud vitium amplectendum persuadet, sed animam peccati morsu afficere non prævalet. Adhuc. Fortior est gratia Dei, quam tentatio diaboli, & ratio est, nam donum Dei & opus eius perfectius, & nobilius est, quam opus vnius latronis abiectissimi, nempe teterrimi dæmonis, sed homo Christi antequam peccati mortalis labe inficitur, habet in se gratiam Dei, quam solum vulnus animæ lethale auferre potest iuxta illud: Anima quæ peccaverit ipsa morietur, ergo diabolus non potest hominem in peccatum inducere, tam forti scuto diuinæ gratiæ sese protegētem. 2. Cor. 11.

Fortior est
gratia Dei
quā tentatio
diaboli.

2. Cor. C.
12.

Et ne magnitudo revelationum extollat me, datus est mihi stimulus carnis meæ, qui me colaphiset, propter quod ter dominum rogaui, ut discederet à me, & dixit mihi, sufficit tibi gratia mea. Non autem

tem gratia Dei ei sufficeret, si per eam mortale peccatum euitare non posset. Præterea sic argumentor. Qui potest illud quod est difficile, multo magis poterit illud quod est facilius, sed homo potest resistere carni, quæ pugna est difficilior, quàm cum dæmone, tum quia proximior, & diuturnior, tum quia domestica, tum quia caro chara, iucunda, & grata, diabolus vero odibilis, tum quia noscitur esse hostis, tum quia nos non semper tentat, sed semel atque iterum victus recedit. Quod autem possit homo vincere carnem probatur. Gen: 4. *Sub te erit appetitus tuus*, id est in potestate tua habebis affectus tuos & appetitus sensuales. Legitur Iacobi 4. *Resistite diabolo & fugiet à vobis*. Ille ob cuius pugnam & resistantiam alius fugit, habet victoriam super illum qui fugit, sed pugnante homine, & tentationi resistente diabolus fugit, ergo &c. Sed dices minor potestas non potest maiori potestati resistere, sed potestas dæmonis est maior quàm potestas hominis, quia ut dicitur. Iob. 4. *Non est potestas super terram, quæ ei comparetur*. Respondeo id verum esse, tamen quantum ad aliquid non esse maiorem scilicet quantum ad liberum arbitrium, quod nulla vi potest cogi, nam homo est dominus suorum actuum per liberum arbitrium non dæmon. Sed & hoc dignum notatu est. Nullam tentationem Deum immittere in hominem, quam ille non possit vincere, ergo semper vincere potest: nunquam autem vinci; 1. Cor. 10. *Fidelis autem Deus est, qui non patietur vos tentari supra id, quod potestis, sed faciet etiam cum tentatione prouentum, ut sustinere possitis*. Rectè S. Hieronymus inquit. De consensu nostro vires accipit inimicus, nostroq; nos ut dici solet, iugulat gladio. Non adiuvemus,

Gen. 4.

Iac. 4.

Nunquā homo supra vires tentatur.

Epistola ad Demet. viii

mus, sed vincamus aduersarios, dant illi quidem cō-
 silium, sed nostrum est, vel eligere, vel respuere,
 quod suggerunt. Non enim cogendo, sed suadendo
 nocent, non extorquent à nobis consensum sed ex-
 petunt. Hoc quoque ipsi veritati consentaneum es-
 se ipsa ratio indicat, eum cum quo Deus pugnat, sem-
 per cum victoria ex acie discedere. Nam & Deus no-
 bis cum quis contra nos, quis præualebit aduersus e-
 lectos Dei. *I. Reg: 17.* Tu venis ad me, inquit Dauid, ad Philisteum,
 cum gladio & hasta, & clypeo, ego autem venio ad te, in nomine
 Domini exercituum. &c. & dabit te Dominus in manu mea, &
 percutiam te, & auferam caput tuum à te. & quoniam manus
 Domini erat cum Dauid, vicit, Philisteum, & caput
 eius amputauit, inuincibilis enim est, cui Deus in
 pugnam properanti adhæret. Circa annum Christi
 498. cum Germani Francis nollent amplius tributa-
 rii esse, & subditi, Clodouæus eos magna vi armo-
 rum impetiit, valde dubio dimicauit aduersus eos
 Marte. Cumque admodum de salute, & de victoria
 periclitaretur, ad Christum se supplicem conuertit,
 obnixè rogans. O Domine Iesv Christe quem con-
 iux mea filium Dei nominat (erat enim Christia-
 na, dicta Crotildis, nata ex Burgundia, ipse autem
 adhuc Ethnicus) rogo, obsecro te ardentissimis vo-
 tis, velis mihi victoriam concedere, ego verò inte-
 credam, & baptismum promptissimo suscipiam ani-
 mo. Verba pondus habuere, adfuit Christus Ethni-
 co in auxilium, & contulit victoriæ beneficium. Na-
 ctus igitur victoriam, quod vouens Domino Deo
 promisit, effectu ipso exhibuit, baptizatusque est cum
 multis militum suorum, & aulicorum copiis. O quā
 igitur facile vincit, qui Christum in acie præsentem
 habet,

habet quoniam verò suis fidelibus Christus Dominus suum auxilium promisit, cum dixit. Ego vobiscum sum, usque ad consumationem sæculi, quis de victoria, tam potenti Domino, & tam fortissimo duce adiuumentum præbere desperabit? Demum quod homo possit in certamine semper superior dæmone euadere patet, quia contra dæmonem Angelo custode suo sese adiuuante ad præliandum, cum dracone progreditur, sine dubio Angelico suffultus auxilio certam victoriam assecuturus, tum quia Angelorum fortitudo in bellis semper admirabilis extitit, (vt cum centum octoginta millia in exercitu Syriorum interficeret) tum quia nec Hercules contra duos, poterit quidquam præualere. Angelus cum homine, vnum tetrimum dæmonem, facile repellere, & ad fugam arripiendam cōpellere poterunt, quippe Angeli nos ab omnibus insidiis inimicorum visibilium & invisibilium defendunt, & pro viribus liberare contendunt, iuxta illud Prophetæ. *Immittet Angelus Domini in circuitu timentium eum, & eripiet eos*, hoc est, per circuitum timentium Dominum, Angelus eorum, ad illorum auxilium & protectionem deputatus sese immittet, & velut castra metabitur per circuitum eorum, ne possint ad nocendum illis accedere aduersarii, immittet etiam Angelus, & incutiet timorem, & terrorem in circuitu seruorum Dei in aduersarios, qui vndeque circumdederunt eos, & eripiet inquit eos; id est, non cōtrahet manus quousque a periculis immunes eos relinquit. Habes præclara & satis expressa exempla in Elisæo. 4. Reg. 6. & in Iudith. cap. 13. quæ cum iuramento id asseruit. *Vinit Dominus, inquit, quia custodiuit me Angelus eius, & hinc*

Angelus hominem in pugna confortat.

Psal. 33.

*Lituani in-
uadunt Re-
gnum Polo-
nia.*

*Angelo sup-
petias feren-
ce hostes pro
sternuntur.*

euntem, & ibi commorantem, & inde huc reuertentem. Anno Dni. 1282. Lituani Polonorum regis Leskonis Nigri regionem Lublin impetierunt irruptione, & spatio dierum 14. misere depopulati sunt, & splendendam prædam ceperunt, secumque in Lituaniam abduxerunt. Hoc ubi peruenit ad aures Regis Leskonis, protinus ex Cracouia se recepit, & Lublinum cum expeditione concessit, ac itinere collegit sex millium equitum copias: at offendit excessisse hostes & euasisse: ignarus igitur quid agendum, visione quadam noctu monebatur, ab Archangelo Michaeli, ut statim insequeretur hostes, potiturum enim ipsum victoria. Certiorem igitur huius negotii faciens Rex exercitum suum omnibus animum addit. Cum igitur hostem inectando, 13. Octobris cum præda onustum nacti essent, Lesko Rex suos magnanimis exhortatur dictis, velint pro Christiana religione, & patria fortiter dimicare: deinde irruit in hostes, & multos canes in illos concitat, qui hostes in fugam egerunt, ita ut ab hominibus & canibus maximum & irreparabile vitæ acceperint damnum. Recensitis autem Lesko militibus suis, non vnicum ex omnibus desiderauit, quem amisisset: & sic in veritate deprehendit fuisse Angelum sanctum qui hoc negotii illi dederit. In omni bello in quo Angelus Domini adest, victoria præ foribus stat. Tu igitur Christiane, memor habere te præsentem custodem Angelum inuicto semper animo hostem persequere, fugiet à te, tibi in manibus gloriosam relinquens victoriam, & sic tu legitime certans, æternam in cœlis mereberis accipere coronam. Si aliquis Imperator sciret, ex sua voluntate victoriam pendere, semper
victoria.

victoria potiretur, ô homo Christiane, ex tua voluntate de tuis hostibus pendet victoria. cur tibi illam yltro ex manibus eripi pateris? vnum verbum profer, nolo, non consentio, iam vicisti. Exemplis quoque idem declarare placet. Prodeat in medium S. Iob vir simplex ac timens Deum, recedensque ab omni malo, & ipse referat, vincibilis ac superabilis sit teterrimus dæmon nec ne? absque dubio facile eum posse vinci, & in angustias redigi respondebit, omni qui virium suarum potentia sine difficultate spoliandum affirmabit. Nam quis ignorat in hunc virum sanctum. teterrimum dæmonem, omnia nequissima sua tela aliquoties expediuisse, vt aliquo lethali vulnere animam eius inficeret, & ad blasphemandum nomen Domini Dei sui induceret? Iam illi numerosos greges abstulerat, diuitias eripuerat, filios dilectissimos, & filias repentina domus concussione interfecerat, vt aliquod impatientiæ signum in eo extorqueret; sed in omnibus his non peccauit Iob labiis suis, neque stultum quid contra Deum locutus est. Sed & ex his verbis elicere aliquem conceptum licet. Iob 40. *Ecce Behemoth quem feci tecum, fœnum sicut bos comedit*, ac si Dominus Deus diceret ad Iob. Ecce diabolus quem feci tecum, id est cui concessi, vt tecum in mundo maneret, cui & permisi, vt tecum congrediretur, tecum geret bellum, & omnes vires suas in te concuertet. Non tamen iniquum aliquid egi, quoniam etsi crudelis, immanis, & insuperabilis hæc bestia videatur, fœnum tamen, (id est bona terrena, diuitias, facultates, salutem, valetudinem corporis, & quæ ad mundi gloriam, & prosperitatem pertinent, quæ omnia fœnum dicuntur

*Variis modis
sanctum vi-
rum Iob, ex-
pugnandum
teterrimus
dæmon est
aggressus.*

Isa. 40.
*Omnis caro
 fœnum & o-
 mnis gloria
 eius quasi
 flos agri ex-
 seccatum est
 fœnum & ce-
 cidit flos.*

Iob. 2.
*Ecce in ma-
 nu tua est ve-
 rû tamen ani-
 mam eius ser-
 ua.*

*Sophrô.prat.
 sp. cap.66.*

propter inconstantiam, instabilitatem, & modicum valorem) comedit & consumit, potest inquam te-
 terimus dæmon substantiam & facultates quæ fœ-
 no comparantur deuorare, & solummodo vilia quæ-
 que & temporalia homini auferre, nullatenus au-
 tem potest Deo adiuuante, quæ magna & grandia
 sunt, id est animæ ornamenta, vel leuiter attingere:
 Sumitur etiam fœnum pro hominibus carnalibus,
 qui externa tantum gloria nitent, nullumque intrin-
 secus fructum referunt. Ita dicitur: *Cum apparuerim pec-
 catores sicut fœnum, & iterum. Fiant sicut fœnum testorum.* I-
 gitur dæmon tantum deuorat, & absomit homines
 carnales, deliciis deditos, fragiles, similes fœno, qui
 præsentia tantum cogitant, & externam solummo-
 do gloriam affectant, interius autem vacui sunt ro-
 bore ac virtute: non tamen vires habent contra vi-
 ros strenuos, qui pœnitentiæ operibus traditi, non
 solum non superantur ab eo, sed eum potius facile
 superant & reuincunt. Abbas Antonius dux Mona-
 sterii Æliotarum, qui etiam illud ædificauit, narra-
 uit nobis de Abbate Theodosio, quod senex ipse hæc
 de seipso narrabat. Priusquam ad vitam solitariam
 transissem, factus in extasi, aspexi virum quendam,
 cuius species claritatem solis vinceret. Hic tenens
 manum meam, veniait, quia pugnare & luctari te
 conuenit, & induxit me in theatrum plenum viris,
 ex vna parte candido amictu, ex alia vero nigro ve-
 stitis. Cum ergo iniecisset me in theatrum, aspicio
 virum miræ magnitudinis Æthiopem, cuius caput
 turpissimum penetrabat nubes. Tunc ait ad me iu-
 uenis ille qui mihi apparuerat: Cum hoc luctari te o-
 portet. Ego qui aspectu viri illius proceri territus
 eram,

eram, tremere, ac pauere capî, orabamque iuuenem illum splendidum, qui me induxerat in theatrum dicens. Quis hominum mortali conditione & infirmitate circumdatus, cum hoc luctari posset? Non ipsum vniuersum genus hominum, si in vnum confluat, huic resistere præualet. Ait autem ad me iuuenis ille præclarus. Prorsus cum illo te luctari opus est. Ingredere igitur cum omni alacritate, & fiducia: mox enim, vt illum adorsus fueris, ego adiutor ero, tibiue victoriæ coronam reponam. Vt ergo ad certamen sum ingressus, luctarique inuicem capimus, continuo præclarus ille Iudex, nostri certaminis adfuit, mihiue coronam dedit. Atq; plebs illa obscura, Æthiopumque multitudo ingens ciulantes euauerunt: pars vero reliqua candidorum, gratias illi, & laudes referebant, qui mihi adiumento fuerat, ac præclara victoria donauerat: O quam facilis volenti, & audenti congrédi cum dæmone victoria. Hunc sensum sequi visus est, idem S. Antonius, qui exploratam habebat sathanæ fortitudinē, qui monachis suis dicere solitus erat, illis qui recto corde Deum diligunt, vigilias sacras agunt, ieiunia amant, orationi intendunt, non esse hanc bestiam timendam, qui non solum non vincuntur ab ea, sed potius egregias de illa victorias reportant. Sed quid causæ est quod homo facile totus vincatur à diabolo? Attendite. Quemadmodum canis assistens mensæ, si videt hominem vescientem, subinde aliquid eorum, quæ in mensa sunt, ipsi proticientem, manet assidue. Quod si semel atque iterum sic astitit, vt discesserit nihil adeptus, protinus abstinet, veluti qui iam frustra & in calsum assistat: simili modo & diabolus iu-

lus iugiter nobis inhiat, si quod blasphemum verbum ipsi seu cani proiciamus, hoc accepto rursus aggreditur. Quod si perseueraueris gratias agere, vigilare, carnem fame & inedia castigare, celeriter dæmonem in fugam conuerteres, & posthæc coronam promereberis, quam vt vobis reddat iustus Iudex in illa die ex sincero corde precor. Dicatque omnis populus, fiat, fiat.

AMEN.

SECVNDA ORATIO ECCLESIASTICA

In eadem Dominica.

Summa
Concio-
nis.

Miles in bellum spirituale expeditur, cui in primis equus datur, postea arma conuenientia adhibentur, tandem vt in aciem progressus fortiter pugnet cum antiquo serpente, monetur.

Militia est vita hominis super terram, & quidem vehemens & assidua, quam nullum vnamquam temporis interuallum dirimit, nullus locus intermittit, nulla actio, nullum fœdus interrumpit. Nullus inquam locus eam dirimit, nam siue in Ecclesia, siue in foro, siue in cubiculo fueris, adest vbique locorum aduersarius quærens quem deuoret.

ret. Nullum tempus ab hoc bello vacuum: vulnerat enim malus dæmon, homines in iuuentute libidinis ardentibus sagittis, in virili ætate impetit, crudelitatis, ebrietatis, superbiz, aliorumque vitiorum telis, in senectute verò arcum suum tetendit, & parauit eum, arcum inquam auaritz, quippe sagittas suas ardentibus desideriis habendi, & congregandi bona temporalia efficit. O cruentum & vehementer metuendum bellum, cæterum quod nobis maiorem incutiat timorem illud est, quia non est nobis colluctatio aduersus carnem, & sanguinem sed aduersus principes tenebrarum, qui quidem adeò viribus præstant, vt non sit potestas super terram quæ eis comparetur, facti enim sunt vt nullum timerent, suntq; a multis annorum millibus huic bello assueti. Augget autem euentus huius belli formidinem, quia non de paleis, sed de totius hominis salute agitur. Verumenimvero ne aliquando in hoc bello succumbatis, sed semper Deo adiuuante victores euadatis, decreui apud animum meum in hodierna concione, militem Christianum qualiter in bellum illi sit proficiscendum declarare, Fauete.

*Non tum a-
qualibus no-
bis pugnand-
um.*

*Mali demo-
nis viterani
milites.*

AVE MARIA.

IN bellum militi proficiscenti est summopere necessarius equus, ipsa sacra scriptura, id manifestè approbante, Prou. 21. *Equus paratur ad diem belli, Dominus autem salutem tribuit.* Qualis vtique equus? talis qualem Sanctus Ioannes in sua Apocalypsi describere nititur, cap. 6. *Et vidi & ecce equus albus, & qui sedebat super eum habebat arcum, & data est ei corona, & exiit vincens vt*

Apocal.
Cap. 6.

vinceret

*Equus sym-
bolum gra-
tia diuina.*

*S. Paulus
quem equum
habuerit in
militia hu-
ius mundi.*

*Qui sit e-
quus albus.*

vinceret, & cap. 19. Et ecce equus albus, & qui sedebat super eum vocabatur fidelis & verax. Equum album esse certissimum gratia diuina indicium facile docebo. Sicut enim Pater diuitiis locupletissimus dilectum filium contra hostem expediens, hoc maxime prouidet, vt filio suo equum generosum tribuat, qui fortiter cum milite nouo in hostem irruat, nec facile quidquam trepidet, sed sua generositate, animum militi addat. Ita Deus Omnipotēs quo nullus ditior, sanctum Paulum aduersus vniuersum mundum, & eius Principes debellandos, inuicto & forti animo progredi mandans, videte qualem illi equum ad conterendas hostium vires, & ex illis victoriam reportandam, tribuat. *Sufficit inquit tibi gratia mea,* quod verò gratiam diuinam equus significet, res ipsa luce meridiana clarior est. Ezech. 39. *Saturabimini super mensam meam de equo & equite.* Quis eques vel equus alius super mensam Domini, nisi sacratissimum Eucharistia Sacramentum? eques diuinitatis, equus verò humanitatis euidentissimum symbolum existens, at iste eques & equus nunquam sumitur & habetur, à dignè suscipientibus illum, absque ingenti gratia diuina cumulo, saturabimini igitur super mensam Domini de equo & equite, cum gratia diuina muniti, terribiliores leonibus contra hostes progressi fueritis. Quòd autem ille equus albus fuerit, insinuat gratiam diuinam ea virtute abundare, vt omnem cui data fuerit efficiat ab omni turpitudine liberum, & immunem, pulchrum & candidum, vt de eius anima iure illud usurpari possit. *Tota pulchra es amica mea, & macula non est in te.* Efficat quoque hominem sincerum quod ille candor significat, vt ne sit duplici corde, loquaturq; dolum cum

cum proximo suo, nec sit venenum fraudis sub labi-
is eius. Fertur quædam avis esse Caladrius albi co-
loris, nullam habens partem nigredinis, cuius natu-
ra est talis, quod quando aliquis graui detinetur in-
firmitate, si ægritudo fuerit ad mortem, Caladrius
auertit faciem suam a sic ægrotante, & sine dubio,
tunc moritur homo, si autem infirmus debet conua-
lescere, Caladrius figit visum in ipsum, & intendit
in eum quasi applaudens ei. Tali gaudere priuile-
gio, cum quem gratia diuina illustrem fecit, patet.
ille enim absque omni dolo & mendacio veritati ad-
hæret. Si quis male in voluptatibus vitam traducens
degit, hunc non foelicem, vt adultores faciunt, sed
viuentem in deliciis mortuum appellat, sedque sibi
displicere, sui vultus auersione indicat, vel qui facit
superbiam, aliaque vitiorum perpetrat genera
cum hoc non edit, sed qui ambulat in via immacula-
ta, huic applaudens adhæret. Panthera est animal,
ex albo & nigro mixtum, & est animal pulchrum
per totum corpus, excepto capite, quod est distor-
tissimum, per triduum dormit cum est saturatum, de-
inde surgens emittit rugitum & odorem suauem, &
sic attrahit sibi multas bestias, quibus vescitur, sed
quia habet caput distortissimum, ideo ne aliæ bestię
ipsum accedere abhorreant, abscondit caput, ponens
illud inter pedes anteriores, circumspicit animalia
currentia, & animal consideratum velociter capit,
ipsum deuorando. O animal plenum dolo & fraude,
quod illa varietas coloris ex albo & nigro constans,
optime denotat, non militum Dei, sed stipendiario-
rum diaboli hoc est indicium, de quibus Christus.
Matt. 33. *Va vobis hypocritæ, qui similes estis sepulchris de alba-*

*Caladrius a-
uia.*

*Panthera
symbolum
hypocritæ.*

Re

tis, quæ

*Equus Dni.
sui hostem
deiecit,*

*ti, quæ foris apparent hominibus speciosa, interius vero plena sunt ossibus mortuorum, & omni parcitia. De equo Bucefalo olim oraculum fuisse prolatum legitur, cum quem Bucefalus scissorem passus fuerit, totius orbis dominum fore. Melius ego dicam, qui in equo diuinæ gratiæ pugnam cum hoste instituerit, cum victorem euasurum, & in regno cœlorum coronam habiturum. Memini me legisse duas de equis pulcherri-
mas historias, quæ quoniam rei nostræ illustrandæ, non modicum subministrabunt auxilium, eas in medium proferre placet. Memoria dignum est, quod à Niceta Choniata, de Alexan. Imperatore Græcorum (qui fratrem Isaacium optimè de eo meritum proditoriæ regno eiecerat, oculisque priuauerat) recensetur. Cum enim is è templo rediens, equum fratris conscendisset, ab eo veluti rationis & sensus esset capax, & Tyrannum ac Fratricidam agnosceret, hinnitu, & morsibus, & calcibus exagitatus, eius tandem dorso deiecit, & gemmata corona capite excutitur. Generosa etiam indoles fuit in equo Regis Antiochi. Cum enim Contraretrus Galata cum in prælio occidisset, & equum regium tanquam bello partum conscendisset; mox visus est equus sentire, tergo suo domini hostem insidere. Itaque dentibus apprehenso fræno, vt nulla ratione habenis iam regi posset, ad altissimum saxum citato cursu contēdit, atque se insidētemque sibi hostem præcipitauit, sua, domini sui mortem ultus. Sic in quo gratia diuina vacua fuerit, & qui dominum Deum sibi fauentem, & multoties dona cœlestia largientem contēpserit, hæc eadem gratia, quæ aliis datur in auxilium, illi erit in perpetuum exitium. Ierem. 5. c. Et
collidam*

collidam in te equum & equitem eius, & collidam in te currum & ascensorem eius. Hunc ergo equum vt habeatis omnem mouete lapidem, sine quo nihil poteritis efficere, nam omnes quidquid sumus gratia Dei sumus, hanc autem cum habueritis, omnia in eo qui vos confortat efficere poteritis. Sed quæ arma miles Christi habere teneatur videamus. Enumerat ea S. Paulus Apostolus ad Ephes. 6. *State succincti lumbos vestros.* Lumbos præcingimus ait S. Gregorius, cum carnis luxuriam per continentiam coarctamus. Hinc Christus vt doceret qua ratione balteum militare induere deberemus, in desertam solitudinem discessit, ibiq; dies, ac noctes, in summa rerum omnium paupertate traduxit, sine domo, sine lecto sine tecto, preces fundebat ad Patrem, ieiuniis corpus sacrosanctum macerabat. Post balteum præcipit Sanctus Apostolus, vt scutum amplectamur. *Sumentes scutum fidei.* Fide quippe opus est, vt in Deo fiduciam nostram collocemus, & in nobismetipsis diffidamus, credentes omnia quæ nobis seruanda præcipit Ecclesia. Irruit in te teterrimus dæmon, & efficere nititur, vt abiecta animi submissione, elatos sumas spiritus, sume scutum fidei, si credis Ecclesiæ Christi, verba tibi deferenti: Qui se humiliat exaltabitur, & statim a te fugiet diabolus, & sic de aliis &c. *Galeam salutis sumite.* Insinuans homini præ oculis dum pugnat, æternam in mente beatitudinem tenendam, ne eam pro vili carnis voluptate amittere præsumat. Insuper monet Apostolus vt sumamus, *gladium Spiritus quod est verbum Dei.* Si te hostis ad crapulam & ebrietatem inuitauerit Christiane, responde. Scriptum est & toties in Concionibus proclamatum. *Attendite ne gra-*

*Hom. 13. in
Euang.*

Scutum fidei

LUC. 21.

uentur corda vestra in crapula, & ebrietate. Sed omnium armorum potentissimæ & fortissimæ sunt lacrymæ in orationibus ardentibus coram Domino Deo profusæ. Quid ita? Stetit Iudith ante lectum orans cum lacrymis &c. & percussit, bis in ceruicem Holofernis, & abscidit caput eius. Aman consurrexit in Iudæos, & vt omnes vna die neci darentur facile apud Regem obtinuit, contra quem gens Iudæorum non in equis nec in curribus, sed in nomine Dei plangentes in orationibus progressi, victoria sunt potiti dicitur enim Ester

Ester 3.

3. Quæ cum audisset Mardocheus, scidit vestimenta sua, & indutus est sacco, & in platea ciuitatis voce magna clamabat, & hoc ciuitatibusque ad fores palatii gradiens. In omnibus quoque prouinciis, oppidis, ac locis ad quæ crudele Regis dogma peruenerat planctus ingens erat apud Iudæos, & ecce paulo post suspenditur crudelis Aman. Simili modo contra dæmonem debellandum, nihil fortius oratione, lacrymis & inedia: quippe hoc genus demonii non eiicitur, nisi in oratione & ieiunio. Vidistis aliquando ex tormentis bellicis puluere tormentario eiectos globos hostium cohortes deprimere & delere? quid aliud sunt lacrymæ, nisi

Lacrymæ sūt
globi ex tor-
mentis bellicis
puluere igni
to emissi.

tormentorum bellicorum globi? Sicut enim illi globi, puluere & igne eiecti, magnam stragem in hostium exercitu faciunt, sic lacrymæ igne feruentis in Deum charitatis, & puluere profundæ humilitatis ex oculis prouocatæ, magnum pondus ad teterrimum dæmonem debellandum in se continent. Sed non sufficit militem, equum, & arma habere, nisi pugnauerit, nam si otiosus manserit, boni militis nomen, nunquam apud homines obtinebit. Militia enim est vita hominis, ergo in ea pugnandum, quod idem a nobis sacra scriptura exposcit. Eccl. 2. *Fili accedens*

Eccl. 2.

cedens

cedens ad seruitutem Dei, sta in iustitia, & timore, & præpara animam tuam ad tentationem. 1. Pet. 5. Sobrii esote & vigilate quia aduersarius vester diabolus tanquam Leo rugiens circuit, querens quem deuoret, cui resistite fortes in fide. & illud. Estote fortes in bello, & pugnate cum antiquo serpente, vt accipiatis coronam vitæ. Pugnandum ergo nobis est O Christiani. nemo enim coronabitur, nisi qui legitime certauerit. In S. Antonium Eremitam teste Atanasio, in eius vita, maximas tentationes permiserat Christus Dominus, cui post dura, diuturnaue cum dæmonibus certamina (à quibus ad mortem vsque multiplicibus plagis confectus erat) tandem lucidissimus quidam de cælo radius illuxit, in signum fugatæ turbæ dæmonum, & præsentia Christi, ac mox ex imo pectore longa trahens suspiria, his verbis compellauit Christum Dominum: Iesv vbi quæso eras, cum tam immanes plagas corpore meo exciperem? Qui respondit, eram præsens, ô Antoni, & certamè quod excelso inuictoque animo gessisti spectabam. Nunc ergo quia tanta constantia pro mei nominis amore decertasti, ego vicissim nomen tuum toto terrarum orbe celeberrimum reddam. O quam gratum Deo & Angelis spectaculum, fortis cum dæmone pugna. O quam ingens præmium militi pugnanti à Deo tribuendum. Vincenti enim dabitur edere de manna, & nomen nouum, vt cum adorent omnes tribus terræ, & Reges seruiant ei. Quis igitur tardus & piger, ad fortiter cum suis hostibus dimicandum erit, præsentem tã excelso inspectore Christo Domino. Pulchrum est militem in conspectu Regis strenuè, manus cum hoste conferere, pulchrius irruentibus hostium turmis loco non cedere, pulcherrimum virtutis opus,

1. Pet. c. 5.

Fortitudo
Antonii in
pugna spiri-
tuali.

Christus a-
dest præsens
fortiter pu-
gnantibus.

Rr 3

hostem

hostem in fugam vertere. O quam ergo iucundum offers Deo sacrificium Christiane, dum irruentibus in te demonum cohortibus fortiter resistis, hinc quoque oritur Angelis ingens gaudium, hosti confusio & opprobrium, tibi ipsi internum hic in terris solatium, & posthac æternum in cœlis præmium. Dici-

Pisces mugilis est mirabiliter agilis.

tur de pisce Mugile, qui quidem piscis est mirabiliter agilis, hic dum insidias piscatorum sentit, statim retrocedit, & ita transilit, vt adesse astantibus videatur. Ille igitur piscis insidias sentit, qui insurgentes tentationes perpendit, & tunc quasi retrocedit, cum ab occasionibus tentationum se subtrahit, & tunc velocissime transilit, quando in ipso tentationis principio mox animum ab ea auertit, vnde Isidorus dicit. Cum te titillat cogitatio, cum tibi ali-

Principiis obsta sero medicina paratur.

quid suggerit illicitum, non ibi teneas animum, calca serpentis caput, calca prauæ cogitationis initium. Aper bellua immanis, & rationis experts, prouida tamen periculi, tribus modis se munit contra venatores, primo duriores corporis partem opponendo, nam in latere suo dextro locum durissimum habet, quem semper opponit venabulo persequentis, & tanquam clypeum validum, illum locum semper obicit. Sic & vos contra tentationum impetus duritiem, id est asperitatem corporis obicite secundum illud. Psal. *Ego autem cum mihi molesti essent induebar cilicio.* Hoc sane Christus Dominus ostendere nititur,

Castigatione corporis hostis vincendus.

in campum cum satana descendens, qui Spiritu Splenus, ieiunio valido, & orationibus feruentissimis intentus, ita eum superauit, vt ostendat, facillimum nobis esse, diuino fauore munitis superare eundem, quantumcunque insuperabilis videatur. Item aper se munit,

se munit, dentes suos ad arborem acuendo, sciens enim sibi imminere periculum, acuit culmos ad arbores eos fricans, & fricando eos probat, si bene incidunt, quibus postea pro gladio vtens, omne quod ferit, laniando dirumpit. Hi culmi sunt virtutes pœnitentis, quæ acuantur cum ad arbores fricantur, quasi enim culmos suos ad arbores fricare, est suas virtutes proprias sanctorum & fortium virorum cōparare virtutibus, quibus illorum exemplo fortiores reddantur homines. Item aper se munit origanum masticando, nam si dentes fricando ad arbores hebetes cognouerit, herbam origanum quærit, cuius virtute masticando dentes acuit. Origanum itaq; est verbum Dei, cuius masticatione id est consideratione, contra tentationes anima præmunitur. Si enim tibi superbix & elationis cogitationes obrepunt, statim occurrere debes cum gladio salutis, & quam primum a mente tua refecare dicenſ. *Qui se exaltat humiliabitur*, & sic de aliis vitiis. Hoc etiam vsus est gladio, Christus Dominus in hodierna pugna quā iniit cum hoste: ter illum diabolus oppugnauit, & ter illi obstitit verbo Dei, & sacræ scripturæ testimoniis. Si igitur bonum certamen certaueritis, cursum consumaueritis, fidem seruaueritis, reponetur vobis corona iustitiæ, quā reddet vobis iustus Iudex. Cui laus in æternum. AMEN.

Quid sit origanum masticari.

ORA-

ORATIO ECCLESIASTICA

In Dominica II. Quadragesimæ

Et duxit illos in montem excelsum seorsum. Matt. 17.

*Summa Con-
cionis.*

Ostenditur hanc transfigurationem Domini, Arcanum fuisse consilium, seu Comitia tacita, & quis Primas Regni, quis magnus Cancellarius, supremusque Marsalcus sit, pulchre aperitur.

*Hieroglyphy
cum consilii.*

Consilia de rebus magnis esse occultanda veteres docuerunt, qui Plutonem pingebant galeatum & proserpinam rapientem, tum quod subterranea quorum Deus dicitur Pluto, latent absconditaque sint, tum quia raptus clam fiunt, tum denique quod cum in capite consilii sedes esse putetur, galea illud tegens apte consiliorum occultationem significet. Romanis quoque fuisse consilii domum subterraneam, & in altari aquilam cum crista galli collocatam, monumenta literarum testantur, quippe consilia de re graui, sunt in occulto capienda, & qui alteri vult consilio prodesse, aquilino visu cuncta introspeciat, gallum quoque noctu vigilantissimum in illis exequendis, vel in impedimentis remouendis imitari studeat. Sed & hodierna die Christus de rebus magnis consilium initurus petit locum seorsuum, sapientissimum quæq; participem illius consilii destinat. Attendite, AVE

AVE MARIA.

Consilia inquam arcana in loco seorsuo esse peragenda quotidiana consuetudo edocet, hodiernum quoque consilium, non alia via fuisse celebratum, sancti Euangelii lectio insinuat, inquit enim. Matt. 17. *Et duxit illos in montem excelsum seorsum.* Assumuntur præterea ad consilium arcanum, præcipui quique ex Senatoribus, qui & rerum variarum cognitione cæteris superiores sint, & autoritate officii, maioriq[ue] ingenii acumine, reliquis excellentiores habeantur. Verum neque hoc ab hodierno consilio abfuisse manifestum est, dicitur enim. *Assumpsit Iesus Petrum, & Iacobum, & Ioannem fratrem eius*, apparuit quoque Elias & Moyses loquentes cum eo. Primas primusq[ue] Princeps Regni fuit. S. Petrus, Christi interris Vicarius, eiusq[ue] gregis Pastor præcipuus, idq[ue] conuenienti ratione illustrare placet. Matt. 16. *Tu es Petrus, & super hanc petram ædificabo Ecclesiam meam, & tibi dabo claues regni cælorum, & quodcunque ligaueris super terram, erit ligatum & in cælis, & quodcunque solueris super terram, erit solutum & in cælis.* Quorum verborum planus & obuius sensus est, vt intelligamus sub duabus Metaphoris promissum Petro, totius Ecclesiæ principatum. Prima Metaphora est fundamenti ac ædificii: quod enim est in ædificio fundamentum, id est in corpore caput, in ciuitate rector, rex in regno, Pater familias in domo. Posterior est clauium, cui enim traduntur claues ciuitatis, ille instituitur Rex vel certe gubernator ciuitatis, qui quos vult admittat, quos vult excludat. Idem sonat & illa verba. Ioa. 21.

Arcana consilia sunt celebranda in loco secreto. Præcipui vi ad consilium assumendi.

Matt. 16.

Bellarminus de primatu Petri.

Ioa. I.

Luc. 12.

Quid hoc
verbum pa-
scere signifi-
cet.

Primas regni
quisnam fue-
rit ostenditur

Cancellarius
magnus fuit
S. Ioannes
Euangelista.

Simon Ioannis pascere oues meas. Pascere intelligitur, non tantum qui cibum alteri aliqua ratione ministrat: sed qui procurat ac prouidet alteri cibum: quod certe præpositi ac gubernatoris est. Luc. 12. *Quis putas est israelis dispensator ac prudens, quem constituit Dominus super familiam suam, ut det illis in tempore tritici mensuram?* Itaque illius est pascere, qui est super familiam constitutus. Deinde per verbum *Pasce*, intelligitur ex communi vsu loquentium, omnis actus pastoralis. Id est enim pascere, quod agere pastorem, siue esse pastorem. Porro actus Pastoralis, non est tantum præbere cibum, sed etiam ducere, reducere, tueri, præesse, regere, castigare. Quid? Pastores ouium, non solum pabulum illis præbent? nonne etiam regunt, & baculo cogunt ut pareant? Primas igitur Primusque Princeps Regni fuisse S. Petrus, in hoc consilio & vbiq; concluditur. Cancellarii magni munere functum fuisse, S. Ioannem Euangelistam liquide patet, (qui etiam huic arcano consilio adfuit) illud enim Cancellarii inter cætera officium præcipuum est, scribendis literis inuigilare, & ad quem perferendæ sunt, sine mora transmittere, at de S. Ioanne legimus. I. Apo. *Fui in Spiritu in Dominica die, & audiri vocem post me magnam, tanquam tubæ dicentis, quod vides scribe in libro, & mitte septem Ecclesiis quæ sunt in Asia, & infra. Scribe ergo quæ vidisti, & quæ sunt, & quæ oportet fieri post hæc.* Ex numero Senatorum fuit vnus S. Iacobus, qui nomine omnium consilio huic arcano assensum præbuit. Apostolos vero esse Senatoria dignitate fulgentes, manifestè Christi verba affirmant. *Vos qui secuti estis me, sedebitis super sedes duodecim, &c.* Aderat & Dux belli fortissimus, Moyses inquam fidelis seruus Dei, qui adiuuante Domino

Domino Pharaonem Regem Egypti, & exercitum eius confregit, vicit, & in mari rubro submersit, populumque israel ex victoria de hostibus reportata, triumphantem in manu forti, & brachio excelso eduxit. Cui etiam a Domino dictum est. *Veni, & mittam te ad Pharaonem, ut educas populum meum filios Israel, de Egypto.* Insuper Secretarius Magnus, & in consiliis dandis vir magnæ sapientiæ, Elias, consilio huic admissus fuisse perhibetur, de quo olim præclarum encomium dictum est. *Optima propositio, quam locutus est Elias.* Sed dicet aliquis, qua de re hoc consilium arcanum agitatum fuit? Respondeo, de bello, ab hostibus inferendo, quisque in medium suam afferebat sententiam. Ac inprimis Christus Dominus dignitate & auctoritate regia præfulgens inquit. Meis omnibus discipulis toto vitæ tempore pugnandum esse assero, neminemque coronandum nisi qui legitime certauerit, proclamo. Pugnam vero illam duplicem fore. Externam aliam, aliam internam, hanc contra Spiritus, & Principes, rectoresque, tenebrarum harum, illam contra homines peruersos & iniquos quippe, tradent vos in tribulationem, & occident vos, & eritis odio omnibus gentibus, propter nomen meum, & tradent enim vos in conciliis, & in synagogis suis, flagellabunt vos, & ad præfides, & ad Reges ducimini, propter me in testimonium illis, & gentibus, tradet autem frater fratrem, & Pater filium, & insurgent filii in parentes, & morte eos afficient. Nolite arbitrari, quod pacem venerim mittere in mundum, non veni pacem mittere, sed gladium? (O bellum cruentum.) Pugnandum quoque erit aduersus carnem, mundum, & dæmonem, qui sicut Leo rugiens circumit quærens quem deuoret. Ad hæc Moyses. Optima Christi propositio, regnum enim cælorum vim pati-

Secretarius magnus.

3. Reg. 18.

Christi vocationem seu sententiam.

Matt. 24.
10.

*Moyſes ſen-
tentiā ſuā
profert.*

*Elias loqui-
tur.*

*S. Ioa. Chry.
ſoſt. hom. 57.*

tur, & violenti rapiunt illud, qui vero poſtpoſita militia mollibus veſtiuntur in domibus regum ſunt, & non in domo Dei regnabunt. Idcirco o Apoſtoli, hoc bellum in Chriſti nomine ſubituri, eſtote forti & inuiſto animo, aderit enim Dominus in auxilium, & non elongabitur à vobis, ne metuatſis quod inermes contra armatos, ſtulti contra ſapientes, ignobiles contra nobiles, debiles contra potentes in aciem progreſſuri ſitis. Nam ſicut & mihi contra Pharaonem, ita & vobis de cœlo veniet, & non tardabit Dominus in acie auxilium, eligit enim Deus deſpecta mundi, vt confundat ſublimia, & aſſumit inſipientes, vt confundat ſapientes, erit Dominus in ore veſtro, & docebit vos quid locuturi ſitis. Elias quoque inquit. Surgite ſicut ignis, leonibus terribiliores, zeloque diuini cultus accenſi neminem metuatis, procedite obuiam Regibus, illorumque impietatem arguite, fortes reſiſtite hoſtibus in fide, & fugient à vobis. Dominus vobis aderit in auxilium, etſi opus fuerit, etiam igne de cœlo emiſſo, iniurias veſtras vlturus, & hoſtes proſtigaturus. Et cum ſic inuicē loquerētur corda Apoſtolorum igne diuini amoris inſlāmantur, & vt magis magiſq; ad difficultates bellorum ſubeundas accenderētur, *Trāſfiguratus eſt ante eos*, ac ſi diceret? Trepidatiſ milites bellum hoc laborioſum ſubire? en videte ſtipēdium veſtrum, & præmium laborum veſtrorum, ſi enim ſtrenue pugnaueritis, & victoriam reportaueritis, mihi ſimiles eritis, fulgebitis ſicut ſol, & ſicut ſcintillæ in arundinetis diſcurreritis. Reſtē S. Ioannes Chryſ. Hom. 57. in Matt. Quoniam multa de periculis, multa de paſſione ſua, multa de morte, & de cæde diſcipulorum locutus

entus est Dominus : & aspera complura atque ardua
eis iniunxit, & illa quidem in præsentī vita, & iam
imminebant: bona vero in spe & expectatione e-
rant: vt puta quia seruarent animam suam, si per-
derent eam, quia in gloria Patris sui venturus sit,
præmia redditurus: vt visu etiam certiores faceret,
& ostenderet, quid nam sit illa gloria cum qua ven-
turus est, quantum capere poterant in hac præsentī
vita illis ostendit, eamque detegit, ne aut sua, aut
domini morte doleant, & maxime Petrus. Hactenus
S. Chrysostomus. Præterea insinuat Christus Domi-
nus, admirabilem erga genus humanum amorem
suum & inquit. En ego quam pulcher sum, amore
tamen vestri breue post tempus, sputis sum detur-
pandus, funibus constringendus, & pedibus homi-
num calcandus, vtique Rex & Dominus vester, vos
discipuli mei, paria subire erubescetis? Ego cuius
nunc facies vobis ipsis præsentibus refulget sicut
sol, amore vnus dabo maxillam percutienti me, non
fulgorem lucidum, sed liuorem & cruorem in vultu
meo paulo post spectabitis, & caput meum, quod
nunc lucens splendor exornat, spinis laceratum &
arundine percussum spectabitis. Vos mei amore qui
estis homines de terra creati: & in terram reuersuri,
non etiam parem conditionem subire tentabitis?
Ego de quo Pater cœlestis bonum præbet testimoni-
um, quod illi in me complacuit, & quod sim dilectus
eius filius, tamen propter amorem vestrum assimila-
bor, homini grauissima peccata habenti, videbitis
enim me sicut peccatorem inter duos latrones pen-
dentem, præ doloribus gementem, & in angustiis
morientem? Vos qui estis in iniquitate concepti: &

*Christus suam
gloriam ma-
nifestat, vt
eis leuia tor-
menta futu-
ra efficiat*

in peccatis concepit vos mater vestra, non eadem
 mensura recompensare tantam gratiam studebitis?
 Ego cuius vestimenta alba facta sunt sicut nix, pro-
 pter vos & propter vestram salutem, adeo nudus
 virgis & flagellis cruciabor, ut a planta pedis usque
 ad verticem capitis, non erit in me sanitas? Vos
 non ibitis gaudetes ad contumelias, & flagella pro-
 pter me sustinenda? O utinam hac tua transfigura-
 tione bone IESU, ut olim Apostoli ad fortiter cum
 hostibus dimicandum commoveamur. Utinam amore
 tui ardeamus, ardentes in odore vnguentorum tuo-
 rum curramus, currentes brauium accipiamus,
 accipientes victoriam obtineamus, obti-
 nentes, coronam habeamus, habentes
 sine fine regnemus.
 AMEN.

SECUNDA ORATIO ECCLESIASTICA

In eadem Dominica.

Domine bonum nos hic esse.

*Summa Con-
 cionis.*

*Rex nunquam
 videre visus.*

TRia bona ostenduntur, quarum dulcedine ille-
 ctus Petrus in monte illo manere voluit.
LEgimus de Rege quodam, qui nunquam ridere
 visus sit, quique nullis rebus quantumvis iu-
 cundis & facietis ad risum commoveri potue-
 rit.

rit. Aulici & consilarii Regis sui ingenium admirati, fratrem Regis impellunt, causam tristitiæ ut sciscitetur. Cui Rex causam indicaturus, postero die iubet foueam profundissimam stratis in fundo ignitis carbonibus parari, solum vetustate fere corruptum superimponi, in quo fratrem diademate, sceptro, & cultu regio magnificentissimo ornatum collocat, abacumauro argentoque cœlatam, & varii generis vino, epulisque exquisitissimis instructam poni iubet, adhibentur cantores, voce & multiplici instrumento musico modulantes, ministrant mensæ nobiles aulici, neque quidquam Regalis magnificentiæ desideratur. Interim capiti fratris Rex enses filo bombycino imminuentem, è lacunari demittit, armatos milites quatuor subornat, qui strictis ensibus nouum Regem odoriantur, pectus hic, alter tergum, reliqui duo vtrumque latus mucrone petant. Quibus hoc modo constitutis, fratrem bono esse animo, demere supercilio nubem, & ridere Rex iubet: at is inter tot pericula totus perterritus, & pene exanimatus, quo se vertat nisi præsentissimo cum vitæ periculo non videt, modo ut surgere & abire sibi liceat, per Deos omnes precatur. Cui Rex. Talis est vita hominum. Supra me Deum Iudicem paulo post totius vitæ accuratam postulaturum rationem video, finemque singulis momentis, vitæ meæ tenui filo dependentis vereri cogor. Infra me si lumina defigo gehennæ horribile barathrum, infernalibus flammis ardens intueor. Ante me vitam vario fortunæ ludibrio expositam considero, & tragicos casus extimesco. Retro respiciens vitam antea actam multis peccatis & erroribus obnoxiam deploro, si
ad vtrum-

ad vtrumque latus oculis deflecto, imminensem vndique malorum congeriem pericula exhorreo. Habes igitur causas tristitiæ meæ. Et re vera ita est, quippe vita nostra ea conditione gaudet, vt dum eius beneficio fruimur, tristitia opprimamur. Ea nobis vita quærenda est, quæ in cœlis est, cuius hodie adumbratam imaginem videns S. Petrus, tanta lætitia exultauit, vt amplius ad vitam hanc caducam redire noluerit. Sed de hoc fusius in ipsa concione.

AVE MARIA.

*Visio diuina
faciei retine
bat Petrum.*

Cor. 13.

Ioan. 3.

I. Cor. 13.

Primum ac præcipuum bonum, quod sua vi Petrum in monte illo retinebat, fuisse faciem Christi sicut sol refulgentem animaduerto, hoc est enim summum bonum, hæc est vita æterna, hæc summa beatitudo, visio diuinæ faciei. Et hoc bono gaudebunt sancti Dei in cœlis, videbuntque Deum perfectè iuxta illud Apostoli, Cor. 13. *Nunc cognosco ex parte tunc autem cognoscam sicut et cognitus sum.* Videbunt inquam Deum sicuti est, illud enim per essentiam suam videtur, quod videtur sicuti est, sed in Patria Deus hoc modo videbitur. ergo. 2. Ioan. 3. *Cum apparuerit similes illi erimus, quia videbimus eum sicuti est.* Imò videbunt sancti Deum facie ad faciem I. Cor. 13. *Videmus nunc per speculum in ænigmatæ tunc autem facie ad faciem.* summum igitur bonum est visio diuinæ faciei, ex qua visione diuinæ essentiæ in qua est omnium bonorum eminentia, & perfecta sufficientia, desiderium hominis complebitur, vt amplius nihil desiderare velint sed dicant. Domine bonum nobis hic esse. Homines enim in hac vita desiderant quinque. 1. Longam vitam ducere, & a morte quam

te quàm longissimè abesse, hinc sibi à laboribus par-
cunt, otio indulgent, & delicatè viuunt. 2. Deside-
rant natura ipsa ducescire, & rem per causam cogno-
scere, & efficiuntur curiosi. 3. Quærunt honorem,
& efficiuntur ambitiosi. 4. Delectationem, & fiunt
voluptuosi. 5. Bonorum temporalium affluentiam,
& efficiuntur raptores iniusti. Beati in Patria hæc
quinque possidebunt. 1. Vitam sine corruptione, nā
per visionem Dei quilibet efficitur particeps vitæ
æternæ. Ioan. 17. *Hæc est enim vita æterna, ut cognoscant te*
solum verum Deum, & quem misisti Iesum Christum, & Sap. 5. *Iusti autem in perpetuum uiuent.* 2. Habebunt notitiam sine
errore, nam in Deo sicut in speculo omnia quæ ad e-
orum beatitudinem requirètur intuebuntur. 3. Glo-
riā & honorè, quippe: *Gloria & honore coronasti eum Domine.*
4. habebunt lætitiā sine mærore, gaudium sine tristi-
tia solatium sine sollicitudine. 5. Habebunt abundan-
tiā sine omni defectu, quia beati habēt perfectè, & ina-
missibiliter Deum, qui sufficientiā, & excellentiā bo-
norum omnium in se habet. Sap. 7. *Venerunt mihi omnia*
bona pariter cum illa, scilicet visione diuina. Præterea
desiderium alicuius tunc perfectè completur quan-
do caret omni malo, Apoc. 7. *Non esurient, neque siti-*
ent amplius, neque cadet super illos sol, neque ullus aestus, quod
longè abesse à mundana fœlicitate facile ostenditur.
Et quantum attinet ad voluptates, in quibus bonum
esse multi falso opinantur dicentes, Sap. 7. *(Venite fru-*
amur bonis præsentibus & utamur creaturis, tanquam in iuuentute
celeriter, vino pretioso impleti, & unguentis obliti, omnem captemus
fruendis voluptatibus occasionem, &c.) in his bonum esse
quis affirmabit? quippe per illas amittitur benedi-
ctio diuina, & acquiritur maledictio, quomodo igitur

*Beatorum in
patria quinque
privilegia.*

Sap. 7.

Apo. 7.

Sap. 7.

Isa. 5.

Magna abun-
dantia Salo-
monis.

3. 10. Reg.

S. Hiero.
Epist. 22.
ad Eusto-
chium.

tur bonas voluptates appellabitis, quæ ducunt ad perditionem? quis bonam arborem dixerit cuius fructus mali sunt? Isa. 5. *Vae qui surgitis ad sectandam ebrietatem, & potandum usque ad vesperum ut vino astuetis, Cythara, & lyra, & tympanum, & tibia, & vinum in conuiuiis vestris, & opus Domini non respicitis, propterea infernus dilatauit animam suam, & aperuit os suum absque omni termino.* En quo perdunt voluptates usque ad infernum. Afferam vnicum exemplum, 3. Reg. cap. 4. Erat cibus Salomonis per dies singulos, triginta cori similæ, & sexaginta cori farinæ, decem boues pingues, & viginti boues pascuales, & centum arietes, excepta venatione ceruorum, caprearum, atque bubalorum, & auium, altitium. Profectò magna beatitudinis felicitàs apud Salomonem fuisse tantam rerum copiam audientibus videtur, hinc Regina Saba videns omnem sapiëntiam Salomonis, & domum quam ædificauerat, & cibos mensæ eius, & habitacula seruorum, & ordines ministrantium, &c. non habebat ultra spiritum. Fueruntque ei vxores quasi Reginæ septingentæ, & concubinæ trecentæ. O delicias, sed certè nullum bonum in illis fuisse constat, videte fructus earum. *Et auerterunt mulieres cor eius. Cumque iam esset senex deprauatum est cor eius per mulieres, ut sequeretur deos alienos.* Non sunt igitur dicendæ bonæ voluptates quia malum sibi habēt annexum. S. Hier. Epl. 22. Eustoch. Solus in deliciis Salomon fuit, & forsan ideo corruit. Inquit Plutarchus: Post Calani Indi in rogo interitum: Alexandrum frequentibus amicis & præfectis certamen, & præmium proposuisse potandi meri. Qui plurimum hausit Promartus, ad quatuor congios progressum esse, relatoque pro victoriæ pretio Talento, triduum tantum

tum superstitem fuisse: ex cæteris vnus & quadraginta, ex violentia exanimati. O infelicem voluptatis luxum. Molles fuisse Sybaritas, & voluptarios, genioque & deliciis semper indulgentes, omnis fere commemorat historia, qui quo mollius cubarent, nulloque strepitu illorum interpellarentur somni, artes illas omnes quæ obstrepunt, quales ærariorum lignariorumque sunt fabrorum, similiumque omnium, extra vrbs pomeria exerceri iussisse, qui gallos gallinaceos eam ob causam in vrbe educari edicto prohibuisse dicuntur. Demumque ad tantam luxus insaniam, vt aiunt peruenere, vt equos etiam suos ad tibiam saltare, condocerent, quæ res illos funditus postremo euertisse perhibetur. Si quidem Crotoniata illis finitimi, & semper infensi (vt autor est Aristoteles) hac percepta re, tibicines, militum ornatu complures in aciem eduxerunt, qui in ipso congressu modum illum quem nouerant equi canere iuli, non solum illos ordine mouisse, sed cum senioribus etiam ipsis in mediam suorum aciem nullo negotio traduxisse perhibentur. O nimium perniciosas voluptatum delectationes, quæ mergunt homines in interitum. In diuitiis quoque nullam esse beatitudinem insitam, sed potius maximas animi molestias, & afflictiones in illis latere, sacræ docent literæ. Eccl. 2. *Qui homini proderit de vniuerso labore suo, & afflictione spiritus, qua sub sole cruciatus est. Cuncti dies eius doloribus & arumnis pleni sunt, nec per noctem mente requiescit, & hæc nonne vanitas.* Væ vobis diuitibus, qui consolationem vestram habetis, væ qui saturati estis, quia esurietis, væ qui ridetis, quia lugebitis. Sap. 5. dicetis ô miseri in die tribulationis. *Quid nobis profuit superbia, aut di-*

*Sybaritarum
lascinia.*

*Sybaritarum
interitus.*

Eccl. 2.

Sap. 5.

*Herodotus
lib. 7. ca. 4.*

*Inaudita ho-
minis privati
opulencia.*

*Ioannes He-
rold. in suo
Prompt. E-
xemp.*

*diuitiarum iactantia quid contulit nobis? transferunt illa omnia sicut
umbra. De Pithio Bittino legitur, qui tantæ opulen-
tiæ fuisse perhibetur, vt platanum arborem, ac vi-
tem Dario Regi ex auro confectas donarit. Xerxis
quoque copias, hoc est septies centena, 98. homi-
num millia excepit epulo, stipendium quinque men-
sium, frumentumque pollicitus, vt è quinque liberis
senectuti suæ, in delectu, vnus saltem concederetur.
Quis in Europa est Rex aut Princeps, cui ad tantum
sumptum suppetant facultates? nam ille sumptus; si
singulis militibus tres aurei menstrui assignentur, a-
scenderet mense quolibet, ad vicies centena millia
aureorum, id est ad miliones duos, vt ita decem
miliones absumpserit, quinque illis mensibus, sed
quod commemoratu dignissimum est, non modo post
tantam profusionem non impetrauit quæ postula-
ret, sed indignationem Xerxis incurrit: mirum in
modum furentis: filium enim suum occisum, in duas
partes dissectum, illi spectandum ob oculos posuit,
& inter ambas corporis medietates, ab vtraque viæ,
parte dissectas exercitum pertransire voluit, &
sic maiorem illi tristitiam, quam consolationem di-
uitiarum abundantia attulit, talis est fors omnium,
qui sperant in incerto diuitiarum, nam in fine eo-
rum infernus, tenebræ & luctus. Non igitur bonum
aliquod quærendum est, in voluptatibus mundanis,
aut in bonis temporalibus, sed vt dixi in suprema illa
ciuitate, vbi Deus videtur facie ad faciem, ex qua
visione omnis beatitudinis felicitàs promanat. Hinc
quondam Iordanus vir sanctitate illustris, cum lo-
queretur cum quodam energumeno, quæsiuit ex di-
abolo, vbi libentius vellet manere, in cælo inquit,
causam*

causam quaerenti respondit, propter visionem diuinæ faciei, & addidit, vidi inquit Dominum in ictu oculi, quod si iterum mihi concederetur tam brevis conditio videndi Deum in die iudicii, omnia damnatorum, vsque ad illud tempus sustinerem tormenta. Hoc igitur fuit præcipuum bonum, quod sanctum Petrum retinebat, scilicet visio diuinæ faciei. Aliud bonum fuit, quod sua virtute Petrum in monte illo retinebat, splendor albus vestimentorum Christi, facta enim erant vestimenta eius alba sicut nix, famuli siquidem, illi potissimum Domino adhærent, qui vestitu splendido familiam suam exornare consuevit. Certè sancti Dei habebunt vestes in Patria, mirum in modum splendidas, quarum prima erit impassibilitas, qua corpus ex virtute animæ, ab omni læsione seruabitur immune: quia sicut anima perfectè erit subiecta Deo, ita corpus humanum, & quidquid in eo est, animæ rationali perfectè erit subiectum, & ideo in corpore glorioso, non poterit esse dispositio contraria, contra dispositionem qua perficitur ab anima. Quod vt hominibus credibile videatur, adhuc in viuentibus sanctorum corporibus impassibilitatis certissima indicia manifestare voluit Deus Omnipotens. Anno enim millesimo, quingentesimo trigesimo secundo. Andreas Spoletanus, ex ordine Franciscanorum, Rege Fessæ in Mauritania, & principibus multis præsentibus, vt palam faceret esse veram Christi doctrinam, quam prædicabat, vndique flammis est circumdatus, & illæsus in iis diu permansit. Quocirca Mahometani lapidibus in eum coniectis, furentissime illi mortem attulerunt, populo qui eo confluerat, ex omni parte rem spectante.

Vestes in Patria habebimus satis splendidas.

Tom. Boz. de sign. Ecc. lib 15. ca. 9. Impassibilitas Andreæ Spoletani in flammis.

*Idem lib. 9.
cap. 5.*

*Miraculū in
favorem sū-
mi Pontificis*

*Incorrupti-
bilitas in me-
diis flammis.*

*S. Franci-
scus super ar-
dentes pru-
nas ambulās
non laeditur.*

*Subtilitas
soporis vi-
nentia.*

Petrus quoque Ignæus, qui Alexandro secundo se-
dente, cum Florentini in duas essent partes diuisi, &
altera schismaticis, hæreticisque, Petro Episcopo
duce adhærent, altera Alexandro secundo, vt o-
stenderet Alexandrum verum Pontificem, Christi-
vicarium, Missa celebrata, acceptaque ab Abbate
Ioanne Gualberto benedictione, solo indusio tectus,
nudisq; pedibus, inter duas strues ardentium ligno-
rum, longas decem brachia, altas propè & altas
quinque, lento gradu, flammis mediam viam vndi-
que cooperientibus, illæsus lærusque tota vrbe in-
spectante, incessit, cunctisque obstupescendentibus, ve-
ritatem maximo miraculo comprobauit. Sed & S.
Franciscus Assisias, cum mulier quædam Saracenica
superstitionis in Syria, vellet eum ad illicita perpe-
tranda pellicere, maximam vim candetium pruna-
rum, quæ aderant, per pauimentum longè lateque
disperfit, deinde super eas accubuit, & cum nihil
damni pateretur, mulierem vt idem faceret, inuita-
uit. Illa re mirabili obstupescens, sanctimoniamque
virî suspiciens, Christo nomen dedit: ò vestem ser-
uorum Dei verè pretiosam impassibilitatem. Altera
vestis erit subtilitas, quantò enim corpora sunt no-
bilia, tantò sunt subtiliora, sed corpora gloriosa,
inter omnia sunt nobilissima, ergo subtilissima: vt o-
lim Christus Dominus clausis ianuis venit ad disci-
pulos. S. Dominicus Prædicatorum Pater, cum iter
faceret, vna cum quodam ex ordine Cisterciensi, ac
de via fessus peruenisset ad ædem quandam vndique
occlusam, precibus se dedit, ac protinus nullo adi-
tu patefacto, mirabiliter ipse & comes eius, intus se
collocatos viderunt, quod in eius vita Ioannes Fla-
minius

minius refert. Tertia vestis est agilitas corporis, corpus enim sine labore quo volet mouebitur. II. *Current & non laborabunt, volabunt & non deficient.* 1. Cor. 15. *seminatur in infirmitate, surget in virtute.* Placet vnicum proferre exemplum. Morabantur Edessæ præsidii causa nonnulli milites Gothi, ex his quidam amore captus puellæ formosæ, cœpit eam miserrime deperire. Cum nulla daretur via, qua posset ea potiri in coniugio sibi eam dari efflagitauit. Virginis mater ac propinqui reclamare vniuersi: homini ignoto, è remotissimis locis oriundo, barbaro militi nequaquã decere puellam tradere abducendam in terras longinquas. Victitandem omnes precibus assensum dedere. Mater à cuius gremio ægerrimè abstraheretur, non prius illam barbaro dedit, quam duxisset in templum Somonæ, Curia, & Abibi Martyrum: ibique datis sanctis illis fideiussoribus, eam bene habendam Gotho, tum demum dedit. At efferus ille voti compos, vt libidinem exsatiavit, abreptam in patrium solum procul à suis puellam, pessimo atque atrocissimo consilio, viuam sepulchro inclusit, quippe qui domi aliam coniugem haberet. Ibi Edessana fœmina, post innumera lamenta, plurimosque eulatus, ad opem sanctorum confugere, illos obtestari, fideiussionem præstitam vociferationibus miserandis vsurpare. Adstiteri illi in lucidissima veste, ac bono animo esse iusserunt, & somno placido correptam? (dictu mirum) breuissimo temporis spatio, è remotissima regione, obserato sepulchro, eductam reducerunt in patriam suam. Quo rerum tantarum ignarus Gothus, postea rursus venit, agnitusq; ultimo supplicio est affectus. Quarta vestis nostri

Simon Metaph. apud Suri. tom. 6. Nonem 15.

Agilitas mulieris Edessana.

cor-

poris erit claritas. 1. Cor. 15. *Seminatur in ignobilitate surget in gloria*, stola enim iucunditatis, & stola gloriæ induet nos Dominus fulgebuntque iusti sicut sol, coronam pulchritudinis habentes super caput suum amicti lumine sicut vestimento. Omnisque exercitus qui erit in cœlo sequetur agnum in equis albis, vestiti byssino albo & mundo. Accidit hoc in Moyse, qui mentis deuotione Christi venturi corpori sese adiunxerat, cum luce diuinitus accepta, colloquio cœlesti diu potitus, tantique consortii participatione illustratus, e monte descendit, & in conspectum populi se dedit: facies namque eius radios vndique emittebat, & Iudæorum nemo poterat aut oculos figere, aut intendere in eum, necesseque ipse habuit velo faciem obducere, atque ita alloqui hebræos. D. Antonius Florentinus Archiepiscopus, doctissimus iuxta ac sanctissimus, crucifixi effigie ad fundendas orationes utebatur in museo, in quo inclusus pernoctabat. Domesticus quidam nocte, putans se vocari à beato viro, accessit primum: & cum ingenti luce vidisset locum coruscantem, furtiue obseruans vidit S. virum multo lumine illustratum, longè à terra sublimem, ad crucifixi simulachrum abreptum, quod dulciter alloquens amplexibus stringebat, & lateri defosso, oscula incredibili voluptate perfusus, figebat. Scribunt etiam S. Franciscum, quamuis abesse loco in quo discipuli ipsius erant, adstitisse tamen illis aliquando licet occlusi essent aditus omnes, curru igneo inuectum, ac ter illud domicilium circumdasse, ac supra caput eius nubem quandam in modum solis conglobatam splendentemque fuisse. Eodem modo visus est aliquando in solis

Exod. 34.

*In vita eius
apud Surium
2. Maii Vin
centii Mai-
nandus.*

*D. Bonauen.
in vita eius.*

in solis locis ingenti vndique luce circumfulgens
 verba facere cum Iesv, Maria, & Ioanne Euange-
 lista innumeris Angelis præsentibus. Rursus cum lo-
 queretur de rebus cœlestibus ad mensam in qua a-
 derant, abstracti sunt omnes à sensibus, visa omnia
 circumcirca ardere, & ingens vndique incendium
 excitari. Accurrunt vndique Affiliates, ignem nul-
 lum vident, cuncti in obtutu diuinorum defixi. O ve-
 stes mirum in modum splendidas, quarum splendore
 obstupescit Petrus, Domino suo firmiter adhæsit,
 omni contempto mundi apparatu. Tertium bonum
 fuit, Sanctum Petrum in monte illo retinens, Socie-
 tas sanctorum. aderat enim Elias & Moyses. Ma-
 gnum profectò erit gaudium, & ingens beatitudinis
 cumulus, habere Societatem in cœlis cum matre
 Christi, Patriarchis, & Apostolis, Martyribus &
 Virginibus sanctis, ibi enim non erit inuidia. Cuius
 ratio est, quia vbi est perfecta charitas, ibi inuidia
 esse non potest, sed in beatis est perfecta charitas.
 ergo. &c. Non erit etiam discordia, quia ibi non
 erit vlla dissensio cordis vel voluntatis ad Deum. E-
 rit tunc multitudinis vnum cor & vna anima. Rectè
 S. Chrysostomus de reparatione lapsi. *Nulla erit in fu-
 turo discordia, sed cuncta consona, cuncta conuenientia, omnium e-
 nim sanctorum vna concordia erit.* O Societatem desidera-
 bilem, quis non ardebit summa cupiditate, ad illam
 confraternitatem perueniendi? Quidam olim gen-
 tilis Scythia cum febre acutissima laboraret, & mate-
 ria ad cerebrum ascendente in furiam raptus esset,
 dormientibus omnibus qui circa illum erant, aufu-
 git nudus, tribus diebus, & tribus noctibus per ere-
 mum vastissimam aberravit. Tertia igitur nocte di-
 gesta

†

*In celo nul-
 la inuidia e-
 rit.*

*Lib. 4. n. 2.
 cap. 53.*

*Mirabilia
visio.*

gesta materia, rediit ad se cōpos mentis, qui in tenebris horrens quid faceret, quo se verteret nesciebat, cum ecce post instans, modicum discussis tenebris, vidit in montis cacumine ingens lumen, reptās ergo manibus & pedibus, ascendit in montem, & ecce super omnem solis fulgorem Regem admirabilem, vidit in throno aureo residentem, & ad eius dextram, reginam incomparabili decore fulgentem, vidit mixtim seniores & iuvenes, in thronis aureis assidentes, & ministros ex omni parte, vultibus fidereis rutilantes. Hæc vt vidit gentilis obstupuit, nec mora vnus ministrorum à Rege missus, cum vestibus nudum induit, & ad Regem duxit. Cui Rex: nihil, ait, in rebus humanis simile vidisti, & ille, nihil inquit Domine. Et Rex ad eum. Ego sum inquit Christianorum Deus, Rex, & Dominus sempiternus, tu autem redibis ad populum tuum, & perquirens inuenies in gente vngarica, quæ immixta est genti tuæ, duos presbyteros Christianos, à quibus erudieris ad normam fidei Christianæ. Hæc vt audiuit gentilis, renuit bonorum societate frustrari. Et mox ad eum Rex, impossibile est inquit te manere nobiscum, sed si Christianam fidem susceperis, vt præcepi, societate ista iucundissime perfrueris, hoc dicto miles sedens in equo albo suscepit illum, & in exercitum Tartarorum populo mirante reduxit, vestes autem quas nudus acceperat, præcipui coloris atque molliciei, opus vero earum plumarium, id est, ex acufactum, super omne artificium hominis diuina virtute concretum. O societatem omni studio quærendam, quam videns homo Ethnicus, non amplius reuertitur ad vxorem, & liberos festinat, sed illi Sanctæ
congre-

congregationi adhærere desiderat. Quis mihi hoc dabit, vt aliquando illi Sanctæ societati adiungar, vbi vera amicitia sine fūco, charitas sine discordia, & quod me maximè mouet, vita sine termino. Vbi nullus decipit, sed omnes fauent, nullus odit, sed omnes diligunt, nullus increpat, sed omnes pacis osculum tribuunt. O Societas, vbi vera securitas, securā tranquillitas, tranquilla æternitas, æterna fœlicitas, fœlix cum Deo familiaritas. O Societas, vbi omnes amici, & nullus inimicus, omnes fauentes, & nullus aduersarius, omnes protegentes, & nullus hostis erit. O Societas, vbi nemo inuidet, nemo obreçtationibus vexat, nemo insidias struit. O societas, vbi amor sine rancore, feruor sine tepiditate, salus sine infirmitate. O quando dies illa veniet bone IESV, cum ego, ego inquam infœlix peccator, tuus tamen qualiscunque sim, omni tempore vitæ meæ famulus, tuam sanctissimam faciem videro? O horam illam desiderabilem, ô me cum hanc gratiam affecutus fuero fœlicem, terque quaterque beatum. Tua enim facies pulchra & decora nimis, quā qui viderit omni sufficientia repletus manebit? sed quid moror? Anima mea erumpe de ergastulo huius caduci corporis, & curre in montem Domini, & quam humillimè poteris, obsecra Dominum Deum tuum, ne te ab illa dulcissima & iucundissima societate excludat, sed secundum multitudinem miserationum suarum, velit te ibi esse, vbi est bonum verum, bonum summum, bonum infinitum, bonum æternum, bonum sine omni malo, vna vobiscum Audito-

res in Christo dilectissimi, quod nobis tribuere dignetur, qui sine fine in cœlis dominatur. Pater & Filius & Spiritus Sanctus.
AMEN.

ORATIO ECCLESIASTICA

In Dominica III. Quadragesima

Qui non est mecum, contra me est, & qui non colligit mecum dispergit. Luc. II.

Summa Conclusionis.

Qui abstinet à malo, & nullum facit bonum, eum tanquam seruum inutilem Deo displicere cunctissimis rationibus declaratur.

NON abs re querendum esse à vobis existimo, sint necne cœlestem gloriam adepturi homines illis, qui malis quidem operibus renunci-
ant, sed bonis actionibus nequaquam vacare desiderant? Reperientur fortassis aliqui, qui huiusmodi homines futuros Christi cohæredes appellare non erubescunt, hac ratione subnixi, neminem à regno cœlesti exclusum iri nisi peccatorem, quippe longe à peccatoribus salus, at qui omne scelus fugiunt, etsi reliqua bona opera non exercent, videntur non esse peccatores, cum à peccatis abstineant, ergo, &c. Adhæc qui vult ingredi vitam æternam seruet mandata Dei, qui à peccatis abhorret videtur ser-
uare

uare mandata Dei, non enim voluntati diuinæ contrarie præsumit, nec illud perpetrare audet, quod Deus fieri vetat, ergo &c. Sed contra. Qui me cum non diligit dispergit, id est, qui non facit bona opera. Sed otiosus manet inutilis seruus est, & dilapidator bonorum meorum. Rem accuratius tractaturum me polliceor. Vos solito more beneuolas, mentis & corporis præbete aures.

AUE MARIA.

Qui non vult manum admouere exercendis bonis operibus, etsi abstineat a malo, esse tamen inutilem seruum, Deoque vehementer displicere patet, nam vel propter pigritiam bonis actionibus operam, nauare recusat, & hæc est ex natura sua peccatum mortale, vel certe propter odium & cōtempnum boni, & hoc est magnum scelus bonum odio prosequi, imo præsumitur esse hæreticus, qui dicunt bona opera, non esse ad beatitudinem æternam consequendam necessaria, & sic inutilis seruus, & Deo odibilis sit necesse; quo ad primum, hominem pigritiæ deditum odio esse omnipotenti Deo, vel hinc colligere licet, cum eum verbis obiurgatoriis, ut se ad bonum conferat admoneat: aliquem enim nobis displicere manifestè ostendimus, cum duro sermone obiurgantes, ut hoc vel illud agat commonefacimus. Pro. 6. *Vade ad formicam ò piger, & considera vias eius, & disce sapientiam, quæ cum non habeat ducem, nec præceptorem, nec principem, parat in æstate cibum sibi, & congregat in messe, quod comedat. Usquequo piger dormies? quando consurges è somno tuo? &c.* nonne hæc verba plena sunt ob-

Qui bonum non operatur peccat.

Pro. 6.

- iurgatione? Est etiam piger seruus inutilis, qui enim in procuratione negotiorum Domini sui, ita versatur, ut illi loco consolationis molestiam & tribulationem afferat, eum esse seruum inutilem patet, talis est piger, ergo. Pro. 19. *Sicut acetum dentibus, & fumus oculis, sic piger his qui miserunt eum in via.* Quoniam vero seruus inutilis est, huic sine dubio subiacebit sententia. Matt. 22. *Inutilem seruum eicie in tenebras exteriores, ibi erit fletus & stridor dentium, & Ioan. 15. Omnem palmitem in me non ferentem fructum tollet eum.* Quod si propter odium & contemptum boni, à piis abhorret actionibus, maxima miser incurrit incommoda. Pro. 1. *Dispexistis omne consilium meum, & increpationes meas neglexistis, ego quoque in interitu vestro gaudebo, & subsannabo, & Isa. 33. Væ qui spernis nonne & ipse sperneris, cum favigatus desieris contemnere, contemneris.* Tertio præsumitur esse hæreticus, negat enim hæreticibona opera conducere ad obtinendam æternam salutem, & hoc ipsum talis homo factis confirmat, contra quos S. Iacobus inquit. *Quid proderit fratres mei, si fidem dicat se quis habere, opera autem non habeat, nunquid poterit fides saluare eum, & ca. 1. Qui autem perspexerit in lege perfecta libertatis, & permanserit in ea, non auditor obliuiosus factus, sed factor operis, hic beatus in facto suo erit.* Memorant qui nouum orbem perlustrarunt, quædam canum noua genera ibi reperta, quorum & forma & natura nostris nihil fere commune habeat, quidam appellant canem agilem, quod omnium pigerrimus sit, toto enim die ad quinquaginta passus non progreditur, caret cauda, sunt illi pedes quidem quatuor, digitis quaternis concretis auium more, magnitudine canum domesticorum nostrorum, præparuo est ore, arborum studiosissimus, quas lentissimo motu conscen-

Pro. 19.

Matt. 22.

pro. 1.

Isa. 33.

Iac. 2.

Id habet One
ti in sum. c.
23.

conscendit, noctu tantum canit, sex tantum edens
tonos, illos præcipue, qui sunt totius musices rudi-
menta, putatur non edere, sed ali suo pingui, cum
etenim in summa arborum perucenerit, quindecim
ac pluribus diebus ibi moratur, absque vilo cibo,
semper ore (vt diximus) præparua hiant, unde spi-
ret aura, neque mordere potest, color illi subcine-
ricius. Alii appellant animal hoc pigritiam, seu
mauis ignauiam: scemineam illi faciem esse tradide-
runt frondibus ali visum, adhærereque arboribus
tanta pertinacia, vt non nisi mortuus auelli possit,
arborē densissimam foliis prorsus nudat. Exemplum
certe rei nostræ accommodatissimum. Sunt enim ple-
rique qui videntur, nihil habere commune cum
peccatoribus, quibus dicitur *foris canes*, non enim pro-
ximorum famam theonino proscindunt dente, non
de aliorum operibus latrant, nec alicui nocere con-
uincuntur, sed quoniam pedes eorum non sunt ve-
loces ad omne bonum opus exercendum, suntque
molles & effeminati ad supponenda brachia diuinis
operibus exercendis, recte appellandos pigritiam
seu ignauiam assero, quod vtrumque vitium æternis
esse obnoxium cruciatibus nostis. Recte igitur do-
cemus homines, etsi abstineant a malo, & non faci-
ant bonum inutiles esse seruos Christi. Adhæc sic ar-
gumentor, qui æternos est subiturus cruciatus, ille
conuincitur esse inutilis seruus, sed qui bonis operi-
bus incumbere recusat, æternis cruciabitur tormē-
tis, ergo est seruus inutilis. Matt. 3. *Omnis arbor quæ non*
facit fructum bonum excindetur, & in ignem mittetur. Solinus
inquit. Sodomipoma giguntur, quæ licet speciem
maturitatis habeant, mandi tamen non possunt, nam
fuligi-

*Hæc Iose-
phus Iesuita
scripsit ex
Brasilia an-
no D. 1560.*

Matt. 3.
ca. 36.

Poma Sodomitica.

fuliginem intrinsecus fauillaceam ambitio tantum eximia cutis cohibet, quæ vel leui pressa tactu fumum exhalat, & fatiscit in vanum puluerem, similiter homo qui abstinet à malo, & non facit bonum, desuper probus & iustus esse videtur, & dignos fructus proferre multorum ore iactatur, sed reuera arbor est inutilis, æternis iniicienda ignibus. Præterea Solis bona opera facientibus & pro honore & gloria Dei laborantibus, præmium regni cœlestis promittitur, ergo qui otiositati manus dant, nec bonis operibus inuigilant, ab illa mercede exclusi in ignem æternum discedent. Matt. 25. *Venite benedicti Patris mei, possidete paratum vobis regnum à constitutione mundi. Esuriui enim & dedistis mihi manducare, sitivi & dedistis mihi bibere. &c.* Et

Matt. 25. contra dicet eis qui à sinistris stabunt. *Discedite à me maledicti in ignem æternum, qui paratus est diabolo & Angelis eius, esuriui enim, & non dedistis mihi manducare, sitivi, & non dedistis mihi potum, hospes eram, & non me collegistis, nudus & non operuistis me, infirmus, & in carcere & non visitastis me: evidentissime ex his verbis colligere licet, eos qui etsi nullum malum committunt, sed nullum etiam bonum opus exhibent, in æternum damnandos, non enim illis dicitur quia occidistis, quia mendacium commisistis, sed quia bona opera, (qualia sunt infirmos visitare, nudum vestire, esurgentem pascere) non exercuistis. Matt. 20. *Quid hic statis tota die otiosi.* Nullis illicitis rebus operarii illi occupabantur, tantummodo stabant indulgentes otio, & tamen duro sermone & obiurgatoria oratione alloquitur eos Pater familias, statimque ad vineam ad subeundos in ea labores eos sese conferre serio mandans, insinuans sibi vehementer displicere eos, qui se à bonis operibus elongant, hinc*

hinc Apostolis. 2. Tessal. 3. *Quoniam si quis non vult operari nec manducet*, & 2. Cor. 9. *Qui parce seminat, parce & metet, & qui seminat in benedictionibus, in benedictionibus & metet.* 2. Cor. 9. Demum, qui tempus inaniter consumit, cum possit aliquod opus bonum exercere peccat grauiter, sed ille qui abstinet à malo, & nullum facit bonum, tempus consumit inaniter, ergo &c. Eccl. 14. *Non defrauderis à die bono, & particula bonæ diei non te prætereat*, ad Gal. 6. Eccl. 14. *Bonum facientes non deficiamus, tempore enim suo non deficiemus metentes*, ergo dum tempus habemus operemur bonum, & Dominus IESVS loa. 6. *Operamini dum dies est, veniet nox quando iam nullus poterit operari.* Titus filius Vespasiani, qui in ultionem Dominici sanguinis subuersis Hierosolymis Romam victor ingressus est, tantæ dicitur fuisse bonitatis, vt cum quadam nocte sero recordaretur in cœna quod nihil boni die illa fecisset, dixerit amicis: *Hodie diem perdidi.* Omnes ergo qui tempore sibi ad bonum operandum concesso abutuntur, inutiles serui efficiuntur, & cum maxima animarum suarum iactura, tempus foelicissimum, & dies salutis præterlabi patiuntur. Insuper seruus mandato Domini sui contraire præsumens, & non in omnibus, sed in quibusdam tantum eius voluntati morem gerens (vt Regem Saul fecisse legimus) multis plagis vapulabit, inobediensq; voci diuinæ coarguetur, nam quasi peccatum ariolandi est repugnare, & quasi scelus idolatriæ, nolle acquiescere, sed qui bona non faciunt, licet abstineât, à malo sunt ipso facto diuinæ voluntati repugnantes, ergo &c. Dicitur enim. *Declina à malo & fac bonum.* & Deu. 17. *Facies quodcumque dixerint qui præsum loco, quem elegerit Dominus.* 3. Reg. 13. Propheta quidam de Iuda veniens in Bethel ad coarguendum Regem Ioroboam, multa

*Heroicum
factum Titi
Imperatoris.*

Dei præcepta expleuit fideliter, vnicum transgressus de non sumendo cibo in illa legatione, a Leone interfici promeruit. Concludo vnica similitudine. Habeat aliquis Dominus seruum non murmurantem, non latrociniis inhaerentem, non poculis exsiccandis incumbentem, sed in otio torpentem, nulli operi manus ad mouere volentem, & tamen quotidie ad mensam sumendi cibi gratia venientem? Nonne Domino commouet stomachum? nonne toruo intuitu a Domino conspicitur? nonne verbis duris increpatur & sicut seruus inutilis, si se emendare noluerit domo expellitur? Hoc etiam vobis existimandum est de supremo illo Domino Dominantium, si quis enim ex numero Christianorum a malis abhorreat, & tamen bonis operibus non incumbat, talem ille sicut seruum inutilem despiciet. Præstat ergo declinare a malo, & facere bonum, quod vt præstare valeamus donet omnibus nobis Dominus Pater & filius & Spiritus S.

AMEN.

SECVNDA ORATIO ECCLESIASTICA

In eadem Dominica.

Omne regnum in se diuisum desolabitur. LUC. II.

Nemi-

Neminem reperiri posse ex vobis existimo Auditores, qui nolit si optio daretur, maximis affluere diuitiis, omnes quippe bene habere, foeliciter viuere, ab egestate longè abesse, nullius egere desideratis; & quemadmodum quilibet vestrum hoc in optatis habet, vt in domo sua omnia adsint in copia, ita etiam hoc omnibus curæ est, ne egestas vobis superueniens anxietates & calamitatum angustias vobis inferat. Sed tamen & si summo studio & opera in id incumbitis, rarò tamen optatis gaudetis, rarò ad diuitiarum possessiones peruenitis, verum vt plurimum operam & oleum in illis conquirendis perditis, & antiquo more miseria & paupertate oppressi gemitis. Causam huius mali video esse discordiam. Rectè enim dicitur. *Concordia res parue crescunt, discordia maxime dilabuntur*, discordia inquã omnia bona aufert, domos euertit, regnorum amplitudinem tollit, omnia corrumpit & destruit. Vt autem magis magisque quantum malum sit hoc vitium, & quod sit omnis egestatis & calamitatis, fons & origo intelligatis, concionem meam, hac de re tractantem beneuolis excipite auribus.

AUE MARIA.

IN domibus vestris multas ob causas egestatè infœliciter dominari animaduerto, quarum prima est, cum Paterfamilias longa infirmitate affectus lecto decumbit, quippe medicis multa sunt dona offerenda salutis recuperandæ gratia, multi sumptus profundendi in conquirendis variis medicamentorum speciebus, & cum sic bona dissipantur, & propter

Causa egestatis dantur.

Patrisfamilias ægritudinem non augentur, facile domus euacuatur, & egestas introducitur. Alia causa est, vt cum quis vxorem sibi in matrimonio iunxit, nullo dotis adiumento subnixus, talis enim non habita pecunia difficile locupletabitur, nam non facile emergunt quibus sunt angustia domi. Cæterum nulla causa egestatis inducendæ in domos vestras efficacior, discordia, cum enim maritus laborando congregat, & pessima vxor bibendo dissipat, domus illa nunquam adimplebitur bonis. Attendite. Patet idem ex Hieroglyphico de discordia aptissime expresso. Pingebāt veteres lupum & agnum, inter quæ duo animalia quis vidit iucundam aliquando cohabitationem, aut aliquam bonorum comestibilium in vnum locum congregationem? imo omnia contraria, cum lupo agnum edat, in partes disiciat, & deuoret. Addit Alciatus in suis Emblematis, inter hæc duo animalia diuturnam, ac perseuerantem adeo inimicitiam esse, vt etiam ipsis percussibus, ipsa non pereat, vt experientia compertum est. Nam insonante tympano ex lupi pelle confecto, reliqua ex ouina pelle contexta rauescunt, & quasi sonitu priuantur.

Cætera mutescunt, coriumque silebit ouilum

Si confecta lupi tympana pelle sonent.

Simili ratione inter discordes, nemo vnquam vitam pacatam, lætamque vidit, sed in domo illa, ciuitus, lamentationes, fletus, sanguinis effusiones, rixæ, vulnera, vix, cædes, & bonorum dilapidationes dominari omnibus in aperto est. Cybindus auis bellum internecium gerit cum aquila, adeo vt cohærere sæpenumero prestantur. Ita fit aliquoties, vt dum

*Hieroglyphi
cum discor-
dia.*

*Aristotel. de
natu. anim.
li. 9. ca. 12.*

dum mutuum inter se odium pertinaciter exercent homines, vtrique subuertantur, bonisque omnibus & diuitiis priuentur, tertio quopiam in eos inuadente. Hinc à quodam doctissimo viro, comparatur grandini in hæc verba. Discordia assimilatur grandini propter quatuor. Primo, quia grando est dura ad ictum, nam grando fortiter percutit, ex eo quod dura exiit, vnde & grana eius lapides in sacra scriptura appellantur. Eccl. 43. *Confracti sunt lapides grandinum.* Prouenit autem duritia grandinis ex eo, quod frigus fugiens calorem aeris, ad interiora nubis se recipit, & ex sua aggregatione virtus eius inualefcit, vnde vaporem quem in nube inuenit, sua virtute constringit: & in duram substantiam conuertit: & ideo magis quam in hyeme fiunt grandines in æstate, quia virtus frigoris quæ est in æstate vnitur, & in vna parte aeris adunatur, in hyeme per aerem totum dispergitur, quare debilior redditur, nec ad congelandum vaporem sufficiens inuenitur. Ita discordiæ ex calore iracundiæ, & ex frigore malitiæ generatæ, corda hominum sic indurant, quod vnus erga alium semper sæuiat, & nulla pietate seu benignitate mollis & benignus efficiatur. Sap. 5. *A petrosa ira plene mittentur grandines.* Secundo quia grando est subita siue impetuosa quo ad descensum, nam cum de se sit grauis vento etiam impellente cum impetu descendit, & ita etiam similiter cum impetu iræ, & violentiæ discordiarum bella geruntur. *Nam ira non habet misericordiam, neque erumpens furor, sed sicut impetus grandinis turbo confringens.* Tertio, quia grando non est totaliter rotunda quo ad aspectum, nam habet figuram quasi dentis vel mochi. Quia ergo figura rotunda

Mag. Ioa. de
S. Geminia-
no.

Discordia
grandini cõ-
paratur.
Eccl. 43.

Cur magis in
æstate fiat
grando.

Sap. 5.

Colo. 3.

Matt. 5.

Psal. 67.

perfectionem secundum Philosophum importat, quæ in grandine deficit, colligitur belia, discordias, & lites contingere ex defectu charitatis, vel imperfectione. *Charitas enim est vinculum pacis.* Nam cui charitas perfecte adesset, etiam iniuste lædenti, minime repugnaret, dicente Domino. *Qui te percussit in unam maxillam præbe ei, & alteram.* Quarto, quia grandis est noxia quoad effectum, nam cum impetu terram petit, segetes, fructus, & flores plurimum lædit. *Percussit in grandine vineas eorum.* Sic per discordiam homines occiduntur, gloria extinguatur, diuitiæ tolluntur, libertas amittitur, charitas rumpitur, anima vastatur, & in æternam captiuitatem abducitur. Quæro ego à vobis quid causæ sit, cur Turca insensibilis Christianorum hostis adeo extulit caput, ut illi nemo in opibus & in potentia, toto in orbe terrarum Monarcha, secundus reperiatur? Cur Christianorum exercitus ab illo facili negotio superantur? cur tot millia hominum in seruitutem omnibus diuitiis spoliata abducuntur? breuibus respondeo, cum crescere, Christianos vero minui propter discordiam eorum, rem se ita habere duo exempla comprobant. Primum refert Simon Maiolus Episcopus Vulturarien. de bellorum euentibus, ubi sic inquit. Non ignorat Turca discordes esse Christianos, quapropter etiam tantò confidentius arma mouet contra eos, & si qui sparguntur de Christianorum concordia rumores, tanquam inanes & futes explodit. Id quod ex sequenti narratione satis liquet. Cum aliquando & quidem haud ita pridem. Turcico, Tyranno quidam ex suis, bellum aduersus Christianos dissuadere conaretur, quippe formidandum esse dice-

ret, ne

ret, ne Christiani bello irritati, tandem in vnum cō-
uenirent, bellumque aduersus eum communi consi-
lio & ope gererent. Tyrannus ridens recitalle fer-
tur fabulam illam vulgo notam de canibus bellum
aduersus lupos intentantibus. Cum inquit lupi ali-
quando magnam canum multitudinem aduentare,
aduersus se intellexissent, ingenſque, propterea eos
terror occupasset: vnus ex iis qui inter eos senior e-
rat, in propinquum mōtem profectus, cacumen eius
vt canum specularetur aduentum conscendit. Ve-
rum cum eos multos quidem, sed diuersorum colo-
rum esse perspexisset, lætus gestiensque ad suos re-
uersus. Bono inquit, este animo. Tanta enim est in
hostibus nostris colorum, morum, studiorumque di-
uersitas, vt consentire vnā ac conspirare in aliquam
omnes simul non possint, singulos vero, si venerint,
absorbere sine difficultate poterimus. Cui conuenit
quod Imbraimus interpres Turcici Imperatoris
Francoforti in electione Maximiliani II. Cæsaris,
cuidam vires & potentiam Germanorum depredi-
canti respondisse fertur, videri sibi Christianorum
animos similes esse belluæ multorum capitum, &
plurium candarum, quæ agitata sepem transire co-
naretur, vnde cum capita diuersa, diuersa forami-
na transeundi quærerent, necessarium erat, vt simul
& corpus & caudæ immotæ manerent, & ne progre-
derentur vterius, impedirentur. Imperatorem ve-
ro suum se comparare belluæ vnicipiti, quæ plures
caudas haberet, ita vt si caput per vnicum transitum
penetraret, necessario & corpus & caudæ vnā absq;
omni impedimento cogerentur sequi. Qua sane si-
militudine haud insulſa, nihil aliud innuere voluit,
quam

quam dissensionem animorum, & distractionem virium Christianorum per quam cum suis bonis miserè pereunt, è contra concordiam & potentiam vnitam Turcarum, per quam magis magisque crescunt, & multiplicantur. Tria esse quæ Patrem familias domo pellant communi prouerbio fertur, stillam pluuiæ, fumum, & malam vxorem, & hæc tria perquam optimè discordiam significant. Tigna enim iuncta super quæ tectum domus superimponitur, quam diu manent integra, stillans pluuiæ non penetrat domum illam, quibus postea disiectis & seiunctis, exponitur domus pluuiæ ingruenti, adeo vt Pater familias vna cum suppellectili pedem efferre de domo illa cogatur. Similiter vbi dominatur discordia absque dubio domus illa omnibus ingruentibus malis & calamitatibus exposita manet, secus si cor est vnum & anima vna. Fumum quoque certissimum iracundiæ & discordiæ signum esse sacræ literæ confirmant. Iob, 14. *De naribus eius procedit fumus, &* Psal. 17. *Ascendit fumus in ira eius, &* Apocal. 9. *Et ascendit fumus putei sicut fumus fornacis magnæ, & obscuratus est sol, & aer de domo putei, & de fumo putei exierunt locustæ, hoc modo discordia obscurat lumen rationis, ne homo bonum intelligat, prodeunt deinde locustæ, verba scilicet conuictiosa, plena veneno pestifero cruciatusque earum sicut cruciatus scorpionum. Mala etiam vxor summum in domo malum, quemadmodum enim magna felicitas est, bonam mulierem domi habere, (quippe qui inuenit mulierem bonam, inuenit bonum & hauriet salutem a Domino) ita summa calamitas vxorem malam possidere: si quidem, *Melius est habitare in terra deserta quam cum muliere rixosa & iracunda, &* 19. *Tecta ingiter perstillantia litigiosa mulier, & quem-**

Iob. 14.

Psal. 17.

Apo. 9.

Pro. 18.

& quemadmodum mala vxor maritum in angustiarum amaritudine retinet, vitam eius plenam molestiis reddit, domo pellit, sic discordia adest cum omni calamitate & miseria, omneque bonum, & omnem sufficientiam, e domibus eiicit omnemque miseriam introducit. O verè detestandum malum discordiam. Quapropter diligite alterutrum, nullæ sint inter vos discordiæ, nullæ dissensiones, nullæ rixæ, maximè inter coniuges. Sed potius habete pacem cum omnibus, vt habitare possitis in regnis cœlestibus.

AMEN.

ORATIO ECCLESIASTICA

In Dominica IIII. Quadragesimæ

*Letabuntur coram te, sicut qui latantur in messe, sicut exultant vi-
ctores capta præda. Isa. 9.*

CONuiuium opiparum eis qui ex animo Christo Domino seruiunt exhibetur, & certa fercula apponuntur. *Summa Con-
cionis.*

CONSuetudinem eam esse apud Patrem famili-
as, vt cum plurimos operarios ad messem cõ-
duxerit, & iam aliqua ex parte segetes in v-
num collegerit, exhibeat lautum conuiuium mello-
ribus, vt eo promptiores & feruentiores labori su-
perue-

Matt. 9.

peruenienti reddantur: Messis in sacris literis nihil aliud denotare videtur, nisi homines certatim a pessimis suis viis, ad rectas Christi semitas currentes, & auidē verbum Dei, audiendum, celeri cursu properantes. Matt. 9. & Luc. 10. *Posthac autem designauit Dominus, & alios septuaginta duos, & misit illos binos ante faciem suam, in omnem ciuitatem & locum quo erat ipse venturus, & dicebat illis. Messis quidē multa operarii autē pauci.* Quoniā vero hoc iam sacratissimo quadragesimæ tempore, multi postpositis voluptatum illecebris, & contemptis Bacchi deliciis conuersi sunt ad Dominum Deum suum in toto corde, planctu, & fletu, iamque bonorum operum cæperunt colligere manipulos, & in horreum cœlestis prædii inferre, ne forte laboribus his assiduīs vigiliis, ieiuniis, & orationibus fatigentur miscet Ecclesia amaris iucunda & delectabilia, proponit inquam Christum illis, qui ei fideliter inhærent conuiuium exhibentem, insinuans qui huic Domino ex corde seruiunt, nunquam ab eo derelinquendos, nec semen eorum quæsiturum panem. Igitur morem gerens Ecclesiæ matris, ut libentius hos quadragesimæ labores subeatis, conuiuium vobis exhibere decreui, & fercula ea apponere, quæ Christus Dominus his, qui primo quærunť regnum Dei & iustitiam eius, tribuere solitus est. Vos obsecro mensæ accumbite, & adeste præsentēs mente & auribus.

AUE MARIA.

Primum ferculum est Panis fertilitas satis copiosa. Quis enim ex agricolis non summa ope enititur, ut post diurnos nocturnosque labores, & vigi-
lias,

lias, lætam segetum exuberantiam videat, & lætus in horrea colligat, attamen frequenter ventus exsiccans, æstus vrens, grando percutiens, spem eius & desiderium frequenter decipit. Cæterum si Deo ex toto corde vestro seruire volueritis, aderit in vestris agris, & campis sufficiens segetum fertilitas, nec mirum, hodie quippe in montibus excelsis & desertis, solisque ardoribus expositis, satis abundantem panis copiam suis sectatoribus Christus Dominus tribuisse perhibetur, non enim difficile Domino huic, etiam supra petram saxosam vberrimos producere segetum fructus. 4. Reg. ca. 7. *Facta est fames magna in Samaria donec venundaretur caput asini, octoginta argenteis, & quarta pars cibi stercoreis columbarum quinque argenteis, sed adest Deus in auxilium propter vnicum seruum suum Elisæum? fame oppressis, nam in tempore breuissimo, modius similæ vno statere erat, & duo modii hordei statere vno. Prædixit olim septem annos fertilitatis Ioseph Pharaoni, & statim Rex ad eum. Tu eris inquit, super domum meam, & ad tui oris imperium cunctus populus obediet. &c. hoc modo vos cum audiatis, Christum vobis annos fertiles allaturum, si ei adhærere omnibus postpositis rerum temporalium commoditatibus volueritis, dicite. Si quidē adeo bonus es erga famulos tuos bone Iesv, tu eris super domum nostram, oculi nostri & manus nostræ ad te leuabuntur aures nostræ tua verba audient, & genua nostra ante te curuabuntur, nosque omnes tuo imperio obediemus, & ad te tanquam ad vltimum finem omnes actiones nostras dirigemus. &c. Aliud ferculum vobis ad manducandum propono. Prouidentiam scilicet Christi Domini erga eos, qui suis rebus despica-*

4. Reg.
ca. 7.

Gen. 41.

Gen. 28.

Exo. 16.

Deut. 24.

Ex Fischero

Roffense lib.

4. con. Oeco

lam.

tui habitis non quæ sua sunt, quærunt, sed quæ IESU Christi. Ait olim Iacob Patriarcha. *Si fuerit Dominus mecum, & custodierit me in via, per quam ego ambulo, & dederit mihi panem ad vescendum, & vestimentum ad induendum &c. eris mihi Dominus in Deum.* Hoc beneficium quod ex toto corde & supplici oratione exposcebat sanctus Iacob Patriarcha, vt in omnibus sibi Deum fauentem, & prouidentem haberet, ab eoque victui necessaria obtineret, & ideo se eius perpetuum famulum fore pollicebatur, nobis hodierna die liberali dextra offert Christus Dominus insinuans nos, vbicunque locorum fuerimus, siue in mari, siue in terra, siue in desertis montibus, si ei adhærere voluerimus, omnem sufficientiam ab eo accepturos. Res. clarior patebit exemplis. Filiis Israel quadraginta annis in deserto coturnices & manna ad manducandum misit Deus, & aquam de petra abundantem ad bibendum eduxit. Eorundem vestimenta toto illo tempore non sunt attrita, neque calceamenta vetustate consumpta. Elias quoque in magna illa fame, cum cœlum ad eius orationem tribus annis & mensibus sex, sic clausum esset, vt ne gutta quidem aquæ decideret, à coruis, Dei iussu pastus fuit. Danieli ob deiecta Babyloniorum idola, ibi in lacu leonum coniecto, misit Dominus ex Iudæa prandium per Abacuc Prophetam, per aëra vestum. Narratur de sacerdote quodam res multum miranda: sed sic narratur ac tanta fide refertur, vt neminem vllus scrupulus tenere debeat, quin res vera ac gesta fuerit. Ait enim Weselus Græningensis, sacerdotem quendam necessitate niuis, & algoris adactum, dum in Alpibus à via decerrasset, & mitiorem à ventis & niuibz vallē inuenit:

inuenit? sperans desiliisset neque reductæ quaquauer-
sum exitum reperisset, neque vnde desilierat,
propter altitudinem reascendere posset, sub exesam
& propendentem rupem sese fame moriturum pla-
ne desperabundus coniecit. Sed vt erat luna plena,
videt noctu serpentum diuersa genera contendere
ad lapidem quendam, & illic linguis suis eundem
lingere, ac post horam quoque in antra sua reuerti.
Et incidit ei cogitatus, quid nam illic ita lingerent.
Sequenti item nocte factum est simile, & miratus est
intra se amplius quod ita fieret. Tertia, demum no-
cte iam plane viribus destitutus, ante omnes ipse ac-
cessit & linxit, & inter lingendum ita restitutus atq;
refocillatus fuit, quasi cibo refectus. Et sic per totam
illic hyemem, sub rupe latitauit, donec in fine Apri-
lis nunc soluta peruiis iam factis Alpibus, quosdam
audiret in vicina colloquentes, quorum ope adiutus
& extractus est. Vnicum adhuc afferam exemplum,
quod Sancto Dominico accidit quodam tempore.
Procurator domus indicauit aliquando sancto viro
deesse panes. Ille iucundo spiritu benedixit Deum,
& exiguum illud quod supererat, iussit frustratim
mensis apponi: Erant tum in Monasterio fratres, plus
minus quadraginta. Ingressi itaque in refectorium,
post benedictionem, singuli buccellas sibi appositas,
cum gaudio frangunt, moxque deo iuuenes eiusdem
formæ & habitus, multos inferunt panes, quibus ta-
cite beato viro oblati, subito recedunt. Tum vir S.
ad omnes manus extendens. Iam nunc inquit. Fra-
tres comedite. O miram Dei benignitatem, talem se-
timentibus escam præparantis. Tertium, ferculum
vobis præbeo Sacrosanctum Eucharistiæ Sacramen-
tum,

*Factum mi-
rabile.*

*Providentia
admirabilis.*

*Theodorus de
Apeldua in
vita S. Do-
min. lib. 3.
cap. 4.*

*Panes diui-
nitus allati.*

Manducaverunt & saturati sunt.

Mirabile exemplum.

*Vincenti lib.
24. ca 27.*

tum, cuius virtus in hodierno hoc pane à Christo distributo adumbrata fuisse facile colligitur, tum quia manducantes hunc panem saturantur, tum quia quantum volunt, comedunt ex eo. Mira vobis referam, de hoc sacratissimo pane, vere enim hic solus panis saturat hominem. Refert Albertus Magnus solertissimus rerum variarum indagator de quodam Eremita, qui valde pius sola Eucharistia, apud Helucios prope Vnderualden, singulis mensibus sumpta, annos quindecim, nullo prorsus alio sumpto cibo vixisse traditur, circa annum Dni. 1465. Erat is Nicolaus nomine, Suitensis, secedens pietatis causa ab vxore, ea ita consentiente, ac liberis: facie ipsa præferebat inedia perpetuam homo macilentissimus: qui cum ea res delata ad Constantiensem Episcopum fuisset, neque fidem adhiberet, iussiletque tria panis obola ab eo sumi, paruit ille quidem, sed ægrè deglutire valuit, tandem obiit, opinione sanctitatis per Prouinciam relicta. Eadem inedia, sola Eucharistia sumpta, diu vixit beata Catharina Senensis, vt Pius secundus suis literis, in eius Canonisatione testatus est. Sed & Anno Dni. 1288, comperta est in Germania, in villa Bykel puella, quæ absque omni cibo annos 30. vixerit. Eucharistiæ Sacrosancto Sacramento contenta. Mirum cum aliquando Sacerdos hostiam nondum consecratam obtulisset, ipsaq; incauta sumpsisset, intra fauces hæsit, adeò vt glutire non valuerit. Id compertum esse tradit Naucleus, adiciens, cum mox verè consecrata hostia fuisset oblata, absque omni impedimento glutisse. Puella etiam duodecim annorum in Tullensi territorio, in villa commerciaco, post Eucharistiam in Paschate

ſchate ſumptam per triennium omni cibo ac potu
caruit. Seuerus Abbas natione Syrus apud urbem
Agathenſem Dominico die, mane ſacram percipie-
bat communionem, veſpere vero panem cruce ſi-
gnatum ab amico deſtinatum ſumebat, altero cibo
animam alens altero corpus ſuſtentans, reliquis au-
tem hebdomadæ diebus, cibo pariter ac potu vacu-
us perdurabat. Aliud eſt quia quantum volueritis,
de hoc cibo manducare & ſumere licet. Vult forni-
cator in hoc cibo ſumere continentiam, accedat di-
gne, prius per confeſſionem de conſcientia ſublatis
criminibus, & potietur optatis: eſt enim hoc Sacra-
mentum vinum germinans virgines. Vult immun-
dus ſumere munditiam cordis, veniat & efficietur
mundus; eſt enim hoc Sacramentum aqua viua,
mundans omnes maculas animæ. Vult iniquus ſu-
mere pietatem, accedat digne & dabitur illi; eſt e-
nim hoc Sacramentum fons omnium bonorum cœ-
leſtium, animam monilibus virtutum exornās. Vult
auarus ſumere animum liberalem ad tribuēdas pau-
peribus eleemoſynas, accedat digne, & mutabitur
in virum benignum, & miſericordem, eritque cæco
oculus & claudus in via baculus, nec poterit ſolus
buccellam panis comedere, quin ex ea ſumat pupil-
lus & vidua. Vult ſtultus & inſipiens in tenebrisque
peccatorum ambulans ſumere ſapientiam & ſcien-
tiam Dei, accedat; eſt enim hoc Sacramētum lumen,
quod illuminat omnem hominem veniētem in hunc
mundum. Vult iracundus mentem pacificam, & qui-
etam ſumere, veniat, & efficietur ſicut ouis manſue-
tus; eſt enim hoc Sacramentum ſymbolum pacis &
vinculum charitatis. Quisquis igitur acceſſerit ſu-
met,

met, quantum voluerit, & ratio est, quippe in Eucharistia non solum diuinam gratiam, sed etiam ipsum gratiæ authorem suscipit homo, proprium autem gratiæ est, animum eiusque vires ad omnes tentationes peccatorum corroborare, vsque eo, vt S. Thomas docet, vnicum minimum gratiæ gradum (vt Theologi loquuntur) sufficere, modo suam homo cooperationem non subtrahat ad omnes cuiuscunq; generis tentationes superandas. Accedit, quod sancti Patres affirmant. Christum in communione sacra non modo per gratiam & dona suæ præsentia in animam ingredi, sed cum ipso quodammodo corpore misceri, ac proinde proprium esse huius Sacramenti, frangere & debilitare vires concupiscentiæ quæ est in carne. 2. Reg. cap 6. *Diuertit arcã Domini David in domũ Obededõ Gethai, & habitauit arca Domini in domo Obededom tribus mensibus, & benedixit Dominus Obededom, & omnem domum eius, & omnia eius propter arcam Dei.* Sic qui in domum suam Christi carnem introducit, benedicitur à Domino, & nõ solum anima eius repletur benedictionibus, sed & caro ipsa omniaque membra eius diuinæ benedictionis imbre irrigantur, fit caput humile, aures ad conciones, Missas, cæteraque diuina officia audienda promptissimæ: oculi ex propriorum peccatorum suorum, & Dominicæ Passionis recordatione semper lacrymis suifusi, os ad orationes apertum, lingua ad Deum celebrandum, ad proximi excessus corrigendos, ad ignorantes de via salutis instruendos sollicita, manus ad elemosynas in pauperes erogandas liberales; venter ieiuniis & inedia cõfectus, renes casti & mortificati: crura ad peregrinandum fortia: pedes ad Ecclesias, hospitalia, cæteraque pia loca

Qui Eucharistiam in domum suã introducit in omnibus membris benedicitur.

loca intusenda veloces, vel inquam benedicit Dominus in Eucharistia sumptus hominem, & omnia eius, ac in primis oculos eius, quando facit hominem ex pulchritudinis mundi huius aspectu, ad pulchritudinis rerum cœlestium contemplationem transire, & à specie creaturarum, ad venustatē ascendere creatoris. Vt quando solis splendorem intuetur dicat. Quāto splendidior est eius conditor? quando lunæ claritatem, & stellarum fulgorem aspicit, ait: quāto his omnibus pulchrior est ipsorum creator; Quādo cœlorum, qui sunt quasi pavimentum siue conuexum paradisi, ornatum atque decorem oculis & animo lustrat, inquit. Quāto magis illustris est ipsius paradisi splendor & elegantia. Benedicit Dominus aures hominis, quando suauem instrumentorum & cantuum musicorum harmoniam audiens dicit. Quāto dulcior & gravior, est Angelorum in cœlis melodia, illorum videlicet musicorum supernæ aulæ, qui non cessant concinere noua cantica coram supremo totius orbis Monarcha? Sanctus, Sanctus, &c. Benedicit Dominus hominis nares, quādo suauissimum florum, moschi vel ambre odorē hauriens ait. Quāto fragrantior est ille odor qui ex vernantissimis cœlestis paradisi floribus exhalat, quemque moschus & ambra diuina, ex glorioſo Christi Saluatoris corpore assiduo emanantia, ex se spirant atque diffundunt, nam de illo scriptum est. *Trabe me pesti te carremus in odorem unguentorum tuorum.* Benedicit Dominus os hominis quando fructum animantium, piscium & voluerum, aliarumque rerum comestibilem, delicias, & sapiditatem percipiens inquit, quāto his delicatior est illa ambrosia & nectar illud suauissimum, quo beato-

*Benedicit
Dominus De
us homini in
oculis.*

In auribus.

In naribus.

Cant. r.

*In ore bene-
dicit Domi-
nus hominē.*

rum animæ in cœlis pascuntur & reficiuntur de quibus David ait : *Cibavit eos ex adipe frumenti, & de peira melle saturavit eos.* Benedicit manus, quando homo iucundis & castis tactibus, & amplexibus parentum, contubernalium, amicorum delectatus, in huiusmodi voces erumpit : quanto suaviores ac delectabiliores sunt illi contactus & amplexus, quibus Christum amicum charissimum, & fratrem omnium nostrum beati in cœlis tangunt, & amplectuntur? benedicat igitur Dominus propter hanc arcam testamenti hominem & omnia eius. Hinc Cyril. lib. 4.

Cap. 17. *Sedat, cum in nobis manet Christus, sciens membra nostra legem, pietatem corroborat, perturbationes animi extinguit.* & S. Ber. serm. de cœna Domini. Duo illud Sacramentum operatur

S. Bernar. *in nobis ut videlicet & sensum minuatur in minimis, & in gravioribus peccatis tollat omnino consensum. Si quis vestrum non tam sæpe modo, nec tam acerbos sentiant iracundiæ motus, invidia, luxuria, aut caterorum huiusmodi, gratias agat corpori & sanguini Domini, quoniam virtus Sacramenti operatur in eo.* O salutare fer-

Quantum ferculum. *culum sacrosanctam Eucharistiam. Quartum & ultimum ferculum vobis affero, Panes hordeaceos, duros quidem, sed quoniam suscepistis bona & dulcia, suscipite quoque & amara. Oportet enim ut hoc reliquo quadragesimæ tempore, omnino toto pectore in orationes, vigilias, flagellationes, longas orationes, in edias incumbatis carnem vestram castigantes, & eam in servitutem redigere pro viribus emittentes, dura quidem hæc sunt, sed necessaria ad salutem. Non in commensationibus, nec in ebrietatibus occupemini amplius, sed de peccatorum vestrorum turpitudine compuncti, potum vestrum cum fletu misceatis, & in pulvere sedentes corde contrito luceatis. Passionis quoque Iesv Christi*

Tempore quadragesimæ plorandum est.

memores, ei compatimini, & erubescite, Domino pro vobis, crudelissimo & exquisitissimo tormentorum genere excruciato, vos molliter cubare, & delectabilia quæque pro cibo sumere. Erubescite inquam, quia in gratiam Christi hoc tempore ieiunii nihil dignum oculis eius exhibuistis. Sumite ergo hoc ferculum & libenter manducate, si enim compatiemini, & conglorificabimini vnâ cum Christo IESV. Cui laus & gloria, cum Deo Patre & Sancto Spiritu.

AMEN.

SECVNDA ORATIO ECCLESIASTICA

In eadem Dominica.

Colligite quæ supersunt fragmenta ne pereant. Ioan. 6.

PVLchrè ostenditur qui seruiunt Christo, omnem habere sufficientiam, eos vero qui dæmoni adherent fragmenta decidentia de mensa sanctorum comedere.

*Summa Con-
cionis.*

TEterrimus dæmon, vt valeat quoquo modo auocare homines à Christi seruitio, ostendit eos, qui Christum tenent vestigia, famem, nuditatem, egestatem aliaque innumerabilia vitæ in-

Zz 2

commo

commoda tolerare, omni vitæ suæ tempore, illos vero qui suo obtemperant imperio omnibus facultatibus abundare. S. Iob. de Elephante sermonem instituens has technas teterrimi dæmonis videtur exprimere, cum dicat, *stringit caudam quasi Cedrum*, Elephas quippe habet caudam breuissimam, vt muscas repellere non possit, quas cutem in rugas contrahens occidit, Cedrus vero est arbor altissima, quæ ergo comparatio caudæ breuissimæ cum arbore excelsissima? Cauda significat tentationem dæmonis, Metaphora sumpta, à Dracone, serpente, & Scorpione quæ animantia cauda percutiunt. Apo. 12. *Draco cauda trahabat tertiam partem stellarum cæli*, id est persuasione & tentatione, quæ breuissima est, sed eam erigit tanquam Cedrum, sunt enim bona temporalia breuissima, quæ ille coram homine extollit, & amplissima esse studio iactat inani; mala vero, & alia omnia incommoda (de quibus ait Apostolus. *Modicum nunc operet contristari*) quæ sancti Dei pro Christi nomine libenter sufferunt, esse longissima & abiectissima repræsentat. Sed vehementer fallitur, qui huic dæmonis persuasioni acquiescit. Igitur ostendere placet omnes qui Christo Domino seruiunt nullius egere, qui autem se ab eo elongant, & dæmoni adhærent, fragmentis solis contentos esse. Res erit iucunda auditu, adeste fauorabiles.

Ap. 12.

AVE MARIA.

Fragmenta nihil aliud esse nisi reliquias ciborum, quos comedant ad mensam sedentes, qui diuinæ voluntati in omnibus adimplendæ inhærent, gaudent

dent omnium rerum ad victum & amictum necessa-
 riarum sufficientia, at quidæmonis nutu & imperio
 reguntur, sola fragmenta & micas de mensa decidē-
 tes manducat. Vtrumque declaro. Quantum atti-
 net ad seruorum Dei conditionem, in prima concio-
 ne satis dictum à nobis esse existimo, cum de proui-
 dentia Dei erga suos ageremus, subiicio tamen ali-
 qua de fontibus sacræ scripturæ deprompta. Psal. 33.
Oculi Domini super iustos & aures eius in preces eorum. Hoc pa-
 ctum inter Deum & iustos videtur initum, vt Deus
 in illos, ipsi verò in Deum oculos coniciant. *Dilectus*
meus mihi, & ego illi, inquit sponsa: ad iustum enim, Deo
 eiusque præceptis obtemperare pertinet: ad ipsum
 verò Deum summo studio, ac diligentia iustum tueri
 ac defendere, omniaque necessaria ei providere.
 Adhæc. Omnibus Deus preuidet sufficientem cibum
 animantibus, ergo multo magis iustis hominibus de
 quibus ipse dixit. *Multis passeribus meliores estis vos,* Psal.
 141. *Oculi omnium in te sperant Domine, & tu das escam illorum*
in tempore opportuno. Aperies tu manum tuam, & implebis omne ani-
mal benedictione, & Psal. 146. *Qui dat iumentis escam ipso-*
rum, & pullis cornuorum inuocantibus eum. Naturales Philoso-
 phi referunt, hanc proprietatem esse coruis à natu-
 ra insitam, vt cum videant natos suos, primum in
 hanc lucem susceptos pilis albis indui, septem die-
 rum spatio, eos tanquam ignotos deferant, donec i-
 psi plumis nigris ormentur, tunc enim illis tanquam
 filiis indulgent, cibumque suppeditant, sed septem
 illis diebus crocitant ipsi pulli præ inedia, & summo
 Deo rerum omnium modera ore, ita disponente vi-
 ctus tribuitur necessarius, exigua enim quædam ani-
 malia in illorum nidis à Deo collocantur, quibus illi

Psal. 33.

Cant. 2.

Psal. 141.
146.

De coruis
pulchra nar-
ratio.

*Aminori ad
maius con-
cluditur.*

*Illud pecca-
tores come-
dunt, quod
decidit de
mensa seruo-
rum Dei hinc
colliguntur
fragmenta so-
la comedere.
Eccl. 31.
Rom. 13.*

eo tempore aluntur. Si igitur Deus Optimus Maxi-
mus vilibus etiam & despectis creaturis tam singula-
ri prouidentia præstet, & ut ita dicam inferuit, quanta
erit illius prouidentia in hominem, ad sui imaginem
productum, & ad æternam beatitudinem factum;
modo illi homo velit fideliter adhærere, & illi soli
gloriam & honorem exhibere: & hæc sufficiant de
iustorum conditione. Quod autem reliquias cibo-
rum comedant peccatores, patet, hoc enim man-
ducant, quod serui Dei à sua mensa alienant, & pro-
iiciunt. In conuiujs peccatorum quid aliud est, nisi
multitudo ferculorum arte exquisitissima effectuum
diuersa genera potuum, ioci, colloquia vana accu-
bantium, breuib; rem absoluo, in mensa peccato-
rum, est superfluitas ciborum, varietas potuum, a-
uiditas & dissolutio comedentium, quæ omnia serui
Dei à mensa sua exulare volunt, & si inciderint ali-
quando celerrime proiiciunt, iuxta doctrinā. Eccl.
37. *Noli auidus esse in omni epulatione, & non te effundas super o-*
mnem escam, & 31. Vtere quasi homo frugi his quæ tibi apponuntur
ne cum manducas multum odio habearis, & Apo. Rom. 13. Sicut
in die honeste ambulemus, non in comestationibus & ebrietatibus,
quæ igitur serui Dei de mensa sua proiiciunt, ea pec-
catores manducant, quomodo ergo fragmentis &
micis de mensa decidentibus vesci non conuincun-
tur? Non me absque facturum existimo, si ad confu-
sionem eorum, qui ad mensas suas non necessitati,
sed luxui, & voluptati indulgent, exempla quæque
pulcherrima afferam, ut videant & intelligant ea se
manducare, quæ viri boni, & quidam adhuc Ethni-
corum erroribus inuoluti, à mensa sua abesse summo
studio procurabant. Age à Romanis incipiamus Cæ-
saribus.

faribus. C. Iulio, & Augusto, quorum ille tantæ abstinentiæ fuit, vt vulgo iactatum sit, vnum hunc ex omnibus Cæsarem ad euertendam Rempublicam sobrium accessisse, hic autem præterquam quod vulgaris cibi fuerit, cænam ternis ferculis, aut cum abundantissime senis præbebat: vt non nimio sumptu, ita summa comitate. Tiberius quoque vt parsimoniam publicam exemplo suo iuuaret, solemnibus ipse cænis pridiana sæpe, ac semesa obsonia apposuit, dimidiatumquæ aprum, affirmans omnia eadem habere, quæ totum. Si hoc in solemnibus cænis, quid in quotidianis. Quem imitatus videtur Dio. Iulianus Imperator, qui tantæ erat parsimoniæ, vt per triduum porcellum, per triduum leporem dimidiatum diuideret, si quis ei forsan misisset, sæpe etiam nulla existente religione, oleribus leguminibusque contentus sine carne cænauerit. Tacitum non esse prætermittendum video. Is adeo vitæ parcissimæ fuit, vt sextarium vini tota die nunquam potauerit. Conuiuium vero vnus gallinacci, ita vt adderet & oua. Fastianam autem, nisi suo & suorum natali & diebus festiuissimis non posuit. Præ omnibus oleribus affatim ministratis, lactucis impatienter indulgit. Argentum vero mensale, quod priuatus habuerat, ministeriis templorum dedicauit. Insuper Theodosii moderationem insigniter prædicat. Lat. Pacatus. Tuæ Imperator epulæ, mensis communibus parciores, locorum, ac temporum fructibus instruuntur. Hinc certatim in omnes luxuriæ pudor, parsimoniæ cultus inoleuit, & quiescentibus legum minis, subiit quædoque priuatim sui pœnitentia. Sic est enim, sic est, exasperat homines imperata correctio: blandissime iubetur

*Suet. Aug.
cap. 34.*

*Ibidem cap.
34.*

Spartianus.

Fl. Vepisiu.

Paneg.

*Plutarchus.**Plut.**In Sertorio.*

iubetur exemplo, non dissimilis continentia in Agathocle Rege, qui Sicilia potitus, sine fictilibus cœnauit nunquam: memor paternæ obscuritatis, quod figulo patre genitus foret. Nec dispar illi Curius Dendatus, qui cum à Samnitum Legatis adiretur, rapa sibi parare obsonium inuentus est, duosq; tantum calones in castris habere, cum tamen summam Imperii administraret. Magnæ quoque moderationis Cyrus Rex fuit, qui teste Xenophonte eam semper diligentiam adhibebat, vt in mensa ii sermones vsurparentur, qui iucundissimi essent, quique ad bonas laudabilesque actiones incitarent. Non ergo turpes mimorum & histrionum sermones (quibus plerique indulgent) admittebat. Sed & Sertorius nunquã conuiuia sua ad inhonesti normam metiebat. Certè si Plutarchos fides, in iis nec videri quidquam turpe, nec audiri poterat, vt pote qui suis mandarât, vt ab omni maledicto & scurrilitate abstererent nisi certarêt inter se placidis salibus facetisq; iocis. Prætermitto multa exēpla Christianorum Principum, & Regum, qui maximam ad mensas suas parsimonix & honestatis rationem habuerunt, dies enim citius deficeret, quam illorum enumeratio. Nunc vt ex productione exemplorum constat, quæ viri boni à mensa sua excludunt, nempe ebrietates, luxurias, verba scurrilia, lusus, & lascitias, hæc omnia in mensa impiorum abunde adesse, nemo non videt, ac ideo eos fragmenta quæ de mensa bonorum virorum proiecta decidunt manducare concluditur. Præterea sic argumentor. Canum cibus sunt fragmenta diuinis literis idipsum attestantibus.

Mat. 15. Etiam Domine, nam & canelli edunt de micis quæ cadunt de mensa Domini

Domini sui. Peccatores sunt canes ergo cibis illorum fragmenta & mica de mensa sanctorum decedentes. Probatum minor testimonio sacrarum literarum. Psal. 58. *Famem patientur ut canes.* Eccl. 13. *Quæ communicatio homini sancto ad canem.* 2. Pet. 2. *Sicut canis reuersus ad vomitum.* Apo. 22. *Foris canes & venefici.* & Eccl. 9. *Melior est canis viuus Leone mortuo.* Eutherus per Leonem cacodæmonem intelligit de cuius salute nihil vltius sperandum, per canem quidem viuum aberrantem & contumacem hominem peccatorem, qui tamen ad obsequium diuinum facile reduci potest, sed tamen ut dixi per canem peccatores intelliguntur, qui voluptates, & luxuriam, comestiones, & ebrietates, quæ sancti summo odio prosequuntur, & à sua mensa abiiciunt, sectantur, & diligunt. Hominem impudentem, carnalem, turpem peccatorem pingebant antiqui hominem nudum cum capite canino, hinc dicitur habere canis oculum qui nimium impudicus est. Vocabantur apud antiquos quidam milites. Petulantes iuniores, hi ut assumptum nomen hieroglyphica pictura testarentur, canem luteum in rubra parma præferebant, hinc Romani milites qui Pilato adhærebant canes vocantur. Psal. 21. *Circumdederunt me canes multi,* qui secundum legem immundi censebantur & impudentes, qui faciem Christi conspuebant. Ergo ex omnibus præmissis colligitur peccatores esse canes, & non comedere nisi fragmenta & micæ, de mensis sanctorum decedentes. Adhæc qui fragmenta & micæ comedunt raro saturantur. Peccatores suis deliciis & voluptatibus nunquam saturantur, ergo fragmenta & micæ non verò solidum cibum comedant est necesse. Psal. 31. *Diuites*

Psal. 18.
Eccl. 13.9.
2. Pet. 2.
Apo. 22.

Homines peccatores esse canes.

Milites petulantes qui.

Psal. 21.

Psal. 31.

*Disputatio
inter Philo-
sophos pul-
cherrima.*

*Optima con-
clusio.*

Psal. 62.

eguerunt esurierunt inquirentes autem Dominum non deficient omni bono. Cum Philippus Macedoniæ Rex cibum sumeret iussit Philosophos astantes disputare quænam mundi res maior esset, & primus Olympicus mons mihi inter res mundi maior esse videtur, quia in tantum supereminet, vt nulla naturæ inclementia, nec nubium nec ventorum ad eius verticem perueniat vquam. Alter verò. Mihi aqua maior apparet, cum propter vtriusque maris immensitatem, tum propter abundantiam fontium, perenniter scaturientium, & fluminum indefinenter currentium. Tertius, mihi lux solis, omnium rerum maior apparet, quia mundum vniuersum, cælum, terram, aerem vbique illustrat, & cooperit vndequaque. Quartus verò mihi hominis cor omnium rerum maius esse videtur quia potest cuncta quæ in mundo sunt vitia, reputare & despiciere, tum etiam quia omnia quæ à Deo creata sunt, eius capacitatem non explent, quantumuis enim multa possideat, plurimum-capax est. Hic Philosophus scopum attigit, nihil in hac visibili rerum natura corde hominis maius habetur. Hinc Alexander magnus, vniuersi mundi factus Dominus, alios mundos quos Philosophus quidam somniauerat appetebat, nimirum quia mundi magnitudo angusta est magnitudini, & amplitudini cordis humani. Neque hoc mirandum esse existimo, omnia enim mundi bona, omnesque voluptatum delectationes sunt fragmenta & micæ, quæ Sancti Dei à mensa sua excludunt, & alium cibum solidum, nempe solum Deum, & eius voluntatem exquirunt. Sola enim Dei possessio satiat corda humana. Hinc David. Psal. 62. *Quid mihi est in cælo, & à te quid volui super terram. quid tibi est in cælo*

cœlo & in terra? multa per omnem modum, in cœlo nouem Angelorum chori sunt, qui innumerabilia tibi bona conferre valent, in terra omnia regna, aurum, argentum, lapides, pretiosi, honores, diuitiæ, delitiæ, & alia quæ homines auide quærunt? quid mihi hæc omnia ait Dauid à te, hoc est sine te Domine, tu solus cordis mei capacitatem implere vales, cætera autem fragmenta sunt, quæ non satiant animam meam, vnde subdit. *Deus cordis mei et pars mea Deus in æternum*, & alio in loco. *Satiaber cum apparuerit gloria tua*. Nunquid te Rex Sancte non satiant mensæ Regiæ exquisitissima fercula? conuiuia opipara? potus varia genera? Numerosi concubinarum greges? Musicorum concentus? Palatiorum & hortorum amaritas? diuitiarum facultates? Non, inquit, hæc enim omnia sunt fragmenta, solidus vero cibus in regno Dei mei. Concludo. Corda humana, non satiant bona temporalia, quæ summo studio appetunt impii, ergo fragmenta manducant, quæ colligentibus se vix aliquando sufficiunt ad depellendam famem. Adde. Huiusmodi hominibus idem quod canibus contingere solet, canes enim sæpe leui causa, nimirum propter os aliquod, vel panis fragmentum de mensa sibi proiectum, se identidem mordent, & sanguine aspergunt, vt quilibet sibi proiectum fragmentum absumat? ita etiam impii, voluptatum, honorum diuitiarum valde cupidi propter honorem vel voluptatem quam aucupantur, seipso carpunt, mordent, pungunt, occidunt, vt in curiis regiis, & in medio platearum fieri quotidie videmus, suis enim *Simile.* concertationibus perturbantur & perturbant, commouentur, & commouent, omnia sursum deorsum-

Iudicium
cap. 1.

Conclusio.

que ferunt. *Olim septuaginta Reges, amputatis manuum ac pedum summitatibus colligebant sub mensa Adonibese ciborum reliquias. Qui quidem Reges perquam optime sortem improborum denotare videntur, sicut enim illi micas ciborum colligebant cum magno dolore manuum & pedum suorum, sic & impii laborant, inuigilant, manibus & pedibus, omnem ut aiunt lapidem mouent, cum ingenti molestia & cruciatu, nihil tamen aliud præter micas & fragmenta capiunt. O miseram illorum sortem. Eia igitur Christiani, videte miserabilem conditionem vestram, dum in peccatorum volutabro sordescitis. Videte inquam & cognoscite aliquando vos esse canes solis fragmentis vescentes. Vbi est dignitas vestra? ubi splendor eximius vester? Si estis ad imaginem Dei creati, quæ communicatio sancti ad canem? Quousque tandem eritis sicut animalia bruta quibus non est intellectus? Cur potius cibum solidum reiectis his, fragmentis, non queritis. Querite ergo & inuenietis, pulsate & aperietur vobis, petite & dabitur vobis. Dabitur inquam diuina gratia cœlestis consolatio & post hæc vita æterna.*

AMEN.

ORATIO ECCLESIASTICA

In Dominica Passionis.

Est qui requirit & indicat. Ioan. 2.

Sunt

SVnt perquam multi homines, quidum occultè
peccant, scelera sua impune abitura opinantur,
sed turpiter aberrant, aderit enim scrutator cordium
Deus, qui requireret sanguinem proximi de manu pec-
catoris, & retribuet facientibus iniquitatem.

*Summa Con-
cionis.*

NUllum esse peccatum quod diuinam effugiat
ultionem noueritis Auditores, sit etiam oc-
cultissimum, sed nihil occultum quod non re-
uelabitur, & quæ fiunt in abscondito prædicabun-
tur super tecta. Antiochiæ, in remotiore vrbis par-
te, ferunt virum necatum, qui canem sibi haberet
adiunctum, hunc enim quidam miles prædandi stu-
dio interfecerat, & in alias partes cesserat. Iacente
autem cadauere inhumato, frequens adstâtium vul-
gus adstabat. Canis autem vultu lacrymabili æru-
mnas Domini sui deslebat. Is vero qui necem intule-
rat ingenii versutia, quo præsumptam fidem adsciret
innocentiæ, ad illam circumspectantis populi coro-
nam quasi miserans accessit. Tunc canis sequestrato
paululum doloris questu, audaciam ultionis assump-
psit. & apprehensum tenuit, ac velut epilogo quo-
dam miserabile carmen immurmurans, vniuersos
in lacrymas conuertit fidemque probationi attulit,
quia solum eum ex plurimis tenuit, nec dimisit, Spe-
rabat hic homicida peccatum suum nunquam in co-
gnitionem hominum venturum, sed vt dixi nullum
malum impunitum. Est enim Deus qui requirit & iu-
dicat, sed de hoc ipsa concione fusius.

*Vincent hist.
li. 19. c. 13.*

AVE MARIA.

Multos esse Proceres & Magnates, qui spiritu superbiæ elati, viriumque suarum potentia freti superueniunt, & irruunt in eos qui sunt inferiores opibus & diuitiis, vniuersa arma eorum auferunt in quibus confidebant, & spolia eorum distribuunt, & cum hæc impiè & crudeliter fecerint latantur, hominem ignobilem à nobili, subditum à Principe iure debito opprimi, nec propterea metuendum sibi quidquam esse crocitant. Sed est qui requirit & iudicat. Placet Sacræ scripturæ hac de re producere testimonia. Deut. 32. *Mea est ultio, & ego retribuam eis in tempore, ut labatur pes eorum, iuxta est dies perditionis, & adesse festinant tempora.* Psal. 57. *Lætabitur iustus cum viderit vindictam, manus suas lauabit in sanguine peccatoris, & dicet homo, vtiq; est fructus iusto, vtiq; est Deus iudicans illos in terra.* Psal. 139. *Cognoui quia faciet Dominus iudicium inopis, & vindictam pauperum,* pulchrè Dauid Psal. 94. *Populum tuum Domine humiliauerunt, & hæreditatē tuam vexauerunt, viduam & aduenam interfecerunt, & pupillos occiderunt. Et dixerunt non videbit Dominus, nec intelliget Deus Iacob. Intelligite insipientes in populo, & stulti aliquando sapite. Qui plantauit aurem non audit, aut qui finxit oculum non considerat? Est igitur qui requirit, & iudicat. Adhæc rationibus idem illustrare licet. I. Deus Omnipotens iustus est, quippe de illo dicitur. *Iustus es Domine, & rectū iudicium tuum, æquitatem vidit vultus tuus,* ergo iustè iudicabit pusillum & fortem, pauperem & principem, & cum omnia adduxerit in iudicium, reddet omnibus iuxta opera*

opera sua, iustitiæ quoque illud esse officium, nemo non videt, vt per quæ quis peccat, per eadem puniatur, peccat aliquis opprimendo debiles, in die iudicii ipse oppressus lamentabitur. Væ qui spernis nonne & ipse sperneris? Væ qui prædaris quia ipse prædaberis, ergo qua mensura mensi fueritis, eadem remetietur vobis. Igitur ô Magnates & Principes, qui dum subditos vestros opprimitis, nihil vobis propterea timendum esse iactatis, opprimendos vos quoque aliquando noueritis. Est enim qui requirit & iudicat. 2. Pro quo Deus pugnat contra aliquem Principem, sine dubio succumbendum est Principi, quis enim resistere ante faciem Domini potest. Sed Deus pugnat pro oppressis & afflictis, aduersus Principes ergo &c. Propter miseriam inopum & gemitum pauperum, nunc exurgam dicit Dominus. Est qui requirit & iudicat. 3. Omne peccatum in cælum clamans citissimè iram diuinam accendit, & sicut fulgur in perpetrâtes illud descendere facit, talis est oppressio pauperum, ergo. &c. Sic peccauit Pharaon Rex Ægypti, quando paruulos omnes Hebræorum masculos iussit occidi, & totum populum Israeliticum supra vires laborare coegit, & ab exactoribus operum verberari, & flagellari, si quando non implerent opus, Tyrannice imperauit, quod peccatum quia in cælum clamauit, Deum ad vltionem prouocauit, qui Pharaonem & exercitum eius submersit in mari rubro. Adsunt & exempla rei nostræ illustrandæ accommodatissima. Inquit Nathan Propheta Domini ad Regē Dauidem. *Viam He. heum percussisti gladio, & uxorem illius accepisti in uxorem tibi. &c. Tu fecisti abscondite, ego autem faciam verbum istud in conspectu omnis Israel, & in conspectu solis. est enim*

*Per quæ quis
peccat per e-
adē punitur.*

*Deus pro op-
pressis pu-
gnat.*

*Pharaon mi-
sere occubu-
it quia affli-
xit populum.*

3. Reg. 12.

3. Reg. 21.

Populus à
muribus cor-
rosus.

enim qui requirit & iudicat. Scelerata Iezabel falso testimonio innocentem Naboth oppressit, sed de illa locutus est Dominus dicens. *Canes comedent Iezabel in agro Iesrael.* Populus Regni Poloniae Princeps, veritus ne Poloni aliquem ex patruis suis, in locum suum substituerent, vxoris astuto consilio infirmitatem simulauit, patruosque omnes qui viginti numero erant, Principes Pomeraniae accersit, & decumbens in lecto obnix ab eis rogauit, vt vnum filium suum ex duobus, regno se decedente praeferrent, quod libenter patruus se facturos sponderunt, si Magnates Regni consenserint. Regina interea poculum cum veneno mixtum adornauit, & vnicuique bibendum pro sanitate Regis obtulit. Egressi illi à Rege maxima corrosione ex veneno haurito excruciatii omnes pariter expirauerunt. Regina autem cum lætitia dixit, deos, in illos quod malum Regi Domino suo machinati fuerint iuste animaduertisse. Ideo cadauera eorum inhumata quasi perfidorum in Lacum Gopolo, reginae iussu proiecta sunt. Sed est qui requirit & iudicat. Statim enim Deus iustus Iudex & vindex nefandi illius homicidii, murium vim numerosam dictuq; horrendam ex illis cadaueribus miram quadam metamorphosi excitauit, quæ Regem in arce laute conuiuantem, vxoremque & filios eius cum terribili strepitu vndique inuaserunt, & neque armis, neque igne se arceri passæ sunt. Populus terrore vehemēti perculus in turrim naturalocimunitam, & aquis opportunè circumfluam, cum suis se recepit, vbi cum vxore & liberis à muribus corrosus consumptusque est, vt ne monumentum quidem illorum relictum fuerit. Alios etiam videre licet, qui dum in occulto

occulto peccant, nihil metuendum esse cum nemo videat, existimant. Sed est qui requirit & iudicat, nonne Deus requireret ista? Ipse enim nouit abscondita cordis. Psal. 90. *Verumtamen oculis tuis videbis, & retributionem peccatorum facies.* Vbique enim locorum Deus est, ergo vbique quid agatur videt. Iob 11. *Excelsior cælo est, & quid facies? profundior inferno & unde cognoscet? longior terra mensura eius & latior mari.* Præterea qui scit difficiliora scit sine dubio faciliora, sed difficilius est scire quid homo cogitet quam quid agat, sed illud scit Deus, ergo hoc magis. Psal. 93. *Novit Dominus cogitationes hominum quoniam vanæ sunt.* Luc. 6. *Sciebat cogitationes eorum, & 11. Et vidit cogitationes eorum & 24. Cogitationes ascendunt in corda vestra.* Ioa. 1. Vidit IESVS Nathanael venientem ad se, & dicit de eo. Ecce verus Israelita in quo dolus non est. Dicit ei Nathanael. Vnde me nosti? Respondit IESVS & dixit ei. Priusquam te Philippus vocaret cum esses sub ficu vidi te. Respondit ei Nathanael & ait. Rabbi, tu es filius Dei, tu es Rex Israel. An non igitur manifestum est Dei oculis omnia patere? O summam impudentiam iniquorum, qui quotidie in oculis Domini ea perpetrare scelera non erubescunt, quæ in conspectu vilissimi hominis perpetrare nequaquam auderent. Heu diuinam præsentiam vbique locorum ab impiis contemni & despici? O summam Dei patientiam qui in oculis suis peccantes, fulmine de cælo cadente non perimit, aut hiatu terræ non absumit. Quis similis tibi in misericordia Domine? quis similis tibi? verè bonus & verè benignus, & multum patiens, sed tamen tempore suo requirens & iudicans solertissimus scrutator cordium. Dixit Cain ad Abel fratrem

Iob 11.

Psal. 93.

Luc. 6.

17. 24.

Magna impudicitia in oculis Domini peccare.

suum: Egrediamur foras, cumque essent in agro, consurrexit Cain aduersus fratrem & interfecit eum. Cur dicit egrediamur foras? vt occultè interficiat fratrem ne videant parentes eius, sed est qui requirit & iudicat. Sequitur enim; Et ait Dominus ad Cain: Vbi est Abel frater tuus. Qui respondit nescio. Niquid custos, fratris mei sum ego: Dixitque ad eum, quid fecisti? Vox sanguinis fratris tui clamat ad me de terra.

Libro de dignitate hominis.

En quomodo requirit Deus & iudicat. Inquit Simon Maiolus dierum Canicularium Author: Insigne exemplum diuinæ vindictæ accedit non ita pridem, cum enim insons vir quidam militaris, cum vno atq; altero, ex suis comitibus insidiosè interfectus esset, vnus ex illis paulo post consciētia tactus, mania correptus quasi defendens se à iustitia ministris seipsum pugnis petiit, donec cultro incertum vnde illato, circa cor ictus lethales sibi ipse inflixit. Cumque interuenirent ii qui curam eius gererent, animaduertunt murem vel glirem vulnere inhærere, & veluti lambendo sanguinis fluxum inhibere. Mox repulso illo sanguis tam copiosus ex vulneribus erupit, donec necquicquam adhibitis remediis, ad restinguendum aptis, extinctus fuerit. Ex his igitur apparet, nullum scelus impunitum relinquendum, nullum peccatum etiam occultissimum à grauissima Dei animaduersione remouendum: sed omnia opera à Deo discutienda, & mercede conuenienti remuneranda.

Conclusio.

Vos igitur qui alios opprimere, & crudeli immaniq; Tyrannide vexare assuefacti estis, recordemini esse eum qui requirit & iudicabit hanc vestram crudelitatem. Vos quoque qui abdita quæritis loca, & oculi vestri obseruant caliginē dum sceleribus perpetratis incumbitis noueritis tēpus aliquādo futurum quan-

quādo omnia nefanda opera vestra in luce clarescēt,
& in cōspectu solis quæ occulte perpetrastis omnium
oculis ad videndum ea exhibebuntur. Potius ergo
Deum qui scrutator cordium est ex toto corde di-
ligite, vt ibi sitis, vbi Dominus vester regnat
sine fine. AMEN.

SECUNDA ORATIO ECCLESIASTICA

In eadem Dominica.

*Tulerunt ergo lapides, vt iacerent in eum, Iesus autem abscondit se
& exiit de templo. Ioan. 8.*

SI vis ne tibi noceant furiosæ inimicorum minę,
subtrahe te ab illorum facie, & iam vicisti.

*Summa Con-
cionis.*

Fertur vetulā quandā pauperem speculum per-
spicuum in sterquilino reperisse, mirata vili
loco pulchrum speculum iacere, accepit, faci-
ei admouit, cumque deformitatem vultus sui in spe-
culo inspexisset, proiecit dicens: Merito ab omni-
bus abiectum in sterquilino iaces, quod sic aperte
deformitatem manifestas. Quid quæso aliud est is,
qui veritatem dicit, quam speculum mundum ad a-
mulum? & verē res secundum exigentiam earum
repræsentans. Sicut enim speculum speciosum vul-
tum

tum speciosum reddit, deformē vero doformē, sic ille quæ bona & pulchra sunt, bona & pulchra profert, profert, quæ vero fœda & mala, fœda & mala dicit, &c. at sicut speculum illud ideo despectum fuit, quod fœda, fœda esse repræsenderet, sic qui fœda & vitiosa talia esse denunciat, abiicitur, despicitur, reprobat. Hodie quoq; Christus Dominus an non ipsissimā veritatē protulit? sed illa veritas odium peperit, bilē accēdit, manus ad tollendos lapides erga eum cōmouit. Christus vero quid fecit? abscondit se, & exiuit de templo. Optimum remedium ad superandos hostes ne noceant. hoc vos si seruaueritis, remlaude dignam, vobisque proficuum exhibituros vos mea docebit concio.

AVE MARIA

Pro. 27.

Prou. 27. *Graue est saxum, & onerosa arena, sed ira stulti utroque grauior. Qui igitur hoc grauiissimo iracundiæ saxo ferire te voluerit, paululum declina & abscondas te, hostis vero tuus confusione affectus & in seipso tabescens remanebit, quod enim oculus non videt cor non dolet, te quoque cum ab aspectu inimici subtraxeris quando te non videt, ira aduersus te inflammari desinit, hinc quidam satis præclare poeta cecinisse legitur.*

In rixis grauibz nonnunquam cedere præstat,

Quam nimium niri victor ut esse queas.

Æquore turbato præstat demittere vela,

Stulticia poenas quam dare morte graues.

Pro. 20.

Matt. 5.

Nec diuerse canunt sacrarum literarum testimonia.

Pro. 20. *Honor est homini qui separat se à contentionibus.* Mat.

5. *Qui tecum vult contendere in iudicio, & tunicam tollere, dimitte*

ei &

et pallium. Gen. 37. Oderat quondam Esau Iacob, pro benedictione, qua benedixerat ei Pater, dixitq; in corde suo, venient luctus dies Patris mei, & occidam Iacob Fratrem meum &c. Nuntiata sunt hæc Rebecca quæ mittens & vocans Iacob filium suum dixit ad eum. Ecce Esau frater tuus minatur vt occidat te. (grande periculum) videte remedium. Nunc ergo fili mi audi vocem meam, & consurgens fuge ad Laban Patrem meum, in Haran habitabisq; cum eo dies paucos, donec requiescat furor fratris tui. Fugit, & sic vitæ suæ consuluit, omneque periculum euasit. O salutare remedium. Ostenditur idē similitudinibus pulcherrimis. 1. Ignem extingui sit necesse cum subtraxeris ligna, sic ignis iracundiæ, extinguitur si cum verbis duris & cōuitiosis inflammare nolueris, sed subito cum flammæ cruciare cæperit, pedem inde moueas. Ecclesi. 8. *Non litiges cum homine linguato, & non strues in ignem illius ligna,* Eccl. 8. 2. Silex nequaquam scintillas igniferas sponte propria emittere visus est nisi tum, cum ferrum illi summo impetu admotum fuerit, hoc modo ira inimici nunquam ebulliet, si te subtraxeris nec cum illo impatienti responsione congrederi tentaueris. 3. Audiuntur fulgura & tonitrua, conspiciuntur coruscationes, nubes adsunt densissimæ quæ omnia sunt certissima venturæ pluviæ indicia, si tu volueris euadere pluuiam, fugito sub tectum. 3. Reg. 18. Inquit Elias ad puerum. *Ascende & dic Achab. Iunge currum tuum & descende ne occupet te pluuia.* Sic cum ex ore hominis procedunt verba fulminosa, oculi fiunt turbidi, pedes manusque in compositè mouentur, &c. tu cede ne te grando percutiat, aut pluuia occupet. 4. Aliquis

Simile.

Eccl. 8.

3. Reg.
cap. 18.

iaculator nititur sagittam in ardentem candelam dirigere, & dum ipse operi intendit, candelam aliquis loco mouet, sagitta frustra emissa volat candela integra remanere. Non dispari ratione decreuit quispiam in animo, verbis te durissimis impetere, & linguam suam sicut sagittam acutam in famam tuam dirigere, tu cede loco volabit frustra emissum verbum.

5. Domus aliqua concepit flammam ardentissimam, qui intro sunt fugam arripiunt, & sic pedibus vitæ consulunt, ardet quispiam aduersus te iracundia, tu abscondas te, & saluasti animam tuam. Afferam quoque vobis historias auditu iucundissimas. 1. Reg. 19. Et factus est Spiritus Domini malus in Saul, sedebat autem in domo sua & tenebat lanceam, porro David psallebat manu sua, nisusque est Saul configere David, & declinavit David a facie Saul, lancea autem casso vulnere prolata est in parietem, & David fugit & saluatus est nocte illa. Alio quoque tempore, misit Saul satellites suos nocte in domum David, vt custodirent eum & interficeretur mane quod cum annuntiasset David Michol vxor sua dicens: Nisi saluaueris te nocte hac, cras morieris, deposuit ergo illum per fenestram, porro ille abiit, & aufugit, & saluatus est. Recte S. Chrysoft. hom. 3. Si imaginem Davidis præ oculis habeas, & in hac assidue defigas oculos etiamsi millies obtundet ira mentis oculum perturbans, ad hoc virtutis exemplar respiciens perfectam consequeris sanitatem. Ne quis igitur mihi dicat. Inimicum habeo scelestum, improbum incorrigibilem, quidquid dixerit non est tamen Saule deterior, qui semel & iterum imo sæpius, seruatus a Davide, cum ipse mille modis illi struxisset insidias, ta-

men

*David fugi-
endo euasit
periculum.*

men pro tot beneficiis acceptis perseuerauit in sua malicia, Dauid autem subterfugiendo eius insaniam illo extincto ab hostibus, meruit in solio dignitatis Regiæ Deo sic volente collocari. Adhæc. Stultus in sua stultitia non poterit nocere sapienti viro, sed qui fratri suo irascitur stultus est qui autem eius furiis cedit sapiens agnoscitur, ergo stultè ira excalescens non nocebit sapienter recedenti. Eccl. 7. *Ne sis velox ad irascendum quia ira in sinu stulti requiescit, fatuus statim prodit iram suam.* Qui verò irascenti non contradicit, sed quieto & placido animo discedit sapientis viri cognomen subeat necesse. Facit enim id, quod suo exemplo faciendum Christus Iesus sapientia æterna insinuauit. Prou. 15. *Vir iracundus promouet rixas, & qui patiens est mitigat suscitatas.* Præterea. Qui Dei explet præceptum magnum consequitur meritum, qui vero resistit diuinæ voluntati sine dubio animæ suæ ingens facit detrimentum, sed qui in se consurgenti non contradicit, & pacifice ab eo recedit, diuinis obedit mandatis, qui verò irascitur fratri suo succumbit præuaricationi, ergo ille meritum, hic detrimentum capit. Leu. 19. *N. n. quæras ultionē nec memor eris iniuriæ ciuium.* & Prou. 20. *Ne dicas reddam malum, expecta Dominum & liberabit te,* ergo sic infertur. Nemo ex vna actione simul refert meritum & demeritum, commodum & detrimentum, sed subterfugiens iurgia habet meritum, & commodum, ergo nunquam incurrit demeritum & detrimentum. Ne igitur dixeritis, fugit, euasit, erupit, & idcirco timidus est, & magis metuens quam metuendus, homo pusillanimis, & ad vnum strepitum folii de arbore decidentis trepidans. O virum lepori & non leoni similem examinatum, & mollem

Eccl. 7.

Prou. 15.

Leu. 19.

Pro. 29.

mollem, ne hæc inquam dicere præsumatis, imo virum fortissimum, sapientissimum & acerrimum militem dixeritis. Fortior est enim qui se, quam qui fortissima mœnia vincit, multos superavit, qui affectui imperavit. &c. Insuper facilius ille victoriam assequitur, imo nunquam ab hoste superatur, cui Deus pugnantem adhæret, & manus eius confortat, sed subterfugienti iurgia, & patienter omnia sustinenti adest subito Deus in auxilium, acerrime pro illo pugnaturus, & iniurias illi illatas vehementer ulturus ergo. &c. Deu. 12. *Mea est ultio & ego retribuam.* Rom. 12.

Deu. 12.

Rom. 12.

Non vosmetipsos defendentes charissimi, sed date locum iræ, scriptum est enim mihi vindictam & ego retribuam. Igitur, quoniam increpationibus durissimis aliquem diu exalti, latronem, furem, scurram appellasti, lætaris ac si inimicum insanabili plaga & lethali vulnere affecisses, sed falleris miser, ille quidem tacuit, sed multa mala tibi intulit, quid enim facies, cum pro hac eius iniuria tecum in iudicium venerit Deus, & te condigna pœna castigare voluerit? Non igitur illum, sed te ipsum afflixisti, non illi sed tibi ipsi vulnera, imo mortem crudelissimam intulisti, non illum læsisti, sed Deum aduersus te exarcebasti, ignemque gehennæ promeruisti. Expecta ergo paululum & veniet super te manus Domini, & cum te tetigerit, tum cognosces quia ipse est Dominus Deus vlciscens iniurias seruorum tuorum, & retribuens vindictam superbis. Valentinianus senior Imperator, Anno Dni. 375. cum ingenti belli apparatu aduersus Sauromatas est profectus, quod ditionem Romanam, eamque Imperii partem, quæ ad occidentem vergit excursionibus vexarent. Atque illi tantam Imperatoris expedi-

expeditionem formidantes, legatis missis pacem ab eo petierunt. Quos ubi deformes esse vidisset, an vniuersi tales essent Sauromatæ interrogauit. Et cum illi dixissent optimos quosque, qui & genere & forma præstarent, ab eis legatos solere mitti, ira atque furore multo correptus, grauia pati dixit, & maxime infortunatum esse, quod ad tempora sua peruenisset Romanorum Imperium, si Sauromatæ gens tam barbara & informis, in qua reliquos isti excelleret: essent cōfidentia tanta impulsæ, ut ditionē suam percurrerent, & bellum sititillatione quadam illecti Romanis inferrent. Et cum ita indignaretur, & magnopere vociferaretur, nimia vocis intensione, conuulsa in eo esse interiora viscera, venamq; & arteriam quandam ruptam dicunt, vnde sanguine plurimo profuso, vita eum reliquerit. En detestandum iracundiæ effectum, quæ semper maiora affert damna ei, in cuius corde excandescit, quam illi contra quem suas flammæ vrentes ebullit. Vociferabatur & indignabatur Imperator tacentibus legatis, illi salui ad suos venire, Imperator morte subitanea sublatus occubuit. Discite à Christo Auditores, quia mitis est & humilis corde, non iracundus, nec malitiosus quā doctrinam cum ipso effectum terminaueritis, sine fine cum illo regnabitis. Cui laus & honor in sæcula sæculorum.

AMEN.

ORATIO ECCLESIASTICA

In Dominica Palmarum.

Plurima autem turba strauerunt vestimenta sua in via.

*Summa Con-
cionis.*

Causæ aperiuntur, quare Christus ante mortem, solemni triumpho, & magno cum gaudio excipitur à Hierosolymitanis aliis voluit.

Exo. 8.

Ingens fuisse gaudium Noe, cum ad eum columba venisset, ad vesperam portans ramum oliuæ, videntibus foliis in ore suo, facile colligitur: intellexit quippe iam cessasse aquas super terram, Deumque Omnipotentem placatum manum suam fortem tandem cohibuisse. O quanta lætitia Angelis Dei, imo & ipsi Christo Domino oritur, cum hodierna die, præmissa sufficienti peccatorum suorum confessione anima Christiana, carens felle peccati mortalis, cum ramo oliuæ, seu cum bono proposito, amplius non peccandi, præterita deplorandi, & futura cauendi, obuiam procedit Christo, maius enim est gaudium coram Angelis Dei, super vno peccatore pœnitentiam agente, quam super nonaginta nouem iustis, sed illa cœlesti lætitia relicta de hodierna nobis disputandum esse video, atque inquirendum, quid causæ sit cur Christus Dominus ante mortem cum triumpho & lætitia Hierusalem ingreditur.

AVE

AVE MARIA.

Nemo non videt factum hodiernum summa admiratione esse excipiendum, diligentique consideratione introspectiendum, quare Christus Dominus solemnibus triumphis paucos post dies vitam cum morte commutaturus excipi voluit? cum enim carne indutus hunc in mundum infans ingrederetur, emisit vocem similem nobis, nasci quoque voluit in stabulo, omnem aeris intemperiem, frigoris molestiam, stabuli turpitudinem non abhorrens: sed cum de hoc mundo nigrandum est, dissimilem a nobis exitum de hac lacrymarum valle, Christum querere in aperto est. Nos enim cum morti proximi sumus insolito terrore concussi ingemiscimus, doloris & tristitiæ indicia, vultu, oculis, manibus præferentes. Christus vero moriturus summo gaudio & solemnibus triumphis honorari non recusat. Habete causas. I. Nascendo Christus Dominus idcirco ploratum emisit, quia subiit eum recordatio præuaricationis nostrorum Parentum, cuius ergo durum exilium nos omnes subire coacti sumus, gaudet moriturus, quia compertum habet morte sua humano generi, paradysum voluptatis restituendum, & regnum cælorum iam quasi iure hæreditario donandum. Fleuit inquam nascendo, quia recordatus fuit miseræ conditionis humanæ iuxta verba S. Iob. *Homo natus de muliere brevis vivens tempore, repletur multis miseriis*, gaudet moriturus, videns paucos post dies, sese æternas obtenturum delicias. Fleuit nascendo, quia vidit miserabilem hominum nascentium viventium, &

*Cur Christus
natus flevit,
moriturus
letatur.*

morientium sortem, quippe nascebantur in dolore
 vivebant in labore, moriebantur in mœrore, gaudet
 moriturus, quia videt morte sua allaturum se affli-
 ctis consolationem, laborantibus refrigerium, de-
 bilibus auxilium, egenis subsidium, morientibus æ-
 ternæ vitæ solatium. O vere magna causa lætitiæ?
 quis enim continere potest cor suum, quin gaudio
 repleatur, sciens breue post tempus se æternum ha-
 biturum regnum? Placet vnum atque alterum ex-
 plum in medium proferre. Nicolaus Tolentinas sex
 totis ante obitum mensibus, paulo ante nocturnas
 preces, singulis noctibus suauissimum Angelorum
 concentum audiuit, qui illi quasi prægustationem
 vitæ futuræ præbebat. Itaque, quo illum desiderio
 eius vitæ arsisse credimus, ad cuius iucunditatem tā
 iucundē inuitabatur? Declaravit ipse qui frequenter
 illud Apostoli dictum in ore habebat. Cupio dissolui
 & esse cum Christo. Quin idem etiam cum resoluti-
 onis tempus instaret, in extremo spiritu voces fun-
 dere cæpit, lætantis atque gestientis: cuius inusitati
 gaudii cum fratres qui aderant causam quæssissent,
 attonitus ille vixque sui compos præ magnitudine
 rei: Dominus meus Iesus Christus inquit, Sanctissimæ
 Matri suæ & Augustino Patri nostro, innixus, dicit
 mihi; Euge serue bone & fidelis, intra in gaudium
 Dominitui, in quibus verbis expiravit. Gregorius
 libro quarto Dialogorum mortem Vrsini Presbyteri
 describens sic refert. Cum magna cœpit lætitia cla-
 mare dicens: Bene veniant Domini mei, bene veni-
 ant Domini: qui ad tantillum seruulum vestrum di-
 gnati estis venire? venio, venio, gratias ago, gra-
 tias ago. Cumque hoc iterata crebro voce repete-
 ret,

*In vita eius
 ca. 11. & 13.
 apud Sur, se-
 ptimo to.*

*Angelorum
 concentus au-
 ditur à S. Ni-
 colao ante
 mortem.*

*Gaudium in
 morte.*

*Beati Petri
 & Pauli ap-
 paritio.*

ret, quibus hoc diceret, noti sui, qui illum circum-
steterant inquirebant. Quibus ille admirando re-
spondit dicens. Nunquid hic conuenisse sanctos-A-
postolos non videtis? beatum Petrum & Paulum,
primos Apostolorum non aspicitis? Ad quos iterum
conuersus dicebat. Ecce venio, ecce venio, atque
inter hæc verba animam reddidit. Quoniam igitur
Christus Dominus proximam suam gloriam & glori-
tatem imminere, (quantum ad corpus attinet)
vidit, moriturus lætabatur Sanctos suos, eadem
lætitia in morte repletum iri apte insinuans. 2. Vt o-
stenderet quam cum ingenti desiderio expectauit
mortem suam, pro amore nostro subeundam. Obla-
tus enim est quia ipse voluit. Nam ante mortem op-
petendam signa ostendere lætitiæ indicium certissi-
mum est, cum hominem sponte & non coactè subire
mortis sententiam. Sed interrogemus Dominum I E-
S V M. Cur lætaris breue post tempus mortem oppe-
titurus bone Domine? Sexto die turpissima morte
damnandus es, funibus constringendus, flagellis
verberandus, spinis lacerandus, omnium ludibrio
exponendus, & tamen gaudio exultas, & triumphis
indulges? Respondebit ille amorem erga vos in cor-
de meo ardentem, causam esse huius lætitiæ, vt vi-
deatis quanto cum desiderio tempus mortis meæ
ignominiosissimæ expectem. O amorem ardentissi-
mum. O dilectionem admirabilem. 3. Voluit Chri-
stus Dominus innuere, bonis non esse mortem ti-
mendam, qualiscunque illa fuerit, nec tristandum
esse cum superuenerit, si quidem, *in us quacunque morte*
præoccupatus fuerit in refrigerio erit. S. Franciscus Assisius
cum grauissimis arderet totius corporis doloribus,

*Secunda cau-
sa Christi læ-
titiæ.*

*Qui seminat
in lacrymis
metet in ex-
ultatione.*

nullum aliud fomentum habebat illorum dolorum, quam ut ipse diuinas laudes lætabundus caneret, & alios canentes audiret, in quo cum ab Helia fratre obiurgaretur, quod potius præstaret illud tempus extremum, lacrymis & pœnitentiæ impendere, respondit non licere sibi aliter facere, cum sciret se breui cum Domino fore, quomodo enim homini bono & sancto tempore mortis tristandum esse arbitramur, cum videat moriens iam desinere tempus belli & adesse tempus pacis & dies salutis, qui igitur bene viuit bene moritur, & qui seminat in lacrymis in exultatione metit portando manipulos suos, quis enim lætitia non disfluat cum recordatus fuerit, se ab exilio in patriam, e seruitute in libertatem, e miseriis in omnem rerum affluentiam migrare? Quis non libèter de carcere ad palatium, de aduersitate ad omnem prosperitatem, de mortalitate ad immortalitatem properabit? 4. Quando aliquis exhibiturus est publicè actum aliquem singularem puta Comædiam, discit domi prius qualis debeat esse foris, & antequam actum illum publicè exhibeat solet intra domesticos parietes aliquoties illum exercere. Christus Dominus in die Resurrectionis suæ exhibiturus est actum Deo Patri & Angelis iucundissimum. Patres videlicet Sanctos e lyombo educturus, draconè illum antiquum catena ligaturus, omnemque eius vim & potentiam confracturus, & in quatum coniecere possum, tres actus in illa comædia futuros animaduerto. In primo Christum Dominum, a Patribus in lyombo magno cum applausu excipiendum exhiberi, & iste actus hodie repræsentatur, cum Christus Hierosolymam ingrediens magno cum gaudio ab omnibus

omnibus salutatur. Secundus actus Christum victo-
ria potitum exhibebit, & hic quoque actus hodie
repræsentatur, cum ciuitas illa Christi summos ad-
uersarios, & plane hostes capitales continens, quasi
deuicta eius præsentia elatum capitis verticem hu-
miliat. Tertius actus triumphum solennem Christi
resurgentis continebit, & iste hodie repræsentatur,
quando Christus cum omnium lætis acclamationi-
bus ciuitatem ingreditur. 5. Dicit Dominus de sei-
pso. *Data est mihi omnis potestas in cælo & in terra.* Ad obti-
nendam ergo huius possessionis in cælis intromissio.
nē magno cum apparatu in die Ascensionis suæ Chri-
stus Dominus ingreditur, ad firmandam vero hu-
ius potestatis in regno terreno, hodie cum pompa
& triumpho Metropolim regni sicut proprius hæ-
res & Dominus, intrare præsumit. 6. Docebat mul-
tis & disertissimis verbis, Christus Dominus mundi
gloriam esse contemnendam, tanquam fallacem &
breui duraturam, hodie exemplo ipso manifestat, &
doctrinam suam re ipsa comprobat ac si diceret. In-
tuimini me hodie cum magno applausu receptum,
salutatum, & magno honore præuentum, sed gloria
mundi instar fumi qui à vento dispergitur. Hodie
quippe ante solis occasum, me ab eodem populo e-
iectum, contemptum, spretum videbitis. O vanas
mundi pompas. Iam vero die sexto, o qualis incon-
stantia mundanæ gloriæ, in Christo agnoscetur. Ho-
die cum applausu recipitur, die sexto cum ludibrio
eiicietur. Hodie Rex appellatur, die sexto morte da-
mnabitur, hodie honoratur, die sexta inferior ho-
micida iudicabitur, hodie asina vehitur, die sexta
cruce oppressus ad montem Caluariæ ducetur, ho-
die

*Quot actus
illa comædia
contineat.*

die cantu excipitur, die sexto clamoribus ad crucē
 postulabitur, hodie ramis Palmarum honoratur,
 sexto die virgis & spinarum aculeis lacerabitur, ho-
 die multa plebe hinc inde circumdatus in urbem in-
 troducitur, sexto die stipatus militibus crudelissimis
 ad mortem trahetur. Hodie Dei Filius vocatur, sex-
 to die, vorax & potator vini, atque seductor nun-
 cupabitur, hodie comitantibus se Apostolis, & tur-
 ba discipulorum graditur, sexto die, a notis suis de-
 relinquetur. O summam gloriæ mundanæ incōstan-
 tiam. Ad vos meam conuerto Orationem Auditores.
 Procedamus obviam Christo, & siue in vita, siue in
 morte fuerit, non eum derelinquamus, eiicietur ille
 nos quoque cum illo eiiciamur, flagellabitur ille, &
 nos eisdem flagellis succumbamus, opprimetur ille,
 & nos opprimamur. Famem, æstum, sitim, inopiam
 patietur ille & nos patiamur, si enim compatiemur
 & conglorificabimur, vna cum Christo Domino
 cui laus & gloria cum Patre & Scto Spiritu.

AMEN.

SECUNDA ORATIO ECCLESIASTICA

In eadem Dominica.

*Summa Con-
 sionis.*

PEccatorē nunquam posse vera lætitiā abundare,
 iustum autem omni tempore, & maxime in hora
 mortis, pulchrē docetur. Mul-

Multas causas enumeraui, in prima concione, propter quas Christus Dominus morti proximus ingenti cum lætitia, & triumpho in ciuitatem Hierusalem ingredi voluit, inter quas non abs re hanc esse collocandam existimo, vt videlicet declararet, probos & Sanctos homines semper existere veræ lætitiæ participes, nullumque casum posse dari, qui eos interno gaudio priuare valeat: peccatores vero & impios maximis tristitiæ tormentis excrucuari, etiam in medio voluptatum, in aperto est, quippe quæ sub sole sunt, vanitatem redolent, summamque afflictionem animabus inferunt, & omnis risus dolore miscetur extremaq; gaudii occupat luctus. Ne autem surdo fabulam canere & aliquid à veritate alienum dicere videar, in hac concione nullum peccatorem veram lætitiā posse habere pulcherrimo discursu declarabo.

AVE MARIA.

In primis sic argumentor. In qua domo morte sublatuſ est Pater familias, in domo illa fletus, & ploratus, & lamentationes resonant, nulla ibi lætitiæ signa, nulli musicorum cantus, nulli organorum aut tubarum sonitus audiuntur, sed potius omnia mœrore & squallore induuntur, parietes panno nigro conteguntur, faces acceduntur, domus totaliberorum, propinquorum, & seruorum lugubribus vocibus impletur. At in corpore peccatoris anima quæ peccauit ipsa mortua est, quomodo ergo ibi veram esse lætitiā dixeritis? imo vero omnes mœroris &

Anima in corpore peccatoris mortua est.

Ddd

dolo-

doloris cruciatus in corpore illo, existere vos fateri necesse est, conscientia quippe illius pungitur quasi gladio ancipiti, voluntas & intellectus confunditur propter malum adamatum, & bonum infinitum amissum, omniaque membra quandam induunt mæstiam, & tristem pigritiam, nam nec oculus hilari aspectu intuetur sanctos & probos secum identidem colloquentes, nec auris pròpte obedit diuinis vocibus, nec cor acquiescit cœlestibus inspirationibus sed totus homo turbatus, afflictus mærore & squalore oppressus gemit, anima enim in domo illa mortua sordescit, quod autem lethalis culpa animæ miseram inferat mortem patet, scribit enim Sanctus Apostolus ad Romanos. *Si secundum carnem vixeritis moriemini*, quid sit autem viuere secundum carnem, ex eiusdem Apostoli verbis facile constare potest. *Manifesta inquit sunt opera carnis, quæ sunt fornicatio, immunditia, impudicitia, luxuria, & his similia*: inquit ergo Paulus, *si secundum carnem vixeritis moriemini* Cum enim huiusmodi operibus lethiferum peccatum coniungitur, quasi pugione quodam anima confoditur eiusq; vita extinguitur. Idem comparabat Diuus Iacobus dicens. *Vnusquisque tentatur, & concupiscentia abtractus, & illectus, deinde concupiscentia cum conceperit parit peccatum, peccatū vero cū consummatū fuerit, generat mortē.* Quocirca humani generis Assertor peccatores mortuorum nomine nuncupare solet in Euangelio. Cum enim quidam eorum qui in eius se disciplinam volebat tradere ab eo potestatem peteret eundi, ad parentum corpus in sepulchro condendum, respondit illi Christus. *Sinite mortuos sepelire mortuos suos*, id est qui animi vita orbatī sunt, sepeliant eos, qui vita corporis functi sunt; cum
item

Rom. 8.

Matt. 3.

item de filio prodigo loqueretur fratri minori. *Frater tuus hic mortuus erat & reuixit, perierat & inuentus est.* Et quidem cum mortuus dicitur sermo est de prodigo illo, dum flagitiis, libidini, ac voluptati se totum dedere, quamuis enim tunc videretur sibi letè iucundeq; viuere, eo tamen tempore mortuus esse asseritur. Habet se mortiferum animæ vulnus à peccato inflitum, tanquam ictus quidam fulminis, qui nulla extrinsecus cicatrice imposita, interius maximè vulnerat, omniaque ossa penitus comminuit, & vagina incolumi persistente, enssem in ea inclusum frangit ac omnino comminuit, sic etiam lethalis culpæ vulnus animam corpore inclusam interimit, ipso corpore sano saluoque permanēte. Colligitur ergo perquam optime hominem peccatorem cum in tabernaculo corporis sui animam mortuam habeat non posse veræ lætitiæ esse participem. Qui in vinculis detinetur, aut funibus constrictus carceri includitur, aut in seruitutem ductus captiuitatis oppressione affigitur, eum lætitiæ habenas laxare incredibile, talis est fors peccatoris. ergo &c. *Funes peccatorum circumplexi sunt me,* ait S. David. Ezech, 33. *In iniquitate sua captus est,* Psal. 115. *Dirupisti vincula mea tibi sacrificabo hostiam laudis.* Adhæc ubi non est pax non potest esse gaudium, sed non est pax impiis ergo nec gaudium. Præterea vera lætitia ex sola virtute oritur, non habent virtutem impii, ergo nec lætitiā. S. Chrysostomus hom. 54. ad populum. Illam ego quero lætitiā quæ ex nulla re corporali principium habet, sed ex spiritualibus de qua Paulus ait. *Gaudete in Domino semper,* spiritualia enim sunt quæ veram efficiunt lætitiā, mundi enim lætitia nomen tantum lætitiæ habet,

Ddd 2

cum

Simile.

Qui facit peccatum seruus est peccati.

cum in eo omnia tristitia sint. Quantam habet tristitiam superbus, quomodo cruciatur dum extollitur innumeras sibi contumelias inferens, multum odii multum inimicitiae, inuidiae multum, quod si a maioribus condemnatur dolet, si non super omnes insurgat roditur, humilis autem est in magna voluptate, honorem expectans a nemine, si fortasse quidem honoretur gaudet, si vero non honoretur non dolet, gratum enim habet quod honoratus non fuerit, ipsum autem nemo afficit contumelia. &c. Insuper ibi est vera laetitia, ubi est bene, ubi vero va, ibi eam inesse, nunquam dixero, sed, si impius fuero va mihi, ergo ibi nulla laetitia. Quale va, vel qualiter va! Omnimodo quidem iniusto va, licet enim diuitias & delicias habeat, va illi est, tum quia ipsis peccata accumulatur plura, tum quia non illum diuitiae, & reliqua mundi vniuersi bona, a miseria culpae quae omnium maxima est, neque a cruciatu conscientiae: & a miseria gehennae poterunt liberare. Sicut igitur grauiter aegrotanti, nec famulorum turba, nec ministrantium obsequia, nec diuitiarum copia, nec suppellectilium mitor, nec generis claritudo illum bene esse faciunt. Dolor enim & infirmitas afflictionem corpori & animae pariunt, non obstantibus reliquis bonis: sic aegritudine peccati affecto, quae omnium pessima est, reliqua bene illi esse non possunt, at contra. Isa. 3. Dicite iusto quoniam bene quoniam fructum adinventionum suarum comedit. bene ergo ubique iusto, quia cum bonus ipse in se sit, reliqua omnia imo saepe etiam mala illi cooperantur in bonum. Ad extremum tali discursu rem meam concludo. Duo contraria simul & semel non possunt esse in vno subiecto, sed ubi peccatum

Simile.

tum regnat ibi tormenta, ibi timor & terror, ibi ver-
 mis nunquam moriens, ergo lætitia nullo modo su-
 am ibi extendit iucunditatem, toto enim cœlo sibi
 aduersatur tormentum & gaudium, tristitia & læti-
 tia trepidatio & securitas, nulla igitur impiis adest
 aliquando lætitia. Psal. 37. Cum Dauid de peccatis
 suis ageret cum Deo. *Non est sanitas inquit in carne mea, à*
facie iræ tuæ, non est pax ossibus meis à facie peccatorum meorum,
 quasi dicat, Domine adeò me peccatorum meorum
 facies exterret, & torquet, vt omnem iram tuam
 super me venire credam. Si vulneratum pedem ha-
 bes & dolet, omnia formidas & times, ne ad pedem
 vulneratum accedat, si manum vel pedem mouet a-
 lius, iam pedem contrahis & ais vix, si iacens si in le-
 cto accesserit amicus, & sedere voluerit super le-
 ctum, cum primum id attentauerit iam conquereris,
 & ais clamans, caue quia dolor & vulnus timidum
 reddit, & omnia in vulnus super vulnus timet, sic est
 conscientia vulnerata, si tonant nubes, iam fulgura
 super se cadentia imaginatur, si caput dolet mortem
 adesse credit, hæc enim est conditio conscientie ma-
 la. Et obserua Dauidis culpam iam remissam fuisse
 tunc, & ipsum id iam nosse. audierat enim à Nathan
 Propheta. *Dominus transtulit peccatum tuum.* Quod si pec-
 carum remissum sic animam morsibus pœnarum tor-
 quet, quid peccatum non remissum, vel cuius remis-
 sionis non talem notitiam habes. Est enim peccatum
 commissum velut spina infixæ pedi, pungit semper &
 pedem figere non sinit in terra sine dolore, & est pec-
 cator sicut latro, cum iudicem vel aliquem mini-
 strum, vel malam crucem forte videt inde tremit, &
 pauet. &c. Addo & illud Prou. 23. *Engit impius nemine*

Simile.

persequēte. Quis grauior potest pavor excogitari quā ille quo quis nemine persequente fugit, persequente alio fugere timoris indicium est magni, at fugere sine persequente timor inauditus est. Tali ergo premuntur mali. Vbi verò timor & trepidatio, ibi perfecta non cōsistit lætitia. Olim Rex Balthasar grande illud cōuiuium cum mille suis optimatibus celebrauit, sed cum digitos illos manus ignotæ prospexisset, vehementi terrore correptus est, ita vt Regis facies commutata esset, & cogitationes eius conturbarent eum, & compages renum eius soluerentur, & genua eius ad se inuicem colliderentur, quippe superueniente timore cessat lætitia, semper igitur impij tormenta & cruciatus patiuntur, nunquam verò lætitiæ veræ dulcedinem experiuntur, quid verò erit in morte? O deplorandam illorum sortem: Væ mihi si impius fuero. Omni ergo studio contendite auditores, vt quam primum excusso seruitutis peccatorum iugo, in libertatem & lætitiā filiorum Dei progredi valeatis, seruire quippe Deo regnare est, nec melius quidquam sub sole reperitur quā benè agere & semper lætari, quod nobis præstare dignetur Christus Dominus regnans cum Deo Patre & sancto Spiritu.


AMEN.


Finis tomi primi.


m
tc
ti-
e-
r-
de
a-
t,
es
nt
na
i.
r-
i-
in
ni
i-
o-

A

In
the







Biblioteka Jagiellońska

51470023645

